

ሃዋሪታ ኦሶ ጊዶ ቆፋ

ሃዋሪታ ኦሶ ማጻፋዚ ሉቃሳ ሚሺራች ቃላፔ ካሊዛይሳ፤ ሃ ማጻፋዛሰ ኣይፌ ቆፋይ ኮይሮ ዩሱሳ ካሊዛይቲ ጸሎ ኣያናይ ካሌሊን ኢዛ ጊሻሰ ዮቲዛ ሚሺራች ቃላ፡ «ዩሩሳላሜን፡ ዩሁዳ ዴሬ ኡባን፡ ሳማሪያኒኔ ቢታ ጋጸ ጋካናሰ» 1:8 ሚሺራች ቃላ ኢሰቲ ዋሰቲ ኡባ ጋሊዳኮ ሄሳ ዮታናሳ፤ ማጻፋዚ ኣማኖይ ኣይሁዳታ ጋርሳን ዶሚዲ ኩሜላ ኣላሜ ኣሳይ ኣማናና ጋካናሰ ኢዚ ዋኒ ዋኒ ኣኪ ኣኪ ቢዳኮ ዮቲዛይሳ። ሃይሳ ማጻፋ ጸፊዳይሲ ኣማኒዛይቲ ኦሮሜ ካዋራ ኤቄታናሰ ጋርሳራ ዮኦ ቃቹዛይታ ጊዶንታይሳኔ ኣማኒዛይታ ኣማኖይ ሃንኮ ኣይሁዳታ ኣማኖ ፖሎኮ ጋሊዛዝ ጊዲዳይሳ ኤሪሳናሰ ዳሮ ባጾቲዳሰ።

ሃዋሪታ ኦሶ ማጻፋይ ዩሱሳ ጊሻሰ ሚሺራች ቃላይ ጋኪዛሶይ ዋዴን ዋዴን ኣኪ ኣኪ ቢዛይሳኔ ዋሳ ኬሌይ ሚኒ ጳጲዳይሳ ቤሲዛ ሄዡ ጌታ ኪፊሌታን ሻኬታናሰ ዳንዳዩሰ።

1. ኣማኒዛይታ ኣማኖይ ዩሱሲ ዴንዲዲ ፑዴ ሳሎ ቢዳፔ ጉዩ ዩሩሳላሜን ዶሚዳሰ።
2. ኢሰራኤሌ ዴሬ ኩሜላ ጋኪዳሰ።
3. ኦሮሜ ጉጂ ኤኪዲ ሜዲቴራኔ ኣባ ዩሾን ዲዛ ዴራ ጋካናሰ ኦይኮይሳ ዮቲሰ።

ሃዋሪታ ኦሶ ማጻፋን ኬሂ ቆንጨ ቤቲዛይ ጸሎ ኣያና ኦሶ ጊዲሺን ጸንጾቆሰቲ ባኣሌ ጋላሰ ዩሩሳላሜን ኣማኒዛ ኣሳ ቦላ ዋልቃራ ዋዶይሳ፡ ሄሳሐካ ሄ ማጻፋዛን ዮቲቲዳ ዮኦታን ኡባን ቆንጨዳ ማላ ጸሎ ኣያናይ ዋሳ ኬላኔ ዋሳ ኬላ ካሌሊዛይታ ካሌሊዳይሳኔ ሚንሐሊዳይሳ ጉጃሰ። ቤኒ ዋዴ ዮቲቲዛ ኣማኖ ቃላይ ዲማ ዲማ ኦጌራ ሳባኬቲዳሰ። ሃዋሪታ ኦሶ ማጻፋን ፖሌቲዳ ኦሶቲካ ኪታዚ ኣማኒዛይታ ዴኦኔ ኢሰታ ኢሲፊቴላን ዲዛ ዋልቃይ ኣይ ማላ ሚኖኮኔ ኤሪሴቲሰ።

ሃ ማጻፋይ ኦይኪዳ ኩሜላ ቆፋ

ማርካቴላሰ ጊጌቲላ 1:1-26

ዩሩሳላሜን ዮቲቲዳ ማርካቴላ 2:1—8:3

ዩሁዳኒኔ ሳማሪያን ዮቲቲዳ ማርካቴላ 8:4—12:25

ጳጳሎሳ ሃዋሪቲላ ኦሶ 13:1—28:31

ሚሺራች ቃላ የታናሰ ጳውሎሳስ ኮይሮ ቡስ 13:1—
 14:28
 ዬሩሳላሜ ሺቆ 15:1-35
 ሚሺራች ቃላ የታናሰ ጳውሎሳስ ናሞኢንሶ ቡስ 15:36
 —18:22
 ሚሺራች ቃላ የታናሰ ጳውሎሳስ ሄቫንሶ ቡስ 18:23—
 21:16
 ዬሩሳላሜን፥ ቂሳሪያኒኔ ኦርሜን ጳውሎሳ ቃሼቴል 21:17
 —28:31

ዬሱሲ ሳሎ ዳንዲ ቡስ

¹ ቶፊሎሳ! ዬሱሲ ኦፋናሲኔ ታማርሳናሰ ኦይኪዳይሳ ወርሳ ታ ኔሰ ኮይሮ ማጻፋን ጸፋዲሰ።
² ሄሲካ ኢዚ ፑዴ ዳንላ ጋላሰ ጋካናሰ ባ ዶሪ ከቲዳይታሰ ጸሎ ኢያና ባጋሪ ኢዚ ኢሰታሰ ኢሚዳ ኣዛዘኮ።
³ ኢዚ ዳር ዋዬ ቤኢዳፔ ጉዬ ኢሰታኮ ሸቂዲ ሃይቆፔ ዳንዳናይሳ ኢሰታሰ ዳር ማርካራ ቆንጨሲሼ ኦይዱ ታሙ ጋላሰ ጋካናሰ ኢሰታሰ ጋላሰ ጋላሰ ቤቲሼ ጸሳ ካዎቴላ ገሻሰ የቲዴሰ።
⁴ ኢሰታሪ ኢሲፌ ማዳን ኡቲ ዲሼ ኢሰታ፥ «ዬሩሳላሜፔ ከዘፒቲ፤ ገዶ ኣቲን ታ ኢንቴሰ የቲሺን ኢንቴ ሲዬዳይሳ ታ ኣዋይ ኢሚዳ ኡፋይሳ ናጊቲ።
⁵ የሃኒሲ ሃላን ጸማቂዴሰ፤ ኢንቴ ገዲኮ ጉላ ዋዴፔ ጉዬ ጸሎ ኢያናን ጸማቂታና» ገዲ የቲዴሰ።
⁶ ኢሰቲካ ኢሲ ቦላ ሸቂቲ ዲሼ፥ «ጎዶ! ኔ ኢሰራኤሌታ ካዎቴል ዛራዳ ሃኢ ኤሳኔ?» ገ ኦይቺዳ።
⁷ ኢዚካ ኢሰታሰ፥ «ኣዋይ ባ ሼኔን ዋሒዳ ዋዴ ኤርይ ኢንቴሰ ኢሚቲቤና።
⁸ ገዶ ኣቲን ጸሎ ኢያናይ ኢንቴ ቦላ ዋዲዳ ዋዴ ኢንቴ ዋልቃ ኤካና። ዬሩሳላሜንካ፥ ዩሁዳንካ፥ ሳማሪያንካ ኡባሶን ቢታ ጋጸ ጋካናሰ ኢንቴ ታሰ ማርካታ ገዳና» ገዴሰ።
⁹ ሂሳ ገ የቲዳፔ ጉዬ ኢሰቲ ጸሊሺን ፑዴ ሳሎ ዳንዲዴሰ፤ ሻራይካ ኢሰታ ኣይፌፔ ኢዛ ጌንሐዴሰ።
¹⁰ ኢዚ ቢሺን ኢሰቲ ኢዛ ቲሺ ሂሰቲ ፑዴ ሳሎ ጸሊሺን ቦላ ማይኦ ማይኢዳ ናሞኡ ኣሳቲ ቆፖንታ ኢሰታ ኣቻን ኤቂዲ፥

1:1 ሉቃ 1:1-4 1:4 ሉቃ 24:49 1:5 ማቶ 3:11፤ ማር 1:8፤ ሉቃ 3:16፤
 ዮሃ 1:33 1:8 ማቶ 28:19፤ ማር 16:15፤ ሉቃ 24:47-48 1:9 ማር 16:19፤
 ሉቃ 24:50-51

11 «ኢንቴኖ ጋሊላ አሳቶ! ኢንቴ ፑዴ ሳሎ ጸሊሼ ሃይሳን አዛስ ኤቂዳቲ? ሃይሲ ኢንቴ ማታፔ ፑዴ ሳሎ ዴንዲሺን ኢንቴ ቤኢዛ ዩሱሲ ሳሎ ኬዚሺን ኢንቴ ቤኢዳ ማላ ሄሳፉካ ኢዚ ሃ ሲሚ ያና» ጊዳ።

ዩሁዳ ሶሆን ማቲያሳ ዶሬቴል

12 ሄሳፌ ጉዩ ዳብራዛይቴ ጌቴቲዛ ዙማ ቦላፌ ዋዲዲ ዩሩሳሌሜ ሲሚዳ። ሄ ዙማይካ ዩሩሳሌሜቴ ኢሲ ኪሎ ሜቴሪ ማላ ሃኬስ።

13 ጌዴ ካታማዮ ጌሊዲ ካሴ ባ ዲዛ ኬፋ ፖቄ ቦላ ኬዚዳ፤ ሃይቲካ ጴጽሮሳ፣ ዮሃንሳ፣ ያቆቤ፣ ኢንዲራሳ፣ ፒሊጶሳ፣ ቶማሳ፣ ባርቴሌሞሳ፣ ማቶሳ፣ ኢልፊዮሳ ና ያቆቤ፣ ባ ባጋስ ሚሼቲዛ ሲሞናኔ ያቆቤ ና ዩሁዳ።

14 ሄይቲ ዉሪካ ማጫሳታፔ ዩሱሳ አዮ ማራሚራ ሄሳፉካ ኢዛ አሻታራ ኢሲ ዋዚናን ኢሲ ቦላ ቃንጾንታ ሚኒ ዋሲዳ።

15 ሄ ጋላሳታን ጴጽሮሲ ጴታኔ ናሞኡ ታሙ አማኒዛ አሳ ጊዶን ኤቂዳ፤

16 «ታ አሻቶ! ዩሱሳ ኦይኪዳ አሳታ ካሌላ ኤሂዳ ዩሁዳ ገሻስ ጸሎ አያናይ ካሴቲዲ ዳዊቴ ዶናን ሃሳይዳ ጌሻ ማጻፋ ቃላይ ፖሌታና ኮሼስ።

17 ኢዚካ ኑፔ አሳዴ ማላ ታይቤቲዲ ሃይሳ ሃ ኦሶዛን ጌላናስ ቃዳ ዴሚዴስ» ጊዴስ።

18 ጊዲኮካ ሃይሳዴይ ባ ኢታ ኦሶን ዴሚዳ ሚሻን ጋዴ ሻሚዴስ፤ ሄንካ ባ ሊጶን ጉፋኒ ኩንዲን ኢዛ አሳቴላይ ጊዶፌ ጳልቄቲ ዋዲዴስ፤ ኢዛ ማራጩይ ቢታ ቦላ ዛዜቲዴስ።

19 ሄሲካ ዩሩሳሌሜን ዲዛ አሳ ኡባስ ሲዩቲዴስ፤ ቢታይካ ኢስታ ቃላራ፣ «ኦኬልዳማ» ጌቴቲዴስ፤ ሄሳስ ቢርሼላይካ ሱፋ ቢታ ጉሳ።

20 ጉጂዲካ ጴጽሮሲ፣

«ዩፋ ማጻፋን፣

ኢዛ ጋዴይ ሜላ አቶ፤

ኢዛን አይ አሲካ ዶፖ፤

ቃሴካ ኢዛ ዳናቴል

ሃራ አሲ ኤኮ

ጌቴቲ ጳፌቲዴስ።

21 «ሄሳ ገሻሰ ጎዳ ዩሱሲ ኑናራ ዲዛ ዎዴ ኡባን ኑናራ ኢሲፌ ዲዛይታ ገደፌ ኑ ኢሳዴ ዶራናሰ ኮሼሰ።

22 ሄሲካ ዮሃንሳ ጸንቃታፔ ሃ ሲሚን ዩሱሲ ኑፔ ሻኬቲ ዴንዲ ባና ጋካናሰ ኑናራ ዲዛዴ ገዳናሰ ቤሴሰ፤ ጋሶይካ ሃ ኣሳታፔ ኢሳዴይ ኑናራ ዩሱሳ ዴንላሰ ማርካ ገዳና ኮሼሰ» ገዴሰ።

23 ሄሳ ገሻሰ ባርሳባሳ ዎይኮ ዮሰጾሳ ጌቲቲዛ ዮሴፌኔ ማቲያሳ ናሞኣታ ሺሺዲ፤

24 «ጎዶ! ኔኒ ኣሳ ኡባ ዎዚና ኤራሳ፤ ሃይታ ናሞኣታ ገደፌ ኔ ኦና ዶሪዳኮ ኢዛዴ ኑና ቤሳ።

25 የሁዳይ ዬጊ ቢዳሶን ሃ ኑሳ ኦላናዴኔ ሃዋሬ ገዳናዴ ኔ ዶራ» ገ ዎሲዲ።

26 ሄሳፌ ሳማ ዩጊን ሳማይ ማቲያሳሰ ኬዚዴሰ፤ ኢዚካ ታማኔ ኢሲ ሃዋሬታራ ኢሲፌ ታይቤቲዴሰ።

2

እማኒዛ ኣሳ ቦላ ጸሎ ኣያና ዎዴል

1 ጸንጹቆሰቲ ጌቲቲዛ ባኣሌ ጋላሲ ጋኪዳ ዎዴ ኣሳይ ዉሪካ ኢሲ ሶን ሸቂ ዲሺን፤

2 ቆፋይ ባይንዳ ዳሮ ሚኖ ጎቲ ጫርኮ ማላ ገሪሲ ዩዴሰ፤ ኣሳይ ዲዛ ኬላካ ኩሚዴሰ።

3 ታማ ላጮ ሚሳቲዛ ቃላይ ኣሳሰ ቤቲዲ ሻኬቲ ሻኬቲ ኢሳ ኢሳ ቦላ ኡቲዴሰ።

4 እማኒዛይቲ ዉሪ ጸሎ ኣያናን ኩሚዲ ኣያናይ ኢሰታሰ ሃሳያናሰ ኢሚዳይሳ ኬና ሃራ ቃላራ ሃሳያ ኦይኪዲ።

5 ሄ ዎዴ ሳሎ ጉፋንፉን ዲዛ ዴሬፔ ዩዳ ጸሳሰ ባቢዛ ኣይሁዳቲ ዩሩሳላሚን ዴቲሰ።

6 ሄ ገሪሳ ሲዩዲ ዴሬይ ሸቂዴሰ፤ ኢሶይ ኢሶይ ባ ቃላራ ሃሳይዛይሳ ሲዩዲ ማላሌቲዲ።

7 ማላሌቲዲ ጋናዚ ጳዩን፤ «ሃይቲ ሃሳይዛይቲ ዉሪካ ጋለላ ኣሰ ዴቲኔ?

8 ሂሰቲን ኦኒ ኑ ዩሌቲዳ ኑ ዴሬ ቃላራ ኢሰቲ ሃሳይሺን ዎሰቲ ሲዩዚ?

9 ኦኒ ጳርታኔ ኣሳይ፤ ሜዴ ኣሳይ፤ ኤላሜ ኣሳይ፤ ሜሰጴጾሚያን፤ ዩሁዳን፤ ቆጶዶቂያን፤ ጳንጾሳን፤ ኢሲያን፤

10 ፒርጊያን፤ ጸንፊሊያን፤ ጊብጾን፤ ቃሬና ኣቻን ዲዛ ሊቢያፔኔ ኦሮሜፔ ዩዳይቲ

11 አይሁዳቲኔ ጌዳ አይሁዳቲቱን ጌሊዳ ቃርጾሴ አሳኔ አራቤ አሳታ ጊዲሺን ዋልቃማ ኦሶ ጸሳይሳ ሃይቲ ኑ ቃላራ ሃሳይሺን ኑ ሲዮስ» ጊዳ።

12 ወሪካ ኬሂ ማላሌቲዲኔ ጋናዚ ቆዩን ባ ጊደን፥ «ሃይሲ አዜሻ?» ጌቲቲዳ።

13 ባጋ አሳይ፥ «ሃይቲ ዳሮ ዋይኔ ጫጃ ኡዪዳ» ጊዲ ኢስታ ቂዲዳ።

14 ሄ ዋዴ ጴጽሮሲ ታማኔ ኢሲኔታራ ኤቂዲ ባ ቃላ ቶቁ ሂስቲዲ ዴራስ፥ «ኢንቴኖ ዩሁዳ አሳቶ! ዩሩሳላሜን ዲዛይቶ! ኢንቴ ወሪካ ሃይሳ ኢሲ ሚሽ ኤሪቴኔ ታ ጊዛይሳ ሲዪቴ።

15 ሃኢ ጋዴይ ዋንቲን ቡሮ ሄዡ ሳቴ ጊዲዳ ጊሻስ ኢንቴ ቆፒዛ ማላ ሃይቲ አሳቲ ማፅቲቤቴና።

16 ጊደ አቲን ሃይሲ ካሴ ናቤ ኢዩኤሌን ሂዝጊ ዮቴቲዳ ቃላይ ፖሌታናሳ፥

17 « ሳሲ ወርሴላ ጋላስ

ታ አያና

አሾ ማይኢዳ ኡባ ቦላ

ታኒ ጉሳና፤

ኢንቴ ማጫ ናይቲኔ

ኢንቴ አቲማ ናይቲ

ቲንቢቴ ሃሳያና፤

ዬላጋ ናይቲ አጃታ ቤያና፤

ጨማቲ አጉሞ አጉሜታና።

18 ሄ ዋዴ ታ ማጫ አሽካራታ ቦላኔ

ታ አቲማ አሽካራታ ቦላ

ታ አያናፔ ታ ጉሳና።

ኢስቲካ ቲንቢቴ ሃሳያና።

19 ቦላ ሳሎን ማላሊሲዛ ሃኖታ

ታ ቤሳና፥

ጋርሳ ሳኢን ማላታታ ታ ቤሳና፤

ሱላ፥ ታማይኔ ቱላላይ ሃናና።

20 ጊታኔ ቦንቾ ጊዲዳ

ጎዳ ጋላስ

ያናፔ ካሴቲዲ

አርሼይ ቆማና፤

አጊናይካ ሱላ ሚሳታና።

21 ጎዳ ሱንሐ ጴይጊዛይ

ወሪ አታና፡ ጊደስ።

22 «ኢስራኤል ናይቶ! ሃይሳ ቃላ ሲዩቴ፤ ኢንቴ ኢንቴ ባጋራ ኤሪዛይሳ ማላ ኢንቴ ጊደን ማላታኔ ኣሲ ሲዩ ኤርንታ ሚሻታ ኢዛ ኩሼን ኦሊዱ ጸሲ ናዚሬቴ ዩሱሳስ ማርካቲደስ።

23 ጸሲ ካሴ ባ ቃቺዳይሳ ኢዛስ ቤኒ ኤራቴላ ማላ ሃይሳዴ ኢንቴ ኩሼን ኣሊ ኢሚደስ። ኢንቴካ ኢታ ኣሳታ ኩሼን ካቂቴ ሃይቃና ማላ ኦሊዴታ።

24 ጊደ ኣቲን ጸሲ ኢዛ ቦላፌ ሃይቆ ዋልቃ ዲጊዲ ሃይቆፔ ዴንሊደስ፤ ሃይቆይካ ኢዛ ኦይኪ ኣሻናስ ዳንዳይቤና።

25 ዳዊቲካ ኢዛ ጊሻስ፡

« ሳቲ ጎዳ ኡባ ዋዴ
ታ ሲንላን ቤያይስ፤
ኢዚ ታ ኡሻቻን ዴስ፤
ሙሌካ ሂርጊኬ።

26 ሄሳ ጊሻስ ታ ዋዚናይ ኡፋዬቴስ፤
ታ ደናይካ ጋላቴስ፤
ታ ኣሾይ ኡፋይሳን ዳና።

27 ኔ ታ ሼዎፖዮ ዱፎን ኣጋካ፤
ኔ ና ጌሻዛ
ዋቃና ማላ ኣጋጋካ።

28 ኔ ዴኦ ኦጌ
ታ ኤራና ማላ ኦላዳሳ።
ኔ ታናራ ዲዛ ጊሻስ
ታ ኡፋይሳይ ኩሜላ።)

29 «ታ ኢሻቶ! ቤኒ ኣዋታፔ ዳዊቲ ሃይቂ ዋጌቲዳይሳኔ ኢዛ ዱፎይ ሃቶ ጋካናስ ኦ ኣቻን ዲዛይሳ ባቦንታ ታ ኢንቴስ ዮታና ዳንዳያይስ።

30 ኢዚ ናቤ ጊዲዳ ጊሻስ ጸሲ ኢዛ ዜሬላፌ ኢሳዴ ኢዛ ካዋቴላ ኣልጋ ቦላ ዋላናይሳ ካሴ ጫቆ ቃላን ዮቲዳይሳ ኤሪደስ።

31 ሄሳ ካሴቲዲ ኤሪዳ ጊሻሲኔ ኢዛ ኣሾይ ዋቂ ዱፎን ኣቶንታ ዶሬቲዳ ኪርስቶሳ ዴንላ ጊሻስ ሃሳይደስ።

32 ሄ ዩሱሳ ጸሲ ሃይቆፔ ዴንሊደስ፤ ኦኒካ ወሪ ሃይሳስ ማርካታ።

33 ሄሳ ጊሻስ ኢዚ ጸሳ ኡሻቻን ጾቁ ጾቁ ጊዳፔ ጉዬ ጸሎ ኣያና ኡፋይሳ ሳ ኣዋፔ ኤኪዲ ሃኢ ኣንቴ ቤኢዛይሳኔ ሲዪዛይሳ ዲጌ ጉሲዴስ።

34-35 ዳዊቲ ፑዴ ሳሎ ኬዚቤና፤ ኢዚ ሳ ዶናን፡

«ጎዳይ ታ ጎዳስ፡

ጥ ኔ ሞርኬታ ኔ ቶሆ ጋርሳን

ዬዲሳና ጋካናስ

ታ ኡሻቻን ኡታ» ጊዴስ።

36 «ሄሳ ጊሻስ ጸሲ ኣንቴ ካቂዳ ዬሱሳ ጎዳኔ ኪርስቶሳ ሂስቲዳይሳ ኢሰራኤል ኣሳይ ወሪ ሎኤሉ ኤር» ጊዴስ።

37 ዴሬይ ሄሳ ሲዪዳ ማላ ዎዚናይ ቦሼቲዴስ፤ ጳጵሮሳኔ ሃንኮ ዬሱሲ ኪቲዳይታ፡ «ሂስቲን ኑ ኢሻቶ! ኑ ኣይ ኦሊኖ?» ጊዴ።

38 ጳጵሮሲካ፡ «ማርቲላን ጌሊቲ፤ ኣንቴ ናጋራይ ማሬታና ማላ ኣንቴፌ ኢሲ ኢሲ ኣሲ ዬሱስ ኪርስቶሳ ሱንላን ጸማቂቲቲ፤ ኢዚ ኢሚዛ ጸሎ ኣያና ኣንቴ ኤካና።

39 ኡፋይሳ ቃላይ ኣንቴሲኔ ኣንቴ ናይታሳ፤ ቃሴካ ጎዳ ጸሲ ባኮ ጳይጊዛ ሃሆን ዲዛይታሳራ ኡባሳ» ጊዴስ።

40 ሃራ ዳር ቃላራ ኢስታስ ማርካቲሹ፡ «ሃይሳ ጌላ ዬሌታፔ ኣንቴና ኣሺቲ» ጊዲ ኢስታ ቆፍሲዴስ።

41 ሄ ጋላስ ቃላ ኤኪዳይቲኔ ጸማቂቲዳይቲ ሄቩ ሺ ማላ ኣሳይ ካሴይታ ቦላ ጉጃቲዴስ።

42 ኢስቲካ ሃዋሬታ ቲሚርቲን፡ ኢሲፌ ቁማ ሙሳኒኔ ዎሳን ሚኒዳ።

43 ሃዋሬታ ኩሹን ዳር ማላታቲ ኦሴቲዳ ጊሻስ ኣሲ ኡባይ ኢስታስ ባቢዴስ።

44 ኣማኒዳይቲ ወሪካ ኢሲፌ ዴኢዳ፤ ባስ ዲዛዚካ ኡባ ኢሲ ቦላ ጎኤቲዳ።

45 ባስ ዲዛ ሚሼኔ ሜሄ ባይዚ ባይዚ ባ ጊዶን ኮሺዳ ማላ ጊሹቹዳ።

46 ጋላስ ጋላስ ጸሳ ኬላን ኢሲፌ ሸቂቲስ፤ ባ ኬላንካ ቁማ ኢሲፌ ኡፋይሳኒኔ ሱሬ ዎዚናን ኢሲፌቲላን ሜቲስ።

47 ኢስቲ ጸሳ ጋላቲሹ ዴሬ ሲንላን ቦንቹቲዳ። ጎዳይካ ኢስታ ቦላ ጋላስ ጋላስ ኦራሐ ኣማኒዛይታ ጉጂዴስ።

3

ጴጥሮስ፣ ፓውሎስና ቶሞስ ስላ ኣዳዘ

¹ ኢሲ ዋዴ ጋላሳፊ ኡዲፋን ሳቲ ቦላ ጴጥሮስን የሃኒሲ ዋሳ ሳቲን ጸሳ ኬፍ ባና ኬዚዳ።

² ኢሲ ዩሌቶሶፔ ዶሚዲ ቶሞይ ሲሊዳዴ ጸሳ ኬፍ ጌሊዛ ኣሳፔ ሚሼ ዋሳና ማላ ኣሳይ ጋላስ ጋላስ ቶኪ ኤፊዲ ዋሊን፤ «ሎኦ» ጌቲቲዛ ጸሳ ኬፋ ፔንጌን ዋሲዛዴይ ዴስ።

³ ኢዚካ ጴጥሮስን የሃኒሲ ጸሳ ኬፍ ጌሊሺን በኢዲ ኢስታፊ ሚሼ ዋሲዴስ።

⁴ ጴጥሮስን የሃኒሲ ኢዛ ቲሺ ሂስቲ ዴሊዳ። ጴጥሮስካ ኢዛ፤ «ኣኔ ሃ ኑና ዴላ» ጌዴስ።

⁵ ኣዴዚካ ኢስታፊ ኣይኮ ዴማና ጌዲ ኢስታ ቲሺ ሂስቲ ዴሊዴስ።

⁶ ጌዶ ኣቲን ጴጥሮስ ኢዛስ ዛሪዲ፤ «ታስ ቢራይኔ ዋርቃይ ዴና፤ ጌዲኮካ ታስ ዲዛዝ ታ ኔስ ኢማይስ፤ ናዚሬቲ ዩሱስ ኪርስቶስ ሱንፋን ዴንዳዳ ኔ ቶሞራ ሂማታ» ጌዴስ።

⁷ ኢዛስ ኡሻቻ ኩሼ ኦይኪዲ ዴንፊዴስ። ሄራካ ኣዴዛ ቶሞይኔ ቶሞ ቂርጶይ ሚኒዴስ።

⁸ ጉፒ ዴንዲ ኢቂዲ ሂማላ ኦይኪዴስ። ያኔ ሃ ሂማቲሼኔ ጉፒሼ ጸሳካ ጋላቲሼ ኢስታራ ኢሲፊ ጸሳ ኬፋ ጌቤ ጌሊዴስ።

⁹ ኢዚ ጸሳ ጋላቲሼ ያኔ ሃ ሲማሬቲሺን ኣሳይ በዪዴስ።

¹⁰ ሃይሳዴይ ሃይሳፊ ካሴ፤ «ሎኦ» ጌቲቲዛ ጸሳ ኬፋ ፔንጌን ኡቲዲ ሚሼ ዋሲዛይ ኢዛ ጌዲዳይሳ ኤሪዴስ። ኢዛ ቦላ ሃኒዳይሳፊ ዴንዲዳይሳን ኣሳይ ኬሂ ማላሌቲዴስ።

ጴጥሮስ ሃሳያ

¹¹ ሃ ፓጺዳ ዋሳንቻይ ጴጥሮስን የሃኒሳኮ ሺጽ ጌዲ ኢስታራ ኦይኬቲ ዲሺን ዴሬይ ዉሪ ማላሌቲዲ ኢስታኮ፤ «ሶሎሞኔ ሲማሬቲላሶ» ጌቲቲዛሶ ዋሳን ዪዴስ።

¹² ጴጥሮስ ሄ ኣሳ በኢዲ፤ «ኢንቴኖ ኢሰራኤሌ ዴሬቶ! ሃይሳን ኣዛስ ማላሌቲቲ? ቃሴካ ሃይሳ ኣዴዛ ኑኒ ኑ ዋልቃን ዋይኮ ኑኒ ኑ ጸሎቴላን ፓውሎስ ሂማቲሲዳ ማላ ቆዲዲ ኑና ኣዛስ ቲሺ ሂስቲ ዴሊቲ?»

¹³ ኑ ኣዋንታ ኣብራሃማንታ፤ ዪሳቃንታ፤ ያቆቤንታ ጸሲ ባ ናዛ ዩሱሳ ቦንቲዴስ። ኢንቴ ቃሴ ኢዛ ሃይቆስ ኣፊ ኢሚዴታ፤ ጸላጸሲ ኢዛ ቢርሻና ኮዪንካ ኢንቴ፤ «ኮዮኮ» ጌዴታ።

14 ጌሻኔ ጸሎዛ አንቴ ካዲዲ ሼምፖ ዋጂዛይሲ ቢርሼታና ማላ ዋሲዳታ።

15 ዴኦ ኢሚዛዴ አንቴ ዋጂዳታ፤ ጊዶ ኦቲን ጸሲ ኢዛ ሃይቆፔ ዴንሊዴሰ፤ ሄሳሰ ኦኒ ማርካ።

16 ሃይሲ አንቴ ቤኢዛይሲኔ አንቴ ኤሪዛይሲ ሚኒ ኤቁዳይ ዩሱሳ ሱንፋን ኣማኒዳ ጊሻሳ፤ አንቴ ዉሪካ ቤኢዛ ማላ ኢዚ ኩሚፋ ፓጻቴላ ዴሚዳይ ዩሱሳ ሱንፋኒኔ ኢዛ ሱንፋን ቤቲዛ ኣማኖና።

17 «ሃኢካ ታ ኢሻቶ! አንቴ ሄሳ ኦሊዳይ አንቴ ሃላቃታ ማላ ኤርንታ ጊዲዳይሳ ታ ኤራይሰ።

18 ጊዲኮካ ኪርሰቶሲ ዋዬ ኤካናይሳ ጸሲ ካሴ ናቤታ ዶናን ሃሳይዳይሳ ፖሊዴሰ።

19 ሄሳ ጊሻሰ አንቴ ናጋራይ ቁጩቲ ጳያና ማላ ማርቴፋን ጌሊቲ፤ አንቴ ቢዛ ኦጌፔ ሲሚቲ፤ ጎዳ ማታፔ አንቴ ኦራጸና ዋዴይ አንቴሰ ያና።

20 ቃሴካ ጸሲ ካሴ አንቴሰ ዶሪ ዋሊዳ ዩሱሰ ኪርሰቶሳ ኢዚ አንቴሰ ዩዳና።

21 ጸሲ ካሴ ጌሻ ናቤታ ዶናን ሃሳይዳይሳ ማላ ሃኒዛይሳ ኡባ ኦራጲሳና ዋዴይ ጋካናሰ ኢዚ ሳሎን ጋምኣናሰ ኮሼሰ።

22 ሙሴይካ፡ «አንቴ ጎዳ ጸሳይ አንቴ ጊዶፌ ታ ማላ ናቤ አንቴሰ ዴንፋና። ኢዚ አንቴሰ ዮቲዛይሳ ሲዪቲ።

23 ሄ ናቤዛ ሲዮንታ ኢዲዳ ሼምፖይ ዉሪ ዴሬ ጊዶፌ ሻኬቲ ጳዮ።»

24 «ቱማፔ ሳሚላፔ ሃ ሲሚን ዴንዲዳ ናቤቲ ዉሪ ሃይታ ዋዴታ ጊሻሰ ሃሳይዳ።

25 አንቴካ ናቤታ ናይታ፤ ቃሴካ ጸሲ ኣብራሃሜሰ፡ «ኔ ዜሬፋን ቢታ ቦላ ዲዛ ኣሲ ዉሪ ኣንጃታና፤ ጊዲ ኢዚ ጫቂዳ ጫቆዛ አንቴ ላታና።

26 ጸሲ ናዛ ዴንሊዳ ዋዴ አንቴና ኢሳ ኢሳ አንቴ ኢታቴፋፌ ዛሪዲ ኣንጃና ማላ ካሴቲዲ አንቴኮ ኪቲዴሰ» ጊዴሰ።

4

ጴጥሮስኔ ዮሃንሲ ኣይሁዳ ዲላታሶ ሺቆ

3:14 ማቶ 27:15-23፤ ማር 15:6-14፤ ሉቃ 23:13-23፤ ዮሃ 19:12-15

3:22

ዛሬ 18:15፤18 3:25 ሜጴ 22:18

1 ጴጽሮሲኔ የሃኒሲ አሳሰ ሃሳያን ዲሺን ቄሴታ * ሃላቃቲኔ ጸላ ከላ ናጊዛይታ ሃላቃይ ቃሴካ ሳዲቃዌቲ ኢስታኮ ዪዳ።

2 ሂስቲዲ ሃዋሬቲ አሳ ታማርሲዛይሳሲኔ ዬሱሳ ባጋራ ቤቲዳ ሃይቂዳይታ ዴንላ ጊሻሰ ሳባኪዛይሳሰ ከሂ ሃንቄቲዳ።

3 ጴጽሮሳኔ የሃኒሳ ጋዴይ ቃሚሺን ኦይኪዲ ዋንታና ጋካናሰ ቃሾ ከላን ኣይሲዳ።

4 ጊዶ አቲን ቃላ ሲዪዳ አሳፔ ዳሪዛ ባጋይ አማኒዴስ፤ አማኒዳ አቱማ አሳ ቆዳይ ጌዴ ኢቻሹ ሺ ጋካናሰ ጶቄ ጊዴሰ።

5 ዋንቴላ ጋላሰ ኢስታ ሃላቃቲኔ ጨማቲ ቃሴካ ሙሴ ዋጋ ታማርሲዛይቲ ዬሩሳላሚን ሺቂዳ።

6 ኢስታ ቄሴታ ሃላቃ ሃናይኔ ቃያፋይ፥ የሃኒሲ፥ ኢስኪንዲሮሲኔ ቄሴታ ሃላቃሶ አሳይ ወሪ ሂን ቤቲዳ።

7 ኢስቲካ ጴጽሮሳኔ የሃኒሳ ባ ጊዶን አሊ ኤሲዲ፥ «ሃይሳ አንቴ ኦሊዛይ ኣዛ ዋልቃኔ? ዋይኮ ኦና ሱንላኔ?» ጊዲ ኦይቺዳ።

8 ሄ ዋዴ ጴጽሮሲ ዲሎ ኣያናን ኩሚዲ፥ «አንቴኖ ዴሬ ሃላቃቶ! ዴሬ ጨማቶ!

9 አንቴ ሃቾ ሃ ቶሆ ሲላ ኣዴዛሰ ኦሴቲዳ ሎኦ ኦሶይ ዋኒ ኢዚ ፓጺዳኮ አንቴ ኦና ኦይቺዛ ጊዲኮ፥

10 አንቴ ካቂን ጸሲ ሃይቆፔ ዴንሊዳ ናዚሬቲ ዬሱሰ ኪርሰቶሳ ሱንላን ኢዚ ፓጺዳይሳኔ አንቴ ሲንላን ኢዚ ኤቂዳይሳ አንቴካ ኢሰራኤሌ ዴሬ አሳይ ወሪ ሃይሳ ኤሪቲ።

11 ኢዚካ አንቴ ከላ ሂላቲ ለቂ ኣጊዳ ሹቻይ ጊምቤ ከላሰ ጉላ † ቦላ ቦላራ ዋሊዛ ሹቾ ጊዲዴሰ።

12 ኣቶቴሊ ሃራ ኦናንካ ባ፤ ሳሎፔ ጋርሳ ባጋራ ኦ አሳ ናይቲ ኣታና ማላ ኦሰ ኢሜቲዳይ ሃይሳፌ ሃራ ሱንሊ ዴና» ጊዴሰ።

13 ኣይሁዳታ ዲላታ ኣሳይካ ጴጽሮሲኔ የሃኒሲ ሄሳዎ ጸሊ ሃሳይዛይሳ ቤኢዲ ኢስቲ ታማሮንታ ኣሰ ጊዲዳይሳ ኤሪዲ ማላሊቲዳኔ ኢስቲ ካሴ ዬሱሳራ ዲዛይታ ጊዲዳይሳ ኣኬኪዳ።

14 ሄ ፓጺዳ ኣዴዚ ኢስታራ ኤቂ ዲሺን ቤኢዳ ጊሻሰ ኢስታሰ ሃራ ኦላናሰ ጋሶይካ ዳይዴሰ።

15 ሄሳ ጊሻሰ ኢስታ ዲላታፔ ከሳና ማላ ኣዛዚዳ። ሄሳፌ ቃሴካ ሺቄቲዲ ባ ጊዶን ዞሬቲዳ።

* 4:1 ቄሴታ፡ ቄሴታ ኢሲ ኢሲ ጌሻ ማጸፋቲ ቄሴታ ሃላቃ ጌቴሰ። † 4:11 ጉላ፡ ጉላ ጊዛይሳ ኢሲ ኢሲ ባጋ ጋዋሶ ቃላን ማጋላ ዋይኮ የቻ ሹቾ ጌቴሰ። 4:11 ማዛ 118:22

16 ባ ጊደን፡ «ሃይታ አሳታ ዋስቲኖ? ዩሩሳሌሙን ዲዛ አሳይ ወሪ ኢስታ ኩሼን ሃኒዳ ጊታ ማላታ ኤሪዳስ። ሄሳ ጊሻስ ኑ ሃ ዮኦዛ አሳ ባሌላናስ ዳንዳዮኩ።

17 ጊደ አቲን ሃይሲ ዮኦዚ ዳሬ ጊደን ኬሂ አኮንታ ማላኔ ሃይቲ አሳቲ ናምኣን፡፡ ሃይሳ ሃ ሱንፋን ሃራ ኦናሰካ ዮቶንታ ማላ ኢስታስ ሎኤሊ ዮታና» ጊደ።

18 ኢስታ ደይጊዲኔ ሙሌካ ዬሱሳ ሱንፋን ሃሳዮንታ ማላኔ ታማርሶንታ ማላ አዛዚዳ።

19 ጴጽሮሲኔ ዮሃኒሲ ቃሴ ዛሪዲ፡ «ኑኒ ጸሳፌ ቦላራ ኢንቴስ አዛዜታናስ ቤሲዛኮ ኣኔ ኢንቴ ጸሳ ሲንፋን ፒርዲቴ።

20 ኑኒ ኑ ቤኢዳይሳኔ ኑ ሲዩዳይሳ ሃሳያናፔ ጉዬ ጎኩ» ጊደ።

21 ቃሴካ ኢስታ ቦላ ማንዲዲ ዬዲዳ፤ ጋሶይካ ሃንኮ ዳሬይ ወሪ ሃኒዳ ዮኦዛ ጋሶን ወሪካ ጸስ ጋላቲዛ ጊሻስ ኢስታ ቃጸያናስ ዳንዳይቤቴና።

22 ሄ ጊታ ማላታን ፓጺዳ አዳዛስ ላይላይ ኦይዱ ታማፌ ቦላ።

23 ጴጽሮሲኔ ዮሃኒሲ ቃሾፔ ቢርሼቲዲ ባ አሳታኮ ሲሚዲ ቄሴታ ሃላቃቲኔ ዳሬ ጨማቲ ኢስታ ጊዳይሳ ኡባካ ዮቲዳ።

24 ኢስቲካ ሄሳ ሲዩዳ ማላ ባ ቃላ ቶቄ ሂስቲዲ ኢሲፌ ጸሳኮ፡ «ዋጋ ጎዳዉ! ኔኒ ሳሎኔ ሳኣ፡ አባኔ አባ ጊደን ዲዛይታ ወርሳ ሜጳዳሳ።

25 ኔ አሸካራ ኑ አዋ ዳዊቲ ዶናራ ጸሎ አያናን፡

« ካዎቲላይ አዛስ

ሃንቄቲ ዳንዲዴ?

ዳሬይ አዛስ ሜላ ማቄቲዜ?

26 ቢታ ካዎቲ ኢሲፌ ጋጊዲ

ቢታ ሃሪዛይቲ

ኢሲ ቦላ ሽቄቲዲ

ጎዳ ቦላኔ ዶሬቲ

ቲዬቲዳይሳ ቦላ ዱላቲዳ)

ጊ ዋሲዳ።

27 «ቲማፔ ሂርዶሲኔ ጸንጾሳ ጸላጸሲ ኢስራኤሌታራኔ ሃራ ዳሬ አሳራ ሃኖ ካታማይን ኔ ዶራ ቲይዳ ጌሻ ናዛ ዬሱሳ ቦላ ዮኦ ቃቻናስ ሽቄቲዳ።

28 ሃይሳንካ ኔ ዋልቃኒኔ ኔ ሽኔን ካሴ ኔ ቆፒዳይሳ ኢስቲ ፖሊዳ።

29 ጎደ! ሃኢካ ኢስታ ማንዴዛ ኔ ቤያ፤ ኑኒ ኔ አይሌቲ ኔ ቃላ ባቦንታ ኩሜላ ጸላቴላራ ዮታና ማላ ዳንዳይሳ።

30 ፓላናስ ኔ ኩሼ ሚጫ። ኔ ና ጌሻዛ ሱንላን ጌታ ማላታ ኦላ» ጌዳ።

31 ኢስቲ ዋሲዳፔ ጉዬ ኢስቲ ዲዛሶይ ቃዲዴስ፤ ወሪካ ጸሎ አያናን ኩሚዲ ጸሳ ቃላ ጸላቴላን ዮቲዳ።

አማኒዛይታ ኢሲፌቴላ ዱሰ

32 አማኒዛይቲ ወሪካ ኢሲ ዋዚናኒኔ ኢሲ ቆፋን ጋጌ ዴቲስ። ኢስታስ ዲዛይ ወሪ ኢሲ ቦላ ዴስ ኣቲን ባስ ዲዛዝ፤ «ሃይሲ ታስ ቡዘ ሚሻ» ጌዛይይ ዴና።

33 ሃዋሬቲካ ጎዳ ዬሱሳ ዴንላ ጌታ ዋልቃን ማርካቴላ ኦይኪዳ፤ ኡባ ቦላ ጌታ ጸሳ ኪያቴላ ዴስ።

34 ኢስታ ጌዶን ሜቶታንቻይ አሳይይካ ዴና፤ ጋሶይካ ጋዴ ጌዲን፤ ኩሌ ጌዲን ባስ ዲዛ ኡባ ባይዚ ባይዚ ሺሺዳ ሚሽ፤

35 ሃዋሬታ ኩሼን ዋሊዲ አሳዴስ አሳዴስ ኢዛስ ኮሺዛ ማላ ጌሹቴስ።

36 ቆጲሮሴ ጌቴቲዛሶን ዲዛ ዮሴፌ ጌቴቲዛይይ ኢሲ ለዌ ባጋ ኣሲ ዴስ፤ ኢዚካ ሃዋሬታን፤ «ባርናባሳ» ጌቴቲ ሱሚዴስ። ሄሳስ ቢርሼላይ፤ «ሚንሌሶ ና» ጉሳ።

37 ኢዚካ ባ ጋዴ ባይዚዳ ሚሻ ኤሂዲ ሃዋሬታ ኩሼን ዋሊዴስ።

5

ሃናኒያኔ ሳጵራ

1 ኢሲ ሃናኒያ ጌቴቲዛ ኣሲ ሳጵራ ጌቴቲዛ ባ ማቼይራ ባ ጋዴ ባይዚዴስ።

2 ማቼያ ሳጵራይ ሎኤላ ኤሪሺን ጋዴዛ ባይዚዳ ሚሻፌ ባጋ ሻኪ አሺዲ ባጋ ኤሂዲ ሃዋሬታ ኩሼን አሚዴስ።

3-4 ቃሴ ጴጵሮስ፤ «ሃይሶ ሃናኒያ! ኔኒ ጸሎ አያና ቦላ ዋርዶታናሲኔ ጋዴዛ ሚሻፌ አሻና ማላ ጸላኤይ አይስ ኔ ዋዚናን ጌሊዴ? ባይዛናፔ ካሴ ጋዴዚ ኔይሳ ጌዴኔ? ኔ ባይዚዳፔ ጉዬ ቃሴ ሚሻይ ኔ ኩሼን ዴኔ? ሂስቲን ኔ ሃይሳ ማላ ዋስታ ኔ ዋዚናን ቆፓዲ? ኔኒ ጸሳ ቦላ ዋርዶታዳሳ ኣቲን ኣሳ ቦላ ጌዴና» ጌዴስ።

5 ሄሳ ሲዪዳ ማላ ሃናኒያይ ኩንዲ ሃይቂዳሰ፤ ሄሳ ሲዪዳ አሳይ ወሪ ዳር ባቢዳሰ።

6 አቱማሳይ ዳንዲዲ አሃ ጸዲዲ ሄራካ ኤፊዲ ሞጊዳሰ።

7 ሄቩ ሳቱፔ ጉዬ ማቼያ ኢዚ ዋኒዳኮ ኤርንታ ዳሼ ያዱሰ።

8 ጴጽሮሲካ፡ «አኔ ታሰ ዮታ፤ አንቱ ጋዴዛ ባይዚዳ ዋጋይ ሃኖ ጸላ?» ጊዳሰ። ኢዛካ፡ «ኤ ሃኖ ሃ ዋጋይን ባይዚዳሰ» ጋዱሰ።

9 ጴጽሮሲካ፡ «አንቱ ጸላ አያና ፓጫናሰ አይሰ ኢሲ ዶና ጊዲዴቲ? ሄኮ ኔ አዚና ሞጊዳ አሳቲ ሞጊ ሰሚዲ ካሬን ፔንጌ ቦላ ዴቲሰ። ኢሰቲ ኔናካ ኬሲ ኤኪ ኤፋና» ጊዳሰ።

10 ኢዛ ሲዪዳ ማላ ሄራካ ኢዛ ቶሆ ቦላ ኩንዲዳ ሃይቃዱሰ። አቱማሳይካ ሶ ጌሊዳ ማላ ሃይቂዳር ቤኢዲ ኬሲ ኤፊዲ ኢዚ አዚና አቻን ኢዞ ሞጊዳ።

11 ኩሜላ ዋሳ ኬላ አሳይኔ ሄሳ ሲዪዳ አሳይ ወሪ ዳር ባቢዳሰ።

ሃዋሬታ ኩሼን ፓጺዳ ዳር አሳ

12 ሃዋሬቲካ ዴሬ ጊዶን ዳር ማላታታኔ ማላሊሲዛ ሚሽ ኦሊዳ፤ አማኒዛይቲ ወሪ፡ «ሶሎሞኔ ሲሜሬቲላሶ» ጌቲቲዛ ፔንጌን ሸቄቲሰ።

13 ኢሰታሰ ባቢዳ ጊሻሰ ኦኒካ ኢሰታራ ዋላኬታናሰ ኮዬቤና፤ ጊዶ አቲን ዴሬይ ኢሰታ ኬሂ ቦንቼሰ።

14 ዳር ማጫሳቲኔ አዴቲ ዋዴፔ ዋዴን ጎዳን አማኒ አማኒ ኢሰታ ቦላ ጉጃቲዳ።

15 ሄሳ ጋሶን ጴጽሮሲ አጲሺን ሃራይ አቲን ኢዛ ኤሾይ ሃርጋንቻታፔ ባጋ ሃርጋንቻታ ቦላ ዋጳና ማላ ሃርጊዛይቲ ኢቺዛ አልጋ ቦላኔ ሃላ ቦላ ካሬን ኢሺሴቲሰ።

16 ዬሩሳላሜ ዩሾን ዲዛ ካታማታፔ ሃርጊዛይታኔ ቱና አያናይ ዋዩሲዛይታ ኤሂን ወሪ ፓጺዳ።

ሃዋሬታ ቦላ ጋኪዳ ጎዴቲሴኔ ዋዩ

17 ሄ ዋዴ ቂሴታ ሃላቃይኔ ኢዛራ ዲዛ ሳዱቃዊታ ባጋይቲ ወሪካ ቃናቲ ቃናቲዛይታ ጸላ ጊዲዳ።

18 ሃዋሬታ ኦይኪዲ ቃሾ ኬሌ ጌልሊዳ።

19 ጊዶ አቲን ጎዳ ኪታንቻይ ቃማራ ቃሾ ኬላዛ ካሬ ዶይዲ ኢሰታ ኬሲዲ።

20 «ቢዲ ጸላ ኬላ ጊቤ ጊዶን ኤቂዲ ሃይሳ ዴኦ ቃላ ኡባ ዴራሰ ዮቲቲ» ጊዳሰ።

21 ጋዴይ ዋንቲዳ ማላ ኢስታስ የቲዳይሳ ጸሳ ከላ ጊቤ ጌሊዲ ዴሬዛ ታማርሶ ኦይኪዳ፤ ቄሴታ ሃላቃይኔ ኢዛራ ዲዛይቲ ዪዲ ኣይሁዳታ ዱላታኔ ኢስራኤሌ ዴሬ ጨማታ ኩማል ኢሲ ቦላ ሺሺዳ፤ ሃዋሬታ ቃሾ ከላፌ ኤኪ ያና ማላ ኣሰ ዬዲዳ።

22 ከቲቲ ቢዳ ኣሳቲ ቢዲ ኢስታ ቃሾ ከላን ዴሚቤቴና፤ ሲሚዲ።

23 «ቃሾ ከላይ ሎኢ ቁልፔቲ ዴሰ፤ ናጊዛይቲካ ፔንጌ ቦላ ኤቂ ዲሺን ኦ በኢዶስ፤ ጊዶ ኣቲን ኦ ዶዪ ጌሊሺን ከላን ኦኒካ ባ» ጊዳ።

24 ጸሳ ከላ ናጊዛይታ ሃላቃይኔ ቄሴታ ሃላቃቲካ ሄሳ ሲዪዳ ማላ ሃናዛን ዳሮ ማላሌቲዳኔ ኢስታስ ሃናይ ዉሪ ቲኪ ጊዴስ።

25 ሄራካ ኢሲ ኣሲ ዪዲ፤ «ሄኮ ኢንቲ ቃሾ ከላ ጌልሊዳ ኣሳቲ ጸሳ ከላ ጊቤ ጊዶን ኤቂዲ ዴሬ ታማርሶን ዴቴስ» ጊዴስ።

26 ጸሳ ከላ ናጊዛይታ ሃላቃይ ባ ኦሳንቻታራ ቢዲ ኢስታ ኦይኪ ኤኪ ዪዴስ፤ ኦይኪ ኤሂዳይቲ ኣሳይ ባና ሹቻራ ጫዶንታ ማላ ባቢዲ ዋልቃጸንታ ሎዳራ ኤሂዳ።

27-28 ሃዋሬታ ኤሂዲ ኣይሁዳታ ዱላታ ሲንላን ኤሲዳ፤ ቄሴታ ሃላቃይካ ኢስታ፤ «ሃይሳ ሃ ሱንላን ኢንቲ ታማርሶንታ ማላ ኢንቲስ ሎኤሊ የቲዶስኮሺን ኢንቲ ኢንቲ ቲሚርቲዛ ዬሩሳላሜ ኡባን ኩንሌታ፤ ቃሴ ኦናካ ሃ ኣዴዛ ሱላስ ኦይሹቲዛይታ ሂስታናስ ጊጺ ዴንዲዴታ» ጊዴስ።

29 ጴጽሮሲኔ ሃንኮ ሃዋሬቲካ ዛሪዲ፤ «ኦኒ ኣሳፔ ኣሊዲ ጸሳስ ኣዛዜታናስ ቤሴስ።

30 «ኢንቲ ኢዛ ሚላ ቦላ ካቂ ዋዲዳ ዬሱሳ ኦ ኣዋንታ ጸሳይ ኢዛ ሃይቆፔ ዴንሊዴስ።

31 ኢዚካ ኢስራኤሌ ናይታስ ናጋራፔ ሲሚዲ ማሬታና ማላ ጸሲ ኢዛ ኡባፌ ቦላኔ ኣሺዛዴ ሂስቲዲ ባ ኡሻቻን ጶቂ ጶቂ ሂስቲዴስ።

32 ኦኒካ ሃይሳስ ማርካታ፤ ቃሴካ ጸሲ ባሰ ኣዛዜቲዛ ኦናሰካ ኢሚዳ ጸሎ ኣያናይካ ማርካ» ጊዳ።

33 ኣሳቲ ሄሳ ሲዪዲ ኢታ ሃንቆ ሃንቁቲዳ፤ ዋዳናካ ኮዪዳ።

34 ጊዶ ኣቲን ዴሬ ኣቻን ከሂ ቦንቹቲዳ ኢሲ ዋጋ ኣስታማሬ፤ ኢዚካ ጋማልያሌ ጌቲቲዛ ፋርሳቂታ ባጋይ ዴሬ ጨማታ ጊዶን ዴንዲ ኤቂዲ ሃዋሬቲ ጉላ ዋዴ ካሬን ጋምኣና ማላ ኣዛዚዴስ።

35 ዴሬ ጨማታስ፤ «ኢስራኤሌ ኣሳቶ! ኢንቲ ሃይታ ኣሳታ ቦላ ኦላናይሳ ዳሮ ኣከካራ ኦላናስ ቤሴስ።

36 ሃይሳፌ ካሴ ኢሲ ተዋዳሳ ጌቴተዛዴይ ባና ጌታ ኣሰ ሂሰቲ ቆዲ ዴንዲን ኦይዲ ጾቱ ዴሬይ ኢዛ ካሊዴሰ፤ ጌዶ ኣቲን ኢዚ ኣሳ ኩሼን ሃይቂዴሰ፤ ኢዛ ካሊዛይቲካ ጮ ላሌቲን ኢዛ ሃናይ ጮ ማላ ኣቲዴሰ።

37 ኢዛ፤ ጌዬካ ዴሬይ ታይቤቲዛ ዋዴ ጋለላ ዩሁዲይ ዴንዲዲ ዳሮ ዴሬ ባናራ ካሊዲዴሰ። ባና ካሊዛይታካ ዴሚዴሰ፤ ጌዶ ኣቲን ኢዚካ ዳይዴሰ፤ ኢዛ ካሊዛይቲካ ዉሪ ዳይዴ።

38 «ሄሳ ጊሻሰ ታ ሃኢ ኢንቴና ጊዛይ ሃይታ ኣሳታ ኣገቲ፥ ቦቾፍቲ፤ ኢሰታ ቆፋይ ዋይኮ ኢሰታ ኦሶይ ኣሳ፤ ጌዲኮ ዳይና።

39 ጸሳፌ ጌዲኮ ቃሴ ኢንቴ ኢሰታ ቲቃናሰ ዳንዳዬኬታ፤ ኦኔ ኤሪዛይ ኢንቴ ጸሳራ ኦዬቲሼ ቤታናኮ» ጌዴሰ።

40 ኢሰቲካ ኢዛ ዘሪዛ ኤኪዲ ሃዋሪታ ጸይጌዲ ጋራፊሲዳ፤ ናሞኣንላ ዬሱሳ ሱንሳን ሃሳዮንታ ማላ ኣዛዚዲ ዬዲዴ።

41 ሃዋሪቲካ ኢዛ ሱንሳ ጊሻሰ ካዉያናሰ ቤሲዛ ጊሻሰ ዳሮ ኡፋዬቲሼ ዴሬ ጨማታ ኣቻፌ ኬዚ ቢዳ።

42 ጋላሰ ጋላሰ ጸሳ ኬሳኒኔ ኢሳ ኢሳ ኬሳን ዬሱሲ ኢዚ ጸሲ ዶሪዳዴ ጌዲዳይሳ ታማርሶፊኔ ሳባኮ፤ ሙሉካ ጌዬ ጌቤቴና።

6

ላፑን ዳቆኔታ ዶሬቴላ

1 ኣማኒዛይታ ቆዳይ ዳሪ ዳሪ ቢዛ ዋዴ ጌሪኬ ቢታፌ ዩዳ ኣይሁዳ ኣሳቲ ዩሁዳን ዲዛ ኣይሁዳ ኣሳ ጌዬራ ዚጌሬቲዳ፤ ጋሶይካ ኡባ ዋዴ ሚዛ ካላ ጊሻሼ ኣሞኤታ ዉዴቶንታ ኣገዳ ጊሻሳ።

2 ሄሳ ጊሻሰ ኦ ታማኔ ናሞኡ ሃዋሪቲ ኣማኒዛ ሃራታ ኢሲ ቦላ ሺሺዲ፥ «ኦኒ ካላ ጊሻሶን ጌሊዲ ጸሳ ቃላ ታማርሶ ኣጋናሰ ቤሴና።

3 ሄሳ ጊሻሰ ኦ ኢሻቶ! ኢንቴ ጌዶፌ ኤራንቻታ፥ ጸሎ ኣያናን ኩሚዳይታኔ ሎኦ ማርካቴላ ዲዛ ላፑን ኣሳታ ዶሪቴ፤ ሃይሳ ኣላፊቴላ ኦ ኢሰታሰ ኢማና።

4 ኦኒ ጌዲኮ ዋሳኒኔ ቃላ ዮቶን ሚናና» ጌዴ።

5 ኢሰቲ ጌዳ ዮኦይ ሲዩዳይታ ኡፋይሲዴሰ፤ ኣማኖኒኔ ጸሎ ኣያናን ኩሚዳይቲ ኢሰቲፋናሴ፥ ፒሊጸሳ፥ ጸርሰቆሮሳ፥ ኒቃርና፥ ጸሞና፥ ጳርሜናኔ ዩሁዳቴሳን ጌሊዳ ኣንጾኪያ ዴሬ ኣሰ ኒቆሎሳ ዶሪዴ።

6 ሃይታ ኤሂዲ ሃዋሪታ ሲንላ ሺሺዲ። ኢሰቲካ ባ ኩሼ ኢሰታ ቦላ ዋሊዲ ኢሰታሰ ዋሲዴ።

7 ጸሳ ቃላይ እኪ እኪ ቢዳስ፤ አማኒዛይታ ቆዳይ ዬሩሳላሜን ዳሪ ዳሪ ቢዳስ፤ ቁሴታፔ ዳርቲ አማኒዳ።

ኢስቲፋኖሴ ኦይኬቴል

8 ሄ ዎዴ ኢስቲፋኖሴ ጸሳ ኢሞቴላኒኔ ዎልቃን ኩሚዲ ዴሬዛ ጊዶን ጊታ ማላሊሲዛ ማላታታ ኦሴዳስ።

9 «ዎዜቲ ኬዚዳ» ጌቲቲ ጼይጌቲዛሶፔ አይሁዳታ ዎሳ ኬላፌ ዪዳ አስ ጊዲዳ ቃሬናፔኔ ኢስኪንዲሪያፔ፤ ቃሴካ ኪልቂያፔኔ ኢሲያ አወራጃታፔ ዪዳ አሳቲካ ወሪ ኢስቲፋኖሴራ ማርሼቲዳ።

10 ጊዶ አቲን ኤራቴላን ኢዚ ሃሳይዛ ሃሳያኔ ኢዛን ዲዛ እያና ኤቄታናስ ዳንዳይቤቴና።

11 ሄሳ ጊሻስ፡ «ኢስቲፋኖሴ ሙሴኔ ጸስ ጫዪሺን ኑ ሲዪዶስ» ጊዛ አሳታ ጉዬራ ጊግሲዳ።

12 ሄ ዎዴ ዴሬዛ፡ ዴሬ ጨማታኔ ዎጋ ታማርሲዛይታ፡ ዴንሴሴዲ ኢስቲፋኖሴ ኦይሴዲ ዴሬ ዱላታኮ ሺሺዳ።

13 ኢዛ ቦላ «ሃይሲ አዴዚ ሃይሳ ጸሳ ኬላ ቦላኔ ዎጋ ቦላ ጫሻ ቃላ ሃሳያ ሙሴካ አጊቤና።

14 ጋሶይካ ሃይሲ አዴዚ፡ «ናዚሬቴ ዬሱሲ ሃይሳ ጸሳ ኬላ ጳይሳና» ጊሺኒኔ ኩ ሙሴፔ ኤኪዳ ዎጋ ላማና» ጊ ሃሳይሺን ኑ ሲዪዶስ» ጊ ዎርዶራ ማርካቲዛ አሳታ ሺሺዲ ማርካሲዳ።

15 ዱላታ ኡቲዳ አሳይ ወሪ ኢስቲፋኖሴ ቲሺ ሂስቲ ጸሊሺን ኢዛ አይፌሶይ ኢስታስ ኪታንቻ አይፌሶ ሚሳቲ ቤቲዳስ።

7

1 ቁሴታ ሃላቃይ ኢስቲፋኖሴ፡ «ሃይሲ ኔ ቦላ ሸቂዳ ዮኦዚ ቱሜ?» ጊ ኦይቺዳስ።

2 ኢስቲፋኖሴካ፡ «ታ አሻቶ! ታ አዋቶ! ታ ጊዛይሳ ሲዩቲ! ኑ አዋ አብራሃሜይ ካራኔ ጌቲቲዛሶ ያናፔ ካሴ ቡሮ ሜስጴጶሚያን ዲሺን ቦንቸ ጎዳይ ኢዛስ ቆንጨዲ፡

3 ኂ ዴሬፔኔ ኔ ዳቦፌ ሻኬታዳ ታ ኔና ቤሲዛሶ ባ» ጊዳስ።

4 ኢዚካ ካላዳዌታ ቢታፌ ኬዚዲ ካራኔ ጌቲቲዛ ቢታን ኡቲዳስ። ኢዛ አዋይ ሃይቂዳፔ ጉዬ ኢንቴ ሃኢ ዲዛሶ ሃ ዴሬ ኢዛ ኤሂዳስ።

5 ሃራይ አቶሺን ኢሲ ቶሆይ ኤቂዛ ጋዴይ ኢዛስ ሃይሳፌ አሜቲቤና፤ ጊዶ አቲን ሄ ዎዴ ኢዛስ ኢሲ ናይካ ባይንዳ ዲሺን

ኢዚኔ ኢዛፔ ጉዩን ኢዛ ዜሬሊ ቢታዮ ላታና ማላ ጸሲ ኢዛሰ ጫቂደሰ።

⁶ ቃሴካ ጸሲ ኢዛሰ፤ ሓ ዜሬሊ ኣላጋ ቢታን ቤቲ ኣሰ ጊዳና። ኢይዱ ጸቱ ላይሳ ኣይሌቲላ ቃምባራ ጊዶን ዋዩታና።

⁷ ጊዶ ኣቲን ኢሰታ ኣይሌ ማላ ሃሪዛ ዴሬ ታ ቃጸያና፤ ሄሳፌ ጉዩ ኢሰቲ ሄ ቢታፌ ኬዚዱ ሃኖ ሃ ሶሆዪን ታሰ ጎይናና ጊዴሰ።

⁸ ሄሳፌ ጉዩ ቃጸራ ዎጋ ጫቆ ኢዛሰ ኢሚዴሰ፤ ኣብራሃሚይካ ዪሳቃ ዩሊዱ ኢዛ ኦስፑንላ ጋላሰ ቃጸሪዴሰ፤ ዪሳቃይካ ያቆቤ ዩሊዴሰ፤ ያቆቤይካ ታማኔ ናምኡ ቆሞታ ዩሊዴሰ።

⁹ «ሄ ቆሞታ ኣዋቲ ዮሴፌ ቦላ ቃናቲዱ ኢዛ ኣይሌቲላሰ ዱጌ ጊብጼ ባይዚዳ፤ ጊዶ ኣቲን ጸሲ ኢዛራ ዴሰ።

¹⁰ ሜቶ ኡባፌ ኢዛ ኣሺዴሰ፤ ጊብጼ ካዎ ፓርኔ ሲንላን ቦንቾ ኢሚዴሰ፤ ፓርኔይ ኢዛ ጊብጼ ቢታኒኔ ባ ኬላ ኣሳ ኡባ ቦላ ኣላፌቲላን ሹሚዴሰ።

¹¹ «ሄ ዋዴ ካናኒኒኔ ጊብጸን ዳሮ ሜቶ ኤሂዳ ጌታ ኮሻይ ዴንዲዴሰ። ኑ ኣዋታሰካ ሚዛ ካሊ ጳይዴሰ።

¹² ያቆቤይ ጊብጼ ዴሬን ካሊ ዲዛይሳ ሲዱዲ ኑ ኣዋታ ኮይሮ ጊብጼ ዩዲዴሰ።

¹³ ኢሰቲ ናምኣንሶ ቢዛ ዋዴ ዮሴፌይ ኢዚ ኦናኮ ባና ባ ኢሻታሰ ቆንጨሲዴሰ። ፓርኔይካ ዮሴፌ ኢሻታ ኤሪዴሰ።

¹⁴ ሄሳፌ ጉዩ ዮሴፌይ ከቲዱ ባ ኣዎ ያቆቤኔ ላፑን ታማኔ ኢቻሹ ጊዲዛ ባ ዳቦታ ኩሚሳ ኤሂሲዴሰ።

¹⁵ ያቆቤይ ዱጌ ጊብጼ ዎጲዴሰ። ኢዚካ ኑ ኣዋቲካ ዉሪ ሄን ሃይቂዳ።

¹⁶ ኢሰታ ኣሃይካ ሴኬሜ ጌቲቲዛሶ ኤፊን ኣብራሃሚይ ኤሞሬ ናይታፔ ባ ሚሻን ሻሚዳ ዱፎን ሞጌቲዴሰ።

¹⁷ «ጸሲ ኣብራሃሚሰ ጫቂዳ ቃላይ ፖሌቲዛ ዋዴይ ማቲሺን ጊብጸን ዲዛ ኑ ኣሳ ቆዳይ ዳሪ ዳሪ ቢዴሰ።

¹⁸ ሄሳፌ ጉዩ ጊብጼ ቢታን ዮሴፌ ኤሮንታ ሃራ ካዎይ ካዎቲዴሰ።

7:5 ሜዴ 12:7፤ 13:15፤ 15:18፤ 17:8 7:6 ሜዴ 15:13-14 7:7 ከሳ 3:12 7:8 ሜዴ 17:10-14፤ 21:2-4፤ 25:26፤ 29:31—35:18 7:9 ሜዴ 37:11፤ 37:28፤ 39:2፤21 7:10 ሜዴ 41:39-41 7:11 ሜዴ 42:1-2 7:13 ሜዴ 45:1፤ 45:16 7:14 ሜዴ 45:9-10፤17-18፤ 46:27 7:15 ሜዴ 46:1-7፤ 49:33 7:16 ሜዴ 23:3-16፤ 33:19፤ 50:7-13፤ ኢያ 24:32

19 ኢዚካ ኑ አሳ ባ ጌኔ ኦሶን ማቶሊዳስ፤ ቡሮ ዩሌቲዳ ጉላ ናይቲ ሃይቃና ማላኔ አሳይ ዩሊዳ ናይታ ካሬ ኬሲ ዋራ ዩጋና ማላ ዋለቃሊዳስ።

20 ሄ ዋዴ ሙሴይ ዩሌቲዳስ፤ ኢዚካ ጸሳ አቻን ዶሴቲዳ ማላ ሎኦ ና ጊዲዳስ፤ ባ አዋ ኬላን ሄቩ አገና አልኢሶን ዲጨዳስ።

21 ኢዚ ዋራ ዩጌቲዳ ዋዴ ካዋ ፓሮኔ ማጫ ናያ ዴማዳ ባስ ኤካዲስ፤ ባ ና ማላ ኦላዳ ዲቻዲስ።

22 ሙሴይካ ገብጾታ አቶ ኤራቴላ ኡባ ታማርዳስ፤ ዮኦን ኤራ፤ ኦሶንካ ሚኖ ጊዲዳስ።

23 «ሙሴ ላይላይ ኦይዲ ታሙ ጊዲዳ ዋዴ ባ ኢሻታ ኢስራኤሌ ናይታ ቤያናስ ባ ዋዚናን ቆፒዳስ።

24 ኢዚካ ኢሲ ገብጾ አሲ ሙሴ ባጋ አሳፔ ኢሳዴ ቦላ ቆሆ ጋሊሺን ቤኢዲ ባ ባጋ አዴዛ ማዲዳስ፤ ገብጾ አዴዛ ዋዲዲ ቆሄቲዳይሳ ሃሎ ኬሲዳስ።

25 ሙሴስ ጸሲ ኢዛ ኩሼን ኢስታ ዋዛናይሳ ኢዛ አሳይ አኬኪዛ ሚሳቲዳስ፤ ገዳ አቲን ኢስቲ ሄሳ ዩሺ ቆፒቤቲና።

26 ዋንቴላ ጋላስ ቃሴካ ኢስራኤሌ ናይታፔ ናምኣቲ ባ ገደን ኦዬቲሺን ጋኪዲ ኦዬቲዛይታ ገገሳናስ ኮዬዲ፤ «ሃይቶ አሳቶ! ኢንቴ ኢንቴ ጋርሳን ኢሶይ ኢሳራ ኢሻንታ፤ ኢንቴ ዋኒዲ ኢሶይ ኢሳ ቆሄቲ?» ገዴስ።

27-28 «ባ ላጌዛ ቦላ ቆሆ ጋሊዳይሲ ሙሴ ሱጊ ዩጊዲ፤ «ኔና ኑ ቦላ ኑና ሃሪዛዴኔ ኑ ቦላ ፒርዲዛዴ ኦሊ ሹሚዳይ ኦኔ? ዋይኮ ቃማ ገብጾ አዴዛ ዋዲይሳሶ ታናካ ዋዳና ኮያይ?» ገዴስ።

29 ሙሴይ ሄሳ ሲዬዳ ማላ ሚዲያሚ ቢታ ቤቲዲ ሄን ቤቲ አሰ ገዲ ዴኢዳስ፤ ያንካ ናምኡ አቱማ ናይታ ዩሊዳስ።

30 «ሄሳፌ ኦይዲ ታሙ ላይላፌ ጉዬ ሲና ዙማ አቻን ዲዛ ባዞ ቢታን ቄሪ ዋራ ገደን ኤጺዛ ታማ ላጮን ኪታንቻይ ኢዛስ ቤቲዳስ።

31-32 ሙሴይካ ኢዛ ቤኢዳ ማላ ማላሌቲዳስ፤ አዛኮ ሻኪ ኤራናስ ኢዚ ሄ ኢዛኮ ሺቂሺን ጎዳ ቃላይ፤ «ታኒ ኔ አዋንታ ጸሳ፤ አብራሃሜ፤ ዩሳቃኔ ያቆቤ ጸሳ» ገሺን ሲዬዳስ። ሙሴይካ ዳሮ ዳጋሚዳስ፤ ጸላናስካ ጸሊቤና።

33-34 «ጎዳይካ ኢዛስ፤ «ሃይሲ ኔ ኤቂዳሶይ ጌሻሶሆ ገዲዳ ገሻስ ኔ ቶሆፔ ጫማ ሾዳ፤ ገብጾን ዲዛ ታ ዴፊታ ዋዬ ታ

ቱማፔ ቤያዲሰ፤ ኢስቲ ዋሲዛ ዋዬ ዋሶዛ ታ ሲያዳ ኢስታ አሻናሰ ዋዳዲሰ፤ ሃኢካ ኔ ሃ ያ፤ ታ ኔና ዱጌ ገብጾ ዛራዳ ኪታና፡ ገዳሰ።

35 «ሂስቲን ሄይቲ፥ ሉባ ኔና ሃሪዛዴኔ ፐርዲዛዴ ሂስቲ ኦኒ ሹሚዳ?» ገዲ አሳይ ካሴ ካዲዳ ሙሴ ጸሲ ቄሪ ዋራ ገደን ኢዛሰ ቤቲዳ ኪታንቻዛ ባጋራ ኢስታ ሃሪዛዴኔ አሺዛዴ ሂስቲዲ ኢስታኮ ዛሪ ዬዲዴሰ።

36 ኢዚካ ኢስታ ካሌሊዲ ገብጾፔ ኬሲዴሰ፤ ገብጾን፥ ዞኦ አባኒኔ ባዞ ቢታን ኦይዱ ታሙ ላይሰ ዳሮ ማላሊሲዛ ሚሻታኔ ገታ ማላታታ ኢስታሰ ኦሊዴሰ።

37 «ኢስራኤሌ ናይታሰ፥ ሂታ ማላ ናቤ ጸሲ አንቴ ገደፌ ዴንፋና፡ ገዳይሲ ሃይሳ ሙሴኮ!

38 ኢዚካ ሲና ዙማ ቦላ ሃሳይዳ ኪታንቻራኔ ባዞ ቢታን ኦ አዋታራ ዴላታ ገደን ዴሰ፤ ዴኦ ቃላካ ሃ ኦሰ አፋናሰ ኤኪዴሰ።

39 «ኦ አዋቲ ገዲኮ ኢዛራ ኤቄቲዳ አቲን ኢዛሰ አዛዜታናሰ ኮዮንታ ገሻሰ ባ ዋዚናራ ጉዬ ገብጾ ሰሚዳ።

40 አሮኔሰካ፥ ሉ ሰንፋራ ቢዛ ኤቃ ኦሰ ገጊሳ! ኦና ገብጾፔ ካሌሊ ኬሲዳ ሙሴይ ዋኒዳኮ ኦ ኤሮኮ፡ ገዳ።

41 ሄ ዋዴ ማራ ሚሰሌ ሜዲዲ ኤቃሰ ያርሾ ሺሺዳ፤ ባርካ ሜዲዳ ባ ኩሼ ኦሶን ኡፋዬቲዲ ጉፒዳ።

42 «ገደ አቲን ጸሲ ኢስታሰ ዘኮ ዛሪዴሰ፤ ኢስቲ ሳሎ ጸሊንቲታሰ ጎይናና ማላ አሊ አሚዴሰ፤ ሄሲካ ናቤታ ማጸፋን፥
« ሲንቴኖ ኢስራኤሌ ናይቶ!

አንቴ ባዞ ቢታን ኦይዱ ታሙ

ላይሰ ዲዛ ዋዴ

አንቴፌ ያርሾኔ ሙጽዋታ

ታሰ ሺሺ ኤሬቲ?

43 ሃራፔካ አንቴ ጎይናናሶሆ

ኦሊዳ

ኤቃ ሞሎኬ ዲንካናኔ

አንቴ ኤቃ ኤራፋኔ ጌቲቲዛ

ጸሊንቴ ሚሰሌዛ

ጶቄ ጶቄ ሂስቲ ኦይኪዴታ።

ሄሳ ገሻሰ ታ አንቴና

እንቴ ዲዛሶፔ ዴንፋዳ
ባቢሎኔራ አላ ዬዳና
ጌቴቲዲ ጸፌቲዴስ።

44 «ጸሲ ሙሴ ቤሲዳ ለሚሶዛ ማላኔ አዛዚዳይሳ ማላ ካሴቲዳ ጸሲ አሳራ ጋጊዛ ዲንካኔያ ኑ አዋታራ ባዞ ቢታን ዴአዲስ።

45 ኑ አዋቲ ዲንካኔዮ ኤኪዳይሳፌ ጉዬ ጸሲ ኢያሶ ካሌሊን ካሴ ኢስታ ጎዲዳ ዴሬታ ላቲዳ ዋዴ ዲንካኔዮ ኤኪ ጌሊዳ፤ ዳዊቴ ዋዴ ጋካናስ ዲንካኔያ ሄ ቢታን ዴአዲስ።

46 ዳዊቲካ ጸሳ ሲንፋን ቦንቾ ዴሚዲ ያቆቤ ጎዳስ አቆሶ ጊጊናናስ ዋሲዴስ።

47 ጊዶ አቲን ሶሎሞኔይ ኢዛስ አቆሶ ኬጺዴስ።

48-50 «ጊዶ አቲን ዋጋ ጎዳይ አሳ ኩሼይ ኬጺዳ ኬፋን ዴና፤ ሄሲካ ናቤይ ካሴ ጌሻ ማጻፋን ጸፊዳ ማላ፤

« ሳሎይ ታ ኡቲዛ አልጋ፤
ቢታይካ ታኒ ቶሆን ዬዲዛሶ፤
ሂስቲን እንቴ ታሰ
አይ ማላ ኬሌ ኬጾቲ?
ዋይኮ ታ ሼምፓናሶይ
አዋይሴ?
ሃይሳ ኡባ ታ ኩሼይ
ኦሴቤኔ?»

ጌስ ጎዳ ጸሳይ።

51 «እንቴኖ ዋዚና ሙሜቶ! ሃይሳ ቱሌቶ! እንቴካ እንቴ አዋታ ማላ ኡባ ዋዴ ጸሎ አያናራ ኤቄቴታ።

52 ናቤታፔ እንቴ አዋቲ ጎዶንታ ናቤይ ኦኔ? ጸሎዛ ዮሃኒሳ ካሴቲ ዮቲዳ ናቤታካ ዋዲዳ፤ እንቴካ ሃኢ ኢዛ አሊ አሚዴታኔ ዋዲዴታ።

53 ኪታንቻ ባጋራ እንቴስ አሜቲዳ ዋጋ ኤኪዴታ አቲን ናጊቤኬታ» ጊዴስ።

ሹቻን ጫዴቲ ኢስቲፋኖሴ ሃይቆ

54 ዲላታን ዲዛ አሳይ ሄሳ ሲዪዳ ማላ ዳሮ ሃንቄቲዲ ኢዛ ቦላ ባ አቺ ጋርጨዴስ።

55-56 ጊዶ አቲን ኢስቲፋኖሴ ጸሎ አያናን ኩሚዲ ፑዴ ሳሎ ቲሺ ሂስቲ ጸሊሺን ጸሳ ቦንቾን ዬሱሲ ጸሳ ኡሻቻን ኤቄዳይሳ

በኢዲ፡ «ሄኮ ታ ሳሎይ ዶዩቲዳይሳኔ አሳ ናይ ጸሳ ኡሻቻን ኤቂዳይሳ በያይሰ» ገደሰ።

57 ሄ ዎዴ አሳይ ቃላ ቶቁ ሂስቲ ዋሲሼ ባ ሃይሰ ቱጪ ኦይኪዲ ኢዛኮ ኢሲፌ ዎጺደሰ።

58 ኢስቲፋኖሴ ኦይኪዲ ካታማፔ ካሬ ኦሊዳ፤ ሹቻን ጫቶ ኦይኪዳ፤ ሄሲ ወሪ ሃኒሺን ማርካቲካ ባ ማይኦ ሳኦሌ ጌቴቲዛ ፓንላዛ አቻን ዋሊዳ።

59 ኢስቲ ሹቻራ ኢዛ ጫዲሺን ኢስቲፋኖሴ፡ «ታ ጎዳ ዬሱሳ! ታ ሸዎፖዮ ኔኮ ኤካ» ገዲ ዋሲደሰ።

60 ቃሴካ ጉልባቲዲ ቶቃ ቃላን «ጎዶ! ሃይታንታ ናጋራ ቆዶፓ» ገዲ ዋሲደሰ፤ ሄሳ ገዳፔ ጉዬ ሃይቂደሰ።

8

1 ሳኦሊካ ኢስቲፋኖሴ ሃይቆን ኢስታራ ቆፋን ጋገደሰ፤ ሄ ዎዴ ዬሩሳላሚን ዲዛ አማኒዛይታ ቦላ ዋልቃማ ጎዴቲሴ ዴንዲደሰ። ሃዋሬቲ አታፌ አማኒዛይቲ ወሪ ዩሁዳ አወራጃኒኔ ሳማሪያ አወራጃ ኡባን ላሌቲዳ።

2 አያና ኦሶን ሚኒ ኤቂዳ አሳቲ ኢስቲፋኖሴ ሞገዲ ኢዛሰ ዳሮ ዬኪዳ።

3 ሳኦሊ ቃሴ ዋሳ ኬሰ ሳይሳናሰ ገዲ ዴንዲደሰ፤ አማኒዛ አሳ ኢሳ ኢሳ ኬሰ ጌሊዲ ማጫሳታኔ አዴታ ጎቺ ጎቺ ኬሲዲ ቃሾ ኬሰ ጌልሊደሰ።

ፒሊጶሲ ሳማሪያ ዴሬን ማርካቲዳ ሚሺራቾ ቃላ

4 ላሌቲዳይቲ ወሪ ባ ቢዳሶን ቢዳሶን ጸሳ ቃላ ዮቲዳ።

5 ፒሊጶሲካ ሳማሪያ ጌቴቲዛ ካታማ ዎጲዲ አሳሰ ኪርሰቶሳ ሳባኪደሰ።

6 ዳሮ ዴሬይ ፒሊጶሲ ኦሊዛ ማላታ በኢዲ ኢዚ ዮቲዛ ቃላ ዎዚናፔ ሎኤሊ ሲዪደሰ።

7 ቱና አያናቲካ ዳሮ አሳፔ ዋሲ ዋሲ ኬዚዳ፤ ዳሮ ቶሆ ሲላቲኔ ዎበቲካ ፓጺዳ።

8 ሄሳ ገሻሰ ሄ ካታማ አሳይ ዳሮ ኡፋዬቲደሰ።

9 ገዶ አቲን ሄሳፌ ካሴ ሄ ካታማዪን ማሮ ማርቲዲ ሳማሪያ አሳ ዳሮ ማላሊሲዛዝ ኦሊዛ ኢሲ ሲሞና ጌቴቲዛ ማሮይ ዴሰ፤ ኢዚካ ባና ገታ አሳ ማላ ቆዲዛዴ።

10 አሳይ ወሪ ጉላታፔ ጌታታ ጋካናሰ ወሪካ፥ «ሃይሲ አዴዚ ጌታ ዋልቃማ ጌቴቲዛ ጸሳ ዋልቃ» ጊሼ ኢዚ ጌዛይሳ ወርሲ ዋዚናፔ ሲዬሰ።

11 ዳር ዋዴ ባ ማርቴላ ኦሶን አሳ ማላሊሲዳ ጊሻሰ አሳይ ኢዛ ዋዚናፔ ካሊሼ ጋምኢዴሰ።

12 ጌዶ አቲን ፒሊጶሲ ጸሳ ካዋቴላ ጊሻሲኔ ዬሱሰ ኪርሰቶሳ ጊሻሰ ሳባኪዳይሳ ሲዬዲ አማኒዳ ማጫሳይኔ አቱማሳይ ጸማቄቲዴሰ።

13 ሲሞኒካ አማኒዲ ጸማቄቲዴሰ፤ ፒሊጶሳካ ካሊ ቢዲ ሃኒዛ ጌታ ማላታ ቤኢዲ ማላሌቲዴሰ።

14 ዬሩሳላሜን ዲዛ ሃዋሬቲ ሳማሪያ አሳይ ጸሳ ቃላ ኤኪዲ አማኒዳይሳ ሲዬዲ ጴጽሮሳኔ ዮሃኒሳ ኢስታኮ ከቲዳ።

15 ኢስቲካ ሳማሪያ ጋኪዲ አማኒዳ አሳይ ጸሎ አያና ኤካና ማላ አሳሰ ዋሲዳ።

16 ጋሶይካ ሄ ዋዴ ኢስቲ ጮ ዬሱሳ ሱንላን ጸማቄቲዳ አቲን ቡሮ ጸሎ አያናይ ኢስታፌ ኢሳዴ ቦላካ ዋዲቤና።

17 ሄሳ ጊሻሰ ጴጽሮሲኔ ዮሃኒሲ ባ ኩሼ አሳ ቦላ ዋሊን አሳይ ጸሎ አያና ኤኪዴሰ።

18 ሲሞኒካ ሃዋሬቲ ኩሼ ዋሊ ዋሲን ጸሎ አያናይ ኢሜቲዛይሳ ቤኢዲ ጴጽሮሳሲኔ ዮሃኒሳሰ ሚሼ ኤኪ ዬዲ።

19 «ታ ኢዛ ቦላ ታ ኩሼ ዋሊዛዴይ ወሪ ጸሎ አያና ኤካና ማላ ሃይሳ ማላ ጎዳቲል ታስካ ኢሚቲ» ጌን።

20 ጴጽሮሲ ኢዛሰ ዛሪዲ፥ «ጸሳ ኢሞታ ኔ ሚሻን ሻማና ቆፒዳ ጊሻሰ ኔኒ ኔ ሚሻራ ኢሲፌ ጳያ።

21 ኔ ዋዚናይ ጸሳ ሲንላን ሱሬ ጌዶንታ ጊሻሰ ኔሰ ሃይሳ ሃ ኦሶዛን ጊሻይ ዋይኮ ቃዳይ ዴና።

22 ሃይሳ ኔ ኢታቲላ ጊሻሰ ሃኢ ኤሌ ማርቴላን ጌላ፤ ኔ ዋዚና ቆፋ ኔሰ አቶ ጋናኮ ኔሰ ጎዳ ዋሳ።

23 ጋሶይካ ኔኒ ኢታቲላን ኩሚዳይሲኔ ማካላን ቃሼታ ኡቲዳይሲ ታሰ ቤቴሰ» ጌዴሰ።

24 ሲሞኒካ ዛሪዲ፥ «ኢንቲ ጌዳ ዮኦታፔ ኣይኮይካ ታ ቦላ ጋኮንታ ማላ ታሰ ጎዳ ዋሲቲ» ጌዴሰ።

25 ጴጽሮሲኔ ዮሃኒሲ ጎዳ ቃላ ማርካቲዳይሳፌኔ ቆንጨሲ ዮቲዳይሳፌ ጉዬ ዳር ሳማሪያ ጌታታን ሚሺራቾ ቃላ ሳባኪሼ ዬሩሳላሜ ሲሚዳ።

ፒሊጶሲ ጸማቂዳ ቶጵያ ጉንዲላ አዴዛ

26 ጎዳ ኪታንቻይ ፒሊጶሳ «ዳንዳ! ዩሩሳላሜፔ ዱጌ ባጋራ ጌዴ ጋዛ ኤፊዛ ባዞ ኦጌራ ባ» ጌዴስ።

27 ኢዚካ ዳንዳ ቢዴስ፤ ሂንዴኮ ጌቴቲዛ ቶጵያፔ ጌዳዳ ካዎያ ባ ኬፋኒኔ ባ ካዎቴፋን ዱዛ ኡባ ሚሻ ቦላ አላፊቴፋን ዋሊዳ ኢሲ ቶጵያ ዴሬ ጉንዱላ አሲ ኢዛራ ጋጌዴስ፤ ሄ አዴዚ ጶሳስ ጎይናና ዩሩሳላሜ ቢዴስ።

28 ኢዚ ሄፔ ሲሚሼ ፓራ-ጋሬን ኡቲዱ ናቤ ኢሳያሳ ማጻፋ ናባቤስ።

29 አያናይ ፒሊጶሳ፡ «ባ! ጌዴ ፓራ-ጋሬዛኮ ሺቃ» ጌዴስ።

30 ፒሊጶሲካ ኤሶቲዱ ፓራ-ጋሬዛኮ ቢዱ አዴዚ ናቤ ኢሳያሳ ማጻፋ ናባቢሺን ሲዱዱ፡ «ሄሲ ኔ ናባቢዛይሲ ኔስ ጌሊዜ?» ጌዴስ።

31 ጉንዱላ አዴዚካ፡ «ታና ኤሪሲዛ አሲ ባይንዳ ታ ዋስታ ኤሮ?» ጌዴስ። ኢዚካ ጌዴ ኢዛ ጋሬዛን ጌሊዱ ኢዛ አቻን ኡታና ማላ ዋሲዴስ።

32 ኢዚ ናባቢዛ ማጻፋይ፡
«ኢዚ ዶርሳ ማላ

ሹኬታና ላጌቲዴስ፤
ዶርሳ ላቃይ ኢስኬ ቃንጺዛይሳ
ሲንፋን ጮኡ ጊዛ ማላ
ሂሳፉካ ኢዚ ባ ዶና
ፖጊቤና።

33 ባና ካዉሺዱ ፒርዳይ
ባይንዳዴ ጌዳዴስ።

ኢዛ ሼዋፖይ
ቢታ ቦላፌ ዱጌቲዴስ።

ኢዛ ዬሌታ ጊሻስ
ሃሳያና ዳንዳይዛይ
ኦኔ?» ጌስ።

34 ጉንዱላ አዴዚካ ዛሪዱ ፒሊጶሳ፡ «ናቤዚ ሃይሳ ኦና ጊሻስ ጊዜ? ባ ጊሻስ ጊዜዬ? ዋይኮ ሃራ ኣሳ ጊሻስ ጊዜ? ሃያና፡ ታስ ዮታርኪ!» ጌዴስ።

35 ፒሊጶሲካ ባ ዶና ዶይዱ ሄ ማጻፋፔ ዶሚዱ ዬሱሳ ሚሺራቾ ቃላ ጊሻስ ማርካቲዴስ።

36 ኢስቲ ኢሲፌ ቢሼ ሃሊ ዱዛሶ ጋኪዳ፤ አዴዚካ፡ «ሄኮ ሃሊ ሃይሳን ዴስ፤ ሂስቲን ታ ጸማቄቶንታ ማላ ታና ዱጊዛይ ኣዜ?» ጌዴስ።

37 ፒሊጶሲካ፡ «ኔ ኩሜላ ዋዚናፔ አማኒኮ ጸማቂታና ዳንዳያሳ» ጌዴሰ። አዴዚካ፡ «ዬሱስ ከርሰቶሲ ጸሳ ና ጌዲዳይሳ ታ አማናይሰ» ጌዴሰ። *

38 አዴዚ ፓራ-ጋሪዚ ኤቃና ማላ አዛዚን ናሞኣይ ኢሲፌ ሃላን ዋዲን ፒሊጶሲ አዴዛ ጸማቂዴሰ።

39 ኢሰቲ ሃላፌ ኬዚሺን ጸሳ አያናይ ፒሊጶሳ ዴንሲ ኤፊዴሰ፤ አዴዚ ሄሳፌ ጉዬ ኢዛ ቤዪቤና፤ ጌዶ ኣቲን ኡፋይሳን ባ ኦጌ ቢዴሰ።

40 ሄሳፌ ጉዬ ፒሊጶሲ አዛጸኔ ጌቲቲዛሶን ቤቲዴሰ፤ ቂሳሪያ ጌቲቲዛሶ ጋካናሰ ኢዚ ቢዛ ኦጌ ቦላ ካታማ ኡባን ሚሺራቾ ቃላ ሳባኪዴሰ።

9

ሳኦሌ አማኖ

(ሃዋ 22:6-16፤ 26:12-18)

1 ሳኦሊ ጎዳ አማኒዛ አሳ ዋዳናሰ ጨቁቲሺ ቄሴታ ሃላቃኮ ቢዴሰ።

2 ጎዳ ኦጌ ካሊዛይታ ማጫሳታኔ አዴታ ዴሚ ቃቺዲ ዬሩሳላሜ ኤኪ ያናሰ ዳማሰቆ ጌቲቲዛሶን ዲዛ አይሁዳታ ዋሳ ኬላሰ ዳብዳቤ ጸፋና ማላ ቄሴታ ሃላቃ ዋሲዴሰ።

3 ዳማሰቆ ጋካና ማቲሺን ቆፖንታ ሳሎፔ ፖኦይ ኢዛ ዩሾን ፖልኤ ጌዴሰ።

4 ኢዚካ ሄራካ ቢታ ቦላ ኩንዲዲ ሳሎፔ፡ «ሳኦሌ፡ ሳኦሌ፡ ታና አዛሰ ጎዳይ?» ጌዛ ቃላ ሲዪዴሰ።

5 ሳኦሊካ፡ «ጎዶ! ኔ ኦኔ?» ጌዴሰ። ኢዚካ ኢዛሰ፡ «ታኒ ኔ ጎዴሲዛ ዬሱሳኮ!» *†

6 ኔ ሃኢ ዴንዳዳ ጌዴ ካታማ ጌላ፤ ኔ ኦፋናሰ ቤሲዛዝ ኔሰ ታ ዮታና» ጌዴሰ።

7 ሳኦሌራ ኢሲፌ ቢዛ አሳቲ ቃላ ጌሪሰ ሲሳፌ ኣቲን ኦናካ ቤኦንታ ጌሻሰ ባ ዶና ኦይኪ ኤቂዳ።

* 8:37 ኢሲ ኢሲ ጌሻ ማጸፋቲ ታይቦ 37 ቦላ ዲዛ ቆፋ ጉጃቴሰ፤ ኢሲ ኢሰቲ ቃሴካ ቆፋ ኦይኪቤቲና። * 9:5 ኢሲ ኢሲ ጌሻ ማጸፋታ ቢርሸላይ፡ «ቃራ ማሻ ቦላ ኔ ኤቁኮ ቆሄታና» ጌሺን ሃራቲ ቃሴ፡ «ጫዲዛ ቢራታራ ኔ ኤቁቲኮ ኔሰ ሃ ዳራና» ጌሰ። † 9:5 ኢሲ ኢሲ ጌሻ ማጸፋ ቢርሸላቲ ሳኦሊ ኮኮሪዳኔ ያሻቴላን ማላሊቲዲ፡ «ጎዶ! ታ ኔሰ ኣይ ኦፋና ማላ ደሳይ?» ጌዴሰ ጌዛ ቆፋ ጉጃቴሰ። ሄሲካ ሸምፖ 22:10ኔ 26:14 ቦላ ጸፊቲ ቤቲሰ።

8 ሳኦሊ ባ ኩንዲዳሶሆፔ ዴንዲዲ አይፌ ዶዬ ጸሊዛ ዋዴ አይኮካ ዴማናሰ ዳንዳይቤና፤ ሄሳ ጊሻሰ ኢዛራ ዲዛ አሳቲ ኢዛ ኩሼ ኦይኪዲ ካሌሊ ኤኪዲ ዳማሰቆ ኤፊዳ።

9 ሄሹ ጋላሰ ጋካናሰ ቆቂዲ ካል ሃል ቤዪቤና።

10 ዳማሰቆን ኢሲ ሃናኒያ ጌቴቲዛ አማኒዛዴይ ዴሰ፤ ኢዛሰ ጎዳይ አጁታን፥ «ሃናኒያ» ጊዲ ጸይጊዴሰ፤ ኢዚካ፥ «ዬ ጎዶ!» ጊዴሰ።

11 ጎዳይካ ኢዛ፥ «ዴንዳ! ሱሬ ጌቴቲዛ ኦጌይራ ዩሁዳ ጌቴቲዛሶ ባ። ሄን ሳኦሌ ጌቴቲዛ ኢሲ ጸርሴሴ ኢሲ ዋሲሼ ዴሰ፤ ኔ ኢዛ ኮያ ዴማ።

12 ጋሶይካ ሃናኒያ ጌቴቲዛይሲ ሳኦሊ ዲዛሶ ዩዲ ኢዚ ጸላና ማላ ኢዛ ቦላ ባ ኩሼ ዋሊሺን አጁታን ቤዪዴሰ።»

13 ሃናኒያይካ ዛሪዲ፥ «ጎዶ! ሃይሳዴይ ዩራሳላሜን ዲዛ ጌሻታ ቦላ አይ ማላ ኢታ ሜቶ ጋሊዳኮ ታ ዳር አሳፔ ሲያዲሰ።

14 ኢዚ ሃ ዩዳይ ኔ ሱንሳ ጸይጊዛይታ ኡባ ቃቻናሰ ቄሴታ ሃላቃታፔ ጎዳቲል ኤኪዲኮ» ጊዴሰ።

15 ጎዳይካ ኢዛሰ፥ «ኔ ባ! ሃይሲ አዴዚ አይዛቤታ ሲንሳኒኔ ካዋታ ሲንሳን ሄሳቶካ ኢሰራኤሌ ዴሬ ሲንሳን ታ ሱንል ቶካና ማላ ኢዚ ታሰ ዶሬቲዳይሳ።

16 ኢዚ ታ ሱንሳ ጊሻሰ አይ ማላ ዋዬ ቤያናኮ ታ ኢዛ ቤሳና» ጊዴሰ።

17 ሃናኒያይ ቢዲ ኢዛሰ ዮቴቲዳሶ ጌሊዴሰ። ሳኦሌ ቦላ ባ ኩሼ ዋሊዲ፥ «ታ ኢሻ ሳኦሌ ኔ ሃ ዩሺን ኔሰ ኦጌ ቦላ ቆንጨዳ ጎዳ ዩሱሲ ኔ አይፌይ ጸላና ማላኔ ኔኒ ጸሎ አያናን ኩማና ማላ ታና ኔኮ ኪቲዴሰ» ጊዴሰ።

18 ሄራካ ሳኦሌ አይፌፔ ፖቆ ማላይ ፖቂቲ ዋዲን ኢዚ ጸላና ዳንዳይዴሲኔ ዴንዲዲ ጸማቂቲዴሰ።

19 ካሊካ ሚዲ ሚኒዴሰ፤ ኡንዴና ዋዴ አማኒዛይታራ ዳማሰቆን ጋምኢዴሰ።

ሳኦሊ ዳማሰቆኒኔ ዩራሳላሜን ታማርሲዳ ቲሚርቲ

20 ሄራካ ዩሱሲ ጸሳ ና ጊዲዳይሳ አይሁዳታ ዋሳ ኬላታን ታማርሶ ኦይኪዴሰ።

21 ሲዩዳ አሳይ ዉሪ፥ «ሃይሲ ዩራሳላሜን ሃ ሱንሳ ጸይጊዛይታ ዳይሲዛ አዴዛ ጊዴኔ? ቃሴ ኢዚ ሃ ዩዳይ ሄ አሳታ ቃቺ ኤኪ ቄሴታ ሃላቃታኮ ኤፋናሰ ዴኔ?» ጊሼ ማላሌቲዳ።

22 ሳኦሊ ካሴፔ ሚኒ ሚኒ ቢዴሰ፤ ዳማሰቆን ዲዛ አይሁዳታስ ዩሱሲ ኢዚ ጸሲ ከቲዳዴ ጊዲዳይሳ አማንፊሼ አሳ ዶና ኦይፊዴሰ።

23 ዳሮ ጋላሳታፔ ጉዬ አይሁዳቲ ሳኦሊ ዋቋናሰ ዲላቲዳ።

24 ኢዚካ ኢሰታ ቆፋ ኤሪዴሰ፤ ኢሰቲካ ኢዛ ዋቋናሰ ካታማ ጌልፊዛ ኦጌን ጋላሲኔ ቃማ ናጊዳ።

25 አማኒዛይቲ ጊዲኮ ኢዛ ጊዶል ካታማ ዩሾን ዲዛ ማሰኮቴዛሪ ኬሼን ዲጌ ዋፊዳ።

26 ሳኦሊ ዩሩሳላሜ ዩዲ አማኒዛይታራ ዋላኬታና ኮዪን ኢዚ ቱሙ አማኒዛዴ ጊዲዳይሳ ኢሰቲ አማኔቶንታ ጊሻሰ ኢዛሰ ባቢዳ።

27 ጊዶ ኦቲን ባርናባሲ ኢዛ ሃዋሬታኮ ኤፊን ሳኦሊ ኢዚ ዳማሰቆ ኦጌ ቦላ ጎዳ ዋሰቲ ቤኢዳኮ፣ ጎዳይካ ኢዛሰ አይ ዮቲዳኮኔ ዳማሰቆን ዲሼ ኢዚ አይ ማላ ጸላቴላራ ዩሱሳ ሱንላን ሳባኪዳኮ ኢሰታሰ ዮቲዴሰ።

28 ሄሳ ጊሻሰ ሳኦሊ ኢሰታራ ዲዴሰ፤ ዩሩሳላሜን ዩዩ ዩዩ አሳሰ ባቦንታ ጎዳ ሱንላን ታማርሲዴሰ።

29 ጊሪኬ ዴሬፔ ዩዳ አይሁዳታራ ሃሳይሼ ፓላሜቲዴሰ፤ ጊዶ ኦቲን አሳይካ ኢዛ ዋቋናሰ ኮዩዴሰ።

30 አማኒዛይቲ ሄሳ ኤሪዲ ዲጌ ቂሳሪያ ጌቴቲዛሶ ዋፊዲ ጸርሴሴ ዩዲዳ።

31 ሄ ዋዴ ዩሁዲኒኔ ጋሊላን፣ ሳማሪያንካ ዲዛ አማኒዛይቲ ሳሮን ዲዲ ካሴፔ ሚኒዳ፤ ቃሴካ ጸሳ ያሻቴላን ሲሜሬቲሼ ጸሎ አያናን ሚኔቲዳኔ ካሴፔ ቆዳን ዳሪ ዳሪ ቢዳ።

ኤኒያኔ ዶርቃ

32 ጴጽሮሲ ዴሬፔ ዴሬን ዩዩሼ ሊዳ ካታማን ዲዛ አማኒዛይታ ቤያናሰ ዲጌ ዋቋዴሰ።

33 ሄን ኤኒያ ጌቴቲዛይሳ ኦሰፑን ላይል ሂጸን ቃሼቲ ኡቲዳ ኢሲ ጉንዳ አሰ ዴሚዴሰ።

34 ጴጽሮሲካ፣ «ሃይሶ ኤኒያ! ዩሱሰ ከርሰቶሲ ኔና ፓላና፤ ዴንዳዳ ኔ ሂጸ ዴንላ!» ጊዴሰ፤ ኤኒያይ ሄራካ ፑሱኩ ጊ ዴንዲዴሰ።

35 ሊዳኒኔ ሳሮናን ዲዛ አሳይ ዉሪ ኢዛ ቤኢዲ ጎዳን አማኒዴሰ።

36 እየጾ ጌቴቲዛሶን ጸቢታ ጌቴቲዛ እሲ አማኒዛራ ዳወሰ፤
ኢዚ ሱንሳ ቢርሼላ ጊሪኬ ቃላራ፡ «ደርቃ» ጌቴቲሰ፤ ኢዛ ኡባ
ዎዴ ሎኦ ኦሶ ሚና ኦላሽኔ ማንቆታ ማዳሼ ዳወሰ። †

37 ሄ ዎዴ ኢዛ ሃርጋዳ ሃይቂን አሳይ አሃዛ ሜጪ ፑዳ ፖቄን
ኬሲ ዋሏዴሰ።

38 ሊዳይ እየጾሰ ማታ ጊዲዳ ጊሻሰ አማኒዛይቲ ጴጽሮሲ
ሊዳን ዲዛይሳ ሲዪዲ ናምኡ አሳታ ከቲዲ፡ «ኤሌ ሃ ያርኪ!»
ጊ ዋሲዳ።

39 ጴጽሮሲካ ዳንዲዲ ከቴቲዳ አሳታራ ጋኪዳ ዎዴ ኢዛ ፑዳ
ፖቄ ቦላ ኬሲዳ፤ አምኤቲካ ዉሪ ኢዛ ዩዩ አፂ ኤቂዲ ደርቃይ
ፓጻ ዳሼ ኢሰታራ ኦሊዳ ቃሚሳታኔ ማይኦታ ቤሲሼ ዩኪዳ።

40 ጴጽሮሲካ ኡባ አሳ ኪፊሌዛፔ ኬሲዲ ጉልባቲ ዋሲዳሰ።
አሃኮ ሲሚዲ፡ «ሃኔ ጸቢታ ዳንዳ!» ጊዴሰ። ኢዛካ ባ አይፌ
ዶያዳ ጴላዲሰ፤ ጴጽሮሳካ ቤያዳ ዳንዳ ኡታዲሰ።

41 ኢዚካ ኢዚ ኩሼ ኦይኪ ዳንሊዳሰ። አማኒዛይታኔ አምኤታ
ጴይጊዲ ኢዞ ኢሰታሰ ፓሊ ኢሚዴሰ።

42 ሄ ሃሃይ ኩሜላ እየጾን ኤሬቲዴሲኔ ዳሮ አሳይካ ጎዳ
አማኒዳሰ።

43 ጴጽሮሲካ እሲ ሲሞና ጌቴቲዛ ጋልባ ቃጪዛዴራ እየጾን
ዳሮ ዎዴ ዳኢዳሰ።

10

ቆርኖሎሳኔ ጴጽሮሳ

1 ቂሳሪያ ጌቴቲዛ ዴሬን፡ «ጸላኔ ዎታዳራታ» ጌቴቲዛ ኦላ አሳ
ጋርሳን ማቶ ሃላቃ ቆርኖሎሳ ጌቴቲዛይሲ ዴሰ።

2 ኢዚካ ባ ኬላ አሳ ኩሜላራ አያና ሃኖን ሚኖኔ ጸሰ ባቢዛዴ፤
ማንቆታሰካ ዳሮ ሙጽዋታ ኢሚዛዴኔ ዳሮ ዎዴ ጸሰ ዋሲዛ አሳ።

3 እሲ ጋላሰ ጋላሳፌ ኡዱፋን ሳቴ ቦላ ጸሳ ኪታንቻይ ኢዛሰ
ኦጁታን ቤቲዲ ኢዛኮ ዩዲ፡ «ቆርኖሎሳ!» ጊ ጴይጊሺን
ቆንጩን ቤዩዴሰ።

4 ቆርኖሎሲካ ዳጋማራ ቲሺ ሂሰቲ ጴሊሼ፡ «ጎዶ ሃይሲ
ኦዜ?» ጊዴሰ። ኪታንቻይካ ዛሪዲ፡ «ኔ ዋሳይኔ ኔ ሙጽዋታይ
ቆፊታናሰ ፑዴ ጸሳ ሲንሐ ጋኪዴሰ።

5 ኔ ሃኢ አሰ እየጾ ዩዳዳ ጴጽሮሳ ጌቴቲዛ ሲሞና ጴይጊሳ።

6 ኢዚካ አባ ማታን ዲዛ ጋልባ ቃጪዛ ሲሞናሶን ኢማላቴሐ
ዴሰ» ጊዴሰ።

† 9:36 ደርቃ ጉሲ ጊሪኬ ቃላራ፡ «ጌኔሳ ጉሳ»

7 ቆርኖሎሳ ሃሳይሲዳ ኪታንቻይ ኢዛፔ ሻኬቲዲ ቢዳፔ ጉዬ ባ አሽካራታፔ ናሞኦታ ቃሴ ኣያና ዮኦስ ሚኖኔ ኢዛስ ዳሮ ኣማኔቲዛ ዋታዳራታፔ ኢሳ ዴይጊሲዲ፤

8 ኢዚ ቤኢዳይሳ ኡባ ኢስታስ ዮቲዲ ኢዮጼ ከቲዴስ።

ጴጥሮሲ ቤኢዳ ኣጂታ

9 ከቲቲዳ ኣሳቲ ዋንቱፋ ጋላስ ጌዴ ካታማይኮ ማቲሺን ጴጥሮሲ ኡሱፑን ሳቲ ቦላ ዋሳና ፑዴ ፖቄ ቦላ ኬዚዴስ።

10-11 ሄ ዋዴ ኢዚ ጋፊዳ ጊሻስ ቁማይ ቡሮ ካጺሺን ጲስኮ ማላ ሊጲጲ ሂስቲን ኣጂታራ ሳሎይ ዶዬቲን ኢሲ ጌታ ጸጾቲዳ ማይኦ ማላይ ኦይዱ ባጋራ ኦይኬቲዲ ዱጌ ቢታን ዋጂሺን ቤዪዴስ።

12 ሄ ማይኦዛ ቦላ ኦይዱ ቶሆይ ዲዛ ዲማ ዲማ ዶኣቲ ቢታራ ጎሽቲዛ ሜጴቴፋቲኔ ሳሎ ቦላ ፒራጂዛ ካፎቲ ዴቴስ።

13 ሄ ዋዴ፡ «ጴጥሮሳ ዴንዳ ሃይታ ሹካዳ ማ!» ጌዛ ቃላ ሲዪዴስ።

14 ጴጥሮሲ ቃሴ፡ «ጎዶ ሃይሲ ሃኔና! ጌሽ ጊዶንታይሳ ዋይኮ ቱና ሚሽ ታ ሙሌራካ ማ ኤሪኬ» ጌዴስ።

15 ሄ ካሴ ቃላይ ቃሴካ ናሞኦንሶ ኢዛኮ ዪዲ፡ «ጸሲ ጌሺዳይሳ ኔ ቱና ማላ ቆዶፓ» ጌዴስ።

16 ሄሲካ ሄሹቶ ሺሬቲ ሺሬቲ ኢዛኮ ዪዳፔ ጉዬ ማይኦ ሚሳቲዛይሲ ሄራካ ፑዴ ሳሎ ቢዴስ።

17 ጴጥሮሲካ ባ ቤኢዳ ኣጂታዛ ቢርሼፋ ኤራናስ ዳሮ ሜቶቲዲ ኬሂ ቆፋ ቦላ ዲሺን ቆርኖሎሲ ከቲዳ ኣሳቲ ሲሞና ኬፊ ኮዪሼ ዴሚዲ ፔንጌን ኤቂዳ።

18 ቃላ ጶቁ ሂስቲዲ፡ «ጴጥሮሳ ጌቲቲዛ ሲሞኒ ዲዛሶይ ሃይሳን ኣዋኔ?» ጌ ኦይቺዳ።

19-20 ጴጥሮሲ ባ ቤኢዳይሳ ኬሂ ቆፒሺን ጲሎ ኣያናይ ኢዛ፡ «ሄኮ ሄሹ ኣሳቲ ኔና ኮዬቴስ፤ ዴንዳ! ዱጌ ዋጳዳ ኢስታ ዬዲዳይ ታና ጊዲዳ ጊሻስ ሲጴይ ባይንዳ ኢስታራ ባ» ጌዴስ።

21 ጴጥሮሲካ ዱጌ ዋጳዳ፡ «ሄኮ ኢንቲ ኮይዛዴይ ታናኮ! ኢንቲ ዪዳይ ኣዛሴ?» ጌዴስ።

22 ኢስቲካ ኢዛስ፡ «ኦኒ ማቶ ሃላቃ ቆርኖሎሳ ማታፔ ዪዶስ፤ ኢዚካ ጸሳስ ባቢዛ ጲሎ ኣሳኔ ኣይሁዳ ኣሳ ኡባ ማታን ዳሮ ቦንቹቲዳ ኣሳ፤ ኔካ ኢዛ ሶ ባና ማላኔ ኔ ጊዛይሳ ኢዚ ሲያና ማላ ጌሻ ኪታንቻይ ኢዛስ ዮቲዴስ» ጌዳ።

23 ጴጥሮሲካ ኣሳታ ባ ዲዛሶን ሞኪ ኤኪዲ ኣይሲዴስ።

ቆርኖሎሳ ኬፋን ጴጽሮሳ

ጴጽሮሲካ ዋንቴላ ጋላሰ ዴንዲዲ ኢስታራ ቢዴስ፤ ኢዮጴሬ ዪዳ ኢሲ ኢሲ አማኒዛ አሳቲ ኢዛራ ኢሲሬ ቢዳ።

24 ቆርኖሎሲካ ባ ዳቦታኔ ማታ ላጌታ ባ ሶን ሺሺዲ ናኅ ቦላ ዲሺን ኢዚ ናሞኣንሶ ጋላሰ ቁሳሪያ ጋኪዴስ።

25 ጴጽሮሲካ ቆርኖሎሳ ኬፋ ጌሊን ቆርኖሎሲ ኢዛ ሞኪ ኤኪዲ ኢዛ ቶሆ ቦላ ሆኪ ጎይኒዴስ።

26 ጊዶ አቲን ጴጽሮሲ፥ «ታኒካ ኔ ማላ አሳኮ! ዴንዳ» ጊዲ ዴንሊዴስ።

27 ጴጽሮሲካ ኢዛ ሃሳይሲሼ ኢዛራ ሶ ጌሊሺን ዳሮ ዴሬይ ሸቂ ኡቲዳይሳ ቤዪዴስ።

28 ኢዚካ ኢስታስ፥ «አይሁዳ አሲ ሃራ ዴሬ አሳራ ጋኅንታ ማላ ዋይኮ ሃራ ዴሬ አሰ ጊዲዳይታ ማታ ሺቆንታ ማላ ኑ ዋጋይ ዲጊዛይሳ ኢንቴ ኤሬታ፤ ጊዶ አቲን ታ ኦናካ ቱና ዋይኮ ኢዚ ጌሽ ዴና ጎንታ ማላ ጸሲ ታስ ቆንጨሲዴስ።

29 ሄሳ ጊሻስ ታ ጴይጌቲዳ ዋዴ ሄኮ ሲጶንታ ያዲስ፤ ሂስቲን ኢንቴ ታና አዘሲ ጴይጊዳኮ ኤራና ኮያይስ» ጊዴስ።

30 ቆርኖሎሲካ፥ «አይዱ ጋላሳሬ ካሴ ሊኬ ሃኒ ዋዴ ጋላሳሬ ኡዱፋን ሳቲን ታኒ ታሶን ዋሲሺን ቆፖንታ ቦላ ማይኦ ማይኢዳ አሲ ዪዲ ታ ሲንላን ኤቂዲ

31 ታና፥ «ቆርኖሎሳ! ኔ ዋሳይ ሲዬቲዴስ፤ ኔ ማንቆታስ ኢሚዛ ሙጹዋታይ ጸሳ ሲንሐ ጋኪዴስ።

32 ሄሳ ጊሻስ ኢዮጴ ካታማ አሰ ኪታዳ ጴጽሮሳ ጌቲቲዛ ሲሞና ኤሂሳ፤ ኢዚ አባ አቻን ጋልባ ቃጨዛ ሲሞና ኬፋን ኢማላቴሐ ዴስ ጊዴስ።

33 ታኒካ ሄራካ ኔኮ አሰ ኪታዲስ፤ ኔ ዩሳይካ ሎኦ፤ ሂስቲኮ ጎዳይ ኔና አዛዚዳይሳ ኔ ኑስ ዮቲኮ ጸሲ ዮቲዳይሳ ኔፔ ሲያናስ ኑ ዉሪካ ሃይሳን ጸሳ ሲንላን ዶስ» ጊዴስ።

34 ጴጽሮሲካ፥ «ጸሲ ኦናካ ሻኪ ማዶንታይሳ ቱማፔ ታ ኤራዲስ።

35 ጊዶ አቲን ጸሳስ ባቢዛይታኔ ጸሎ ኦፊዛይታ ኡባ ኦና ባጋሬ ጊዲንካ ኢዚ ኤኬስ።

36 ጸሲ ኡባሰ ጎዳ ጊዲዳ ዬሱስ ኪርሰቶሳ ባጋራ ኢሰራኤሌ አሳስ ኪቲዳ ሳርቲላ ሚሺራቾ ኪታይ ሃይሳ።

37 ዮሃኒሲ ጸንቃታ ጊሻስ ሳባኪዳፔ ጉዬ ጋለላፔ ዶሚዲ ኩሚላ ዩሁዳን ሃኒዳይሳ ኢንቴ ኤሬታ።

38 ጸሲ ናዚሬቴ ዩሱሳ ጲሎ አያናኒኔ ዋልቃን ቲይዴሰ፤ ኢዚካ ጸሲ ኢዛራ ዲዛ ጊሻስ ባ ጋኪዳሶን ኡባን ሎኑ ኦሊሼ ጸላኤ ጎዳቴላ ጊዶን ዲዛይታ ኡባ ፓሊዴሰ።

39 «ኢዚ ኣይሁዳታ ዳሬኒኔ ዩሩሳላሜ ካታማን ኦሊዳይሳ ኡባስ ኑ ማርካ፤ ቃሴካ ኣሳይ ኢዛ ሚላ ቦላ ካቂ ዋጂዴሰ።

40 ጊዶ ኣቲን ጸሲ ኢዛ ሄቫንሶ ጋላስ ሃይቆፔ ዴንሊዴሰኔ ኣሲ ኢዛ ቤያና ማላ ኦሊዴሰ።

41 ኢዚ ቆንጨዲይ ኣሳ ኡባስ ጊዶንታ ሃይቆፔ ዴንዲን ኢዛራ ሚዳይታሲኔ ኢዛራ ኡዪዳይታሰ ጸሲ ኮይሮ ዶሪዳ ኑስ ኢዛ ማርካታሳ።

42 ኢዚ ኑ ዳሬዛስ ሳባካና ማላኔ ሃይቂዳይታ ቦላኔ ፓጸ ዲዛይታ ቦላ ፒርዳናስ ጸሲ ሹሚዳይ ኢዛ ጊዲዳይሳ ኑ ማርካታና ማላ ኑና ኣዛዚዴሰ።

43 ኢዛ ኣማኒዳዴይ ወሪ ኢዛ ሱንላን ናጋራ ማሬቲዲ ጌያናይሳ ናቤቲ ኢዛስ ማርካቴቲስ» ጊ ዮቶ ዶሚዴሰ።

44 ጴጽሮሲ ሄሳ ሃሳይሺን ቃላ ሲዪዛይታ ኡባ ቦላ ጲሎ አያናይ ዋጂዴሰ።

45 ቃጸሬቲዳይታ ባጋፌ ጴጽሮሳራ ዪዳ ኣማኒዛይቲ ጲሎ አያና አሞቴሊ ኣይዛቤታ ቦላ ዋጂሺን ቤኢዲ ማላሊቲዳ።

46 ሄሲካ ኢስቲ ዱማ ቃላን ሃሳይሺኒኔ ጸሳ ጋላቲሺን ሲዪዳ ጊሻሳ። ሄ ዋዴ ጴጽሮሲ፤

47 «ሃይቲ ኣሳቲ ኑ ማላ ጲሎ አያና ኤኪዳ ጊሻስ ኢስቲ ሃላን ጸማቂቶንታ ማላ ኢስታ ዲጋናይ ኦኔ?» ጊዴሰ።

48 ሄሳ ጊሻስ ዩሱስ ኪርሰቶሳ ሱንላን ጸማቂታና ማላ ኣዛዚዴሰ፤ ሄሳፌ ጉዬ ጴጽሮሲ ጉላ ዋዴ ኢስታራ ዳና ማላ ዋሲዳ።

11

ጴጽሮሳ ቦላ ሸቂዳ ዋላሳ ቃላ

1 ሃዋሪቲኔ ዩሁዳን ዲዛ ኣማኒዛይቲ ኣይዛቤቲ ጸሳ ቃላ ኤኪዳይሳ ሲዪዳ።

2 ሄሳ ጊሻስ ጴጽሮሲ ፑዴ ዩሩሳላሜ ኬዚን ቃጸሬቲዳ ኣይሁዳፔ ኣማኒዛይቲ ጴጽሮሳ፤

3 «ኔ ቃጸሬቶንታ ኣሳታ ኬል ጌላዳ ኢስታራ ካል ማዳሳ» ጊዲ ዋላሲዳ።

4 ጴጽሮሲ ቃሴ ኢስታስ ጌላና ማላ ማራራ ሂዘጊ ዮቲዴሰ።

5 «ታኒ ኢዮጼ ካታማን ዋሲሺን ጳስኮ ማላ ታና ሊጲጲ ሂሰቲዲ አጃታን ጌታ ማይኦ ሚሳቲዛ ሚሺ ኦይዱ ባጋራ ኦይኬቲዲ ሳሎፔ ታ ዲዛሶ ዋጂሺን ቤያዲሰ።

6 ታ ቲሺ ሂሰታ ጸሊሺን ኦይዱ ቶሆራ ዲዛ ሜሄታ፥ ዋራ ዶኣታ፥ ቢታ ቦላ ጎሼቲዛ ሜጴቴፋታኔ ሳሎ ቦላ ፒራጲዛ ካፎታ ቤያዲሰ።

7 ሄራካ ታና፥ «ጴጽሮሳ ዴንዳ! ሃይሳ ሹካዳ ማ» ጊዛ ቃላ ሲያዲሰ።

8 «ታኒካ፥ ሳዶ ሄሲ ሃኔና፤ ታኒ ቱና ዋይኮ ጌሽ ጊዶንታይሳ ሙሉካ ታ ዶናኮ ሸሻ ኤሪኬ» ጋዲሰ።

9 «ሄ ካሴ ቃላይ ቃሴካ፥ «ጸሲ ጌሺዳይሳ ኔ ቱኒሶፓ» ጊዲ ሳሎፔ ታሰ ዮቲዴሰ።

10 ሄሲካ ሄሹቶ ሸሬቲ ሸሬቲ ዮቴቲዳፔ ጉዬ ወሪካ ሲሚዲ ፑዴ ሳሎ ቢዴሰ።

11 «ቂሳሪያፔ ታኮ ኪቴቲዳ ሄሹ አሳቲ ሄራካ ሄ ሳቴዩን ዪ ጋኪዲ ታ ዲዛ ኬላ ካሬን ኤቂዳ።

12 ታ አይኔ ሲጶንታ ኢሰታራ ባና ማላ ጸሎ አያናይ ታሰ ዮቲዴሰ። ሄ ኡሱፑን አሻቲ ታናራ ኢሲፌ ቢዲ አዴዛ ኬፌ ጌሊዶሰ።

13 ኢዚካ ጸሳ ኪታንቻይ ኢዛ ኬላን ኤቂዲ ኢዛሰ ቤቲዳይሳ፥ «ኢዮጼ ጌቴቲዛሶ አሰ ዬዳዳ ጴጽሮሳ ጌቴቲዛ ሲሞና ጴይጊሳ።

14 ኢዚ ዪዲ ኔናኔ ኔሶ አሳ ኡባ አሻና ቃላ ዮታና» ጊዳይሳ ኑሰ ዮቲዴሰ።

15 «ታኒካ ባዳ ቡሮ ዮቶ ኦይኪሺን ኮይሮ ጸሎ አያናይ ካሴ ኑ ቦላ ዋጂይሳላ ኢሰታ ቦላካ ዋጂዴሰ።

16 ካሴ ጎዳይ ኑሰ ዮቲሼ፥ «ዮሃኒሲ ሃላን ጸማቂዴሰ፤ ኢንቲ ጊዲኮ ጸሎ አያናን ጸማቂታና» ጊዳ ቃላይ ሄራካ ታሰ ቆፊቲዴሰ።

17 ሄሳ ጊሻሰ ኑኒ ጎዳ ዬሱሰ ኪርሰቶሳ አማኒሺን ኑሰ አሚዳ ጸሎ አያና ጸሲ ኢሰታሰ አሚኮ ሂሰቲን ጸሳራ ኤቂታናሰ ታኒ ኦኔ?» ጊዴሰ።

18 ኢሰቲ ሄሳ ሲዪዳ ዋዴ ኢሰታሰ ጊዛዚ ጳዩን ጮኡ ጊ ሲሚዲ፥ «ሃይሳ ማላ ጊዲኮ አይዛቤቲካ ሃ ኦራፋ ዴኑኮ ያና ማላ ጸሲ አሳሰ ማሮቴል አሚዴሰ ጉሳ» ጊዲ ጸሳ ጋላቲዳ።

አንጾኪያን ዲዛ ዋሳ ኬላዮ

19 ኢስቲፋኖሴ ቦላ ዳንዲዳ ጎዴቴላ ጋሶን ላሌቲዳ አማኒዛ አሳይ ቃላ አይሁዳታስ ጸላላ ዮቲሼ ፒንቄ፣ ቆጲሮሴኔ አንጾኪያ ጌቲቲዛሶ ጋካናስ ካንሏ ቢዳ።

20 ቆጲሮሴቴኔ ቃሬናፔ ዪዳ ኢሲ ኢሲ አሳቲ አንጾኪያ ቢዲ ጌሪኬታሰካ ጎዳ ዬሱሳ ሚሺራሾ ቃላ ዮቲዳ።

21 ጎዳ ማዶይካ ኢሰታራ ዴሰ፤ ቆዳን ኬሂ ዳሮ አሳይ አማኒዲ ጎዳኮ ሲሚዴሰ።

22 ሄሳ ዋሬይካ ዬሩሳላሜን ዲዛ ዋሳ ኬላ አሳ ሃይላን ዋጂን ዋሳ ኬላያ ባርናባሳ አንጾኪያ ዬዳዲሰ።

23 ኢዚካ ሄ ቢ ጋኪዲ ጸሲ ባ አጽ ኪያቴሐ ዴራሰ አሚዳይሳ ቤኢዲ ኡፋዬቲዴሲኔ አሳይ ዉሪካ ኩሜላ ዋዚናፔ ጎዳ አማኖን ሚናና ማላ ዘሪዴሰ።

24 ኢዚካ ጸሎ አያናኒኔ አማኖን ኩሚዳ ሎኦ አሳ። ዳሮ ዴሬይ ጎዳ አማኒዲ ጉጃቲዴሰ።

25 ሄሳፌ ካሊዲ ባርናባሲ ሳኦሌ ኮያና ጸርሴሴ ቢዴሰ።

26 ኢዛ ዴሚዲ አንጾኪያ ኤኪ ዬዴሰ፤ ናሞአይካ ሄን ዲዛ ዋሳ ኬላ አሳራ ጌዲዲ ላይሐ ኩሜሐ ዳሮ ዴሬ ታማርሲዳ። ሄን አንጾኪያን አማኒዛይቲ ኮይሮ፣ «ኪርሳኔ» ጌቲቲ ጾይጌቲዳ።

27 ሄ ዋዴ ኢሲ ኢሲ ናቤቲ ዬሩሳላሜፔ ዴጌ አንጾኪያ ዋጂዳ።

28 ኢሰታ ጌዶፌ ኢሶይ አጋቦሳ ጌቲቲዛይሲ ዴንዲ ኤቁዲ ጸሎ አያናይ ኢዛ ቤሲን አላሜ ኡባን ጌታ ኮሻይ ዴንዳናይሳ ዮቲዴሰ። ሄሲካ ኦሮሜ ካዋ ቃላዋዶሳ ቁሳሬ ጌቲቲዛይሳ ካዋቴላ ዋዴ ፖሌቲዴሰ።

29 አማኒዛይቲ ዉሪ ኢሶይ ኢሶይ ባ ዋልቃ ኬና ሚሼ ኬሴቲዲ ዩሁዳን ዲዛ አማኒዛ አሻታ ማዳናስ ቃቺዳ።

30 ማዶ ሚሽ ኬሴቲዲ ባርናባሳኔ ሳኦሌ ኩሼን ጨማታሰ ጋላና ማላ ዬዲዳ።

12

አማኒዛይታ ቦላ ጋኪዳ ጌታ ሜቶኔ ጎዴቴሐ

1 ሄ ዋዴ ካዋ ሄርዶሲ ኢሲ ኢሲ አማኒዛ አሳ ጎዲ ጎዲ ሜቶሏዴሰ።

2 ዮሃኒሳ አሻ ያቆቤ ማሻን ዋጂሲዴሰ።

3 ኢዚ ሄሳ ኦላዲይ አይሁዳታ ኡፋይሲዳይሳ ቤኢዲ ጴጽሮሳካ ኦይሏዴሰ፤ ሄሲካ ሃኒዳይ አይሁዳታስ ኡኬላ ባኣሌ ጌቲቲዛ ባኣሌ ጋላሳ።

⁴ ጴጥሮስገ ቃሾ ከሌ ጌልሊዳፔ ጉዬ ኦይዱ ኦይዱ ዋታዳራተ ታራን ታራን ናጋና ማላ ጊጌቲዳ ዋታዳራታሰ ኢሚዴስ። ኢዚ ሄሳሉ ኦሊዳይ ፓዚጋ ባኣሌይ ኣጲዳ ማላ ኬሲዱ ዴሬይ ፒርዳና ማላ ሺሻናሳ።

⁵ ሄሳ ጊሻስ ጴጽሮላ ቃሾ ከሐ ጌልሊዲ ናጌቲስ፤ ጊዶ አቲን ዋሳ ከሐ አሳይ ኢዛስ ከሂ ሚኖ ዋሳ ዋሲዴስ።

⁶ ሄርዶሲ ጴጽሮሳ ደሬዛ ሲንሐ ሸሻና ቆፒ ኦቲ ዲሺን ሄ
ቃማ ጊደሐ ናምኡ ሳንሳላታን ቃሼቲዲ ናምኡ ዋታዳራታ ጊደን
ኢቺደስ፤ ቃሽ ከላ ናጊዛይቲ ከላ ፔንጌ ቦላ ኤቂ ናጊሺን፡

7 ጎዳ ከታንቻይ እዝጎንታ ቤተደሰ፤ አስተ ዲዛ ከፊሉን ፖኦይ ፖኦደሰ፤ ከታንቻዚካ ጳጳርሳ ሚሌ ቦቺ በጎሏዲ፡ «ኤሌ ደንዳ!» ጌደሰ፤ ሄራካ ሳንሳላታይ እዛ ኩሼፔ ጋደን ዋዲደሰ።

⁸ ከታንቻዚ ኢዛ፡ «ኔ ማይኦ ማይኦ! ጫማካ አላ!» ገን ጴጽሮስካ አዛዘቲዳ ማላ ኦሊዴሰ፤ ቃሴካ ከታንቻይ፡ «ኔ ጋቤ ማይኣዳ ታና ካላ» ገዴሰ።

⁹ ጴጽ ሮሲካ ቃሾ ከላፌ እዛ ካሊ ከዚያ ሰጠ፤ ጊደ ኣቲን እዛሰ ኣጉሞ ቤኢዛ ሚሳቲዳሰ ኣቲን ኪታጎቻዚ ኦሊዛይሲ ቱሙ ጊዱ ዳይሳ ኤሪቤና።

10 ስድሮ ዛቤታቴኔ ናምእንሉ ዛቤታቴ አዲሲ ጌዴ ካታማ ኬሲዛ ኦጌ ሶላ ዲዛ ቢራታ ፔንጋኮ ንኪዲ፤ ፔንጌይካ ባርካ ደዬቲ ዎዲዳሰ፤ ኢሰቲ ኬዚ ቢዳ፤ ኢሰቲ ቁፀ ኦጌ ዲዛር አዲሲ ማላ ኪታንቻዚ ኢዛፔ ሻኬቲዳሰ።

11 ጴጥሮስስ ካሃይ ሲሟሸን፡ «ጎዳይ ባ ከታንቻ ከተዲ ታና ሄርደሳ ኩሽቴኔ ኣይሁዳቲ ታ ቦላ ቆፒዳ ኡባፌ ኬሲዳይሳ ታ ሃኢ ቱማፔ ኤራዲሰ» ገደሰ።

¹² ሄሳ ኣኬኪ ኤሪዳፔ ጉዬ ዳር ኣሳይ ኢሲ ቦላ ሺቄተዲ ዎሲዛ ማርቆስ ጌቴተዛ ዮሃንሳ ኣዮ ማራሚሶ ቢዴስ።

¹³ ኢዚ ሄ ቢዲ ካሬ ፔንጌ ቆጶን ኢሲ ኤሮዶ ጌቴተዛ ጋራዴያ ካሬ ኦኒ ቆጶዛኮ ኤራናሰ ካሬ ማታ ባዲሰ።

¹⁴ ቃላይ ጸጽሮሳይሳ ጊዲዳይሳ ኤራዳ ኬሃ ኡፋዬቲዳ ጊሻሰ ካሬዛ ደዮንታ ዎላን ጉዬ ሲማዳ፡ «ጸጽሮሲ ካሬን ፔንጌ ቦላ ኤቂዳሰ» ጋዲሱ።

¹⁵ አሳይካ ኢዘ፡ «ሃሴ ጎያይ!» ጊዳ፤ ኢዛ ቃሴ ዛራ ዛራ ኢሰታሰ ዮቲን፡ «ሂሰቲኮ ሄሲ ኢዛ ናጊዛ ኪታንቻ ጊደንታ አጌና» ጊዳ።

16 ጴጽሮሲ ቃሴካ ፔንጌ ቆል ጉጂዴሰ፤ ኢስቲካ ፔንጋ ዶይዲ ኢዛ ቤኢዳ ማላ ማላሊቲዳ።

17 ኢዚካ ኢስቲ ጮኦ ጋና ማላ ባ ኩሼን ማላቲ ቤሲዲ ጎዳይ ኢዛ ቃሹሶፔ ዋሰቲ ኬሲዳኮ ሎኤሊ ዮቲዴሰ። «ሃይሳ ወርሲ ያቆቤሲኔ ሃንኮ እማኒዛይታስ ዮቲቲ» ጊዴሰ። ሄሳፊካ ሃራሶ ቢዴሰ።

18 ዋንቱላ ጋላስ ዋንታራ ዋታዳራቲ፥ «ጴጽሮሲ ዋኒዴ?» ጊሼ ባ ጊዶን ቡልኣኬቲዳ።

19 ሄርዶሲ አስ ዩዲ ጴጽሮሳ ኮዩሲዲ ኢዚ ጳይዳ ጊሻስ ናጊዛይታ ሎኤሊ ኦይቺዳፔ ጉዩ ኢስታ ዋቃና ማላ ኣዛዚዴሰ። ሄሳፊ ጉዩ ሄርዶሲ ዩሁዳፔ ዲጌ ቂሳሪያ ዋቋዲ ሄን ኡቲዴሰ።

ሄርዶሳ ሃይቆ

20 ሄርዶሲካ ጸርሴ ኣሳራኔ ሲዶና ኣሳራ ኦሻ፤ ሄ ዴሬ ኣሳይ ካል ዴሚዛይ ሄርዶሳ ዴሬፔ ጊዲዳ ጊሻስ ሄ ዴሬ ካዋ ጴሊዛዴ ቢላስጸሳፔ ማዶ ቃላ ዴሚዳ ማላ ኢሲ ቦላ ጊዲዲ ሄርዶሳራ ማቃዪንፋናስ ኦይቺዳ።

21 ጊጋና ባሬቲዳ ጋላስ ሄርዶሲ ካዋቱላ ማይኦ ማይኢዲ ካዋቱላ አልጋን ኡቲዲ ዴራስ ሃሳይዴሰ።

22 ዴሬዚካ፥ «ሃይሲ ጸሳ ቃላፔ አቲን ኣሳ ቃላ ዴና!» ጊ ዋሲዴሰ።

23 ሄርዶሲካ ጸሳስ ቦንቾ ኢሞንታ ኣጊዳ ጊሻስ ጎዳ ኪታንቻይ ሄራካ ሄርዶሳ ሾጪ ዩጊን ጉጵኒ ሃይቂዴሰ።

24 ጸሳ ቃላይ ጊዲኮ ዲጪዲ ኣኪ ኣኪ ቢዴሰ።

25 ባርናባሲኔ ሳኦሊ ባ ኤኪ ቢዳ ኪታ ፖሊዲ ዩሩሳላሚ ሲሚዲ ማርቆሳ ጌቲቲዛ ዮሃኒሳካ ባናራ ኤኪ ሲሚዳ።

13

ባርናባሲኔ ሳኦሊ ኪቲቱል

1 ኣንጾኪያን ዲዛ ዋሳ ኬላን ናቤቲኔ ኣስታማሬቲ ዴቲሰ፤ ሄይቲካ ባርናባሲኔ ኔጌሬ ጌቲቲዛ ሲሞናራ፥ ቃሬና ዴሬ አስ ሉቂዮሳራ፥ ሄርዶሳራ ኢሲፊ ዲጪዳ ሚናሄራኔ ሳኦሊራ ወሪ ኢሲፊ ዴቲሰ። *

2 ሄይቲ ወሪ ጎዳስ ጎይኒሼኔ ጸሚሹ ዲሺን ጸሎ ኣያናይ፥ «ባርናባሲኔ ሳኦሊ ታ ኢስታ ጴይጊዳ ኦሶስ ታስ ሻኪ ኬሲቲ» ጊዴሰ።

* 13:1 ኔጌሬይ ላቲኔ ቃላ ጊዲሺን ቢርሼላይ ካሬል ጉሳ።

3 ኢስቲካ ጸሚ ዋሲዲ ባ ኩሼ ኢስታ ቦላ ዋሊዳፔ ጉዬ ሞይዚዳ።

ባርናባሲኔ ሳኦሊ ቆጶሮሴ ጌቲቲዛሶን

4 ባርናባሲኔ ሳኦሊ ጸሎ አያና ከታን ዱጌ ሴላወቂያ ዋጂዳ፤ ሄፔካ ማርካቤን ጌሊዲ ቆጶሮሴ ቢዳ።

5 ሳልሚሴ ጌቲቲዛሶ ጋኪዲ አይሁዳታ ዋሳ ኬፋታን ጸሳ ቃላ ሳባኪዳ፤ ማርቆስ ጌቲቲዛ ዮሃኒሲካ ኢስታራ ቢዲ ኢስታ ማዲዳሰ።

6 አባ ጊዶን ዲዛ ቢታ ቆጶሮሴ ጌቲቲዛ ዳሬዮ ሃ ጋጾፔ ሄ ጋጾ ጋካናሰ ካንሉ ኬዚዲ ጳፋ ጌቲቲዛሶ ጋኪሺን ኢሲ አይሁዳ አሳ ሺን ማሮኔ ዋርዶ ናቤ ባር-ዬሱሳ ጌቲቲዛ አሰ ዳሚዳ።

7 ኢዚካ ኢሲ ሳርጎሳ ጳውሎሳ ጌቲቲዛ ዋዚናማ ዳሬ አይሲዛይሳራ ኢሲፌ ዳሰ፤ ሄሲ ዳሬ አይሲዛ አዳዚ ጸሳ ቃላ ሲያና ኮዬዲ ባርናባሲኔ ሳኦሊ ጽይጊሲዳሰ።

8 ማርዚ ኤላማሲ ባ ሱንላ ቢርሼላ ማላ ዳሬ አይሲዛይሲ አማኖንታ ማላ ቆጶናሰ ኮዬዲ ኢስታራ ኤቄቲዳሰ።

9 ጳውሎሳ ጌቲቲዳ ሳኦሊ ጸሎ አያናይ ኢዛን ኩሚን ማርዛ ቲሺ ሂሰቲ ዳሊዲ፤

10 «ኔና ጸሎቴላ ኡባሰ ሞርኬዞ! ጌኔይኔ ኢታቴላ ኔናን ኩሚዳይሶ ሃይሶ ዳቡሎሳ ናዉ! ጎዳ ሱሬ ኦጌ ጌላሴላፌ ሸምፒኪ?»

11 ሄኮ ሃኢ ጎዳ ኩሼይ ኔ ቦላ ዳሰ፤ ኔ ቆቃና፤ ሃኒፌ ጉዬ አርሼ ፖኦ ኢሲኖካ ቤያካ» ጌዳሰ።

ሄራካ ሻሩማይኔ ቆማይ ኢዛ ቦላ ዋጂዳሰ፤ ኩሼ ኦይኪ ባና ካሌላናዳ ኮሺ ያኔ ሃ ጌዳሰ።

12 ዳሬ አይሲዛይሲ ሃ ሃኒዳ ዮኦዛ ቤኢዲ ጎዳ ጊሻሰ ሲዬዳ ቲሚርቲዛን ማላሌቲዲ አማኒዳሰ።

ጲሲዲያ ጌቲቲዛ ዳሬን ባርናባሲኔ ሳኦሊ

13 ጳውሎሲኔ ኢዛራ ዲዛይቲ ጳፋፔ ዳንዲዲ ጲንፊሊያ ጌቲቲዛሶን ዲዛ ጳርጌኔ ጌቲቲዛሶ ማርካቤን ጌሊ ቢዳ፤ ዮሃኒሲ ኢስታፌ ሻኬቲዲ ጉዬ ዬሩሳላሜ ሲሚዳሰ።

14 ኢስቲ ጊዲኮ ጳርጌኔፔ ዳንዲዲ ጲሲዲያ ጊዶን ዲዛ አንጾኪያ ቢዳ፤ ሳምባታ ጋላሰ አይሁዳታ ዋሳ ኬላ ጌሊ ኡቲዳ።

15 ሙሴ ዋጋ ማጻፋቲኔ ናቤታ ማጻፋቲ ናባቤቲዳፔ ጉዬ አይሁዳታ ዋሳ ኬላ ሃላቃቲ፤ «ኑ አሻቶ! አንቲሰ ሃይሳ አሳ ዘራና ቃላይ ዲኮ ሃሳይቲ» ጌዲ ኢስታኮ ኣሴ ዬዲዳ።

16 ጳውሎስካ ዳንዲ ኤቂዲ ባ ኩሼራ ማላቲዲ፥ «ኢንቴና ኢስራኤል አሳቶ! ቃሴካ ኢንቴና ጸሳስ ያዪዛ ኣይዛቤቶ! ሲዪቴ።

17 ሃ ኢስራኤል ዳሬ ጸሳይ ካሴ ኑ አዋታ ዶሪዳስ፤ ኢስቲ ጊብዬ ዳሬን ዲሺን ኢስታ ቶቄ ቶቄ ሂስቲዳስ፤ ባ ዎልቃማ ቄሴራ ሄፔ ኢስታ ኬሲዳስ።

18 ኦይዱ ታሙ ላይል ኩሜል ኢስታ ባዞ ቢታን ዳንዳይዳስ።
†

19 ካናኔ ቢታን ዲዛይታ ላፑን ካዎታ ቆይሲዲ ኢስታ ቢታ ባ ዳሬታስ ጋዴ ሂስቲ ላቲሲዳስ።

20 ሄሲ ዉሪ ፖሌቲዲይ ኦይዱ ዴታኔ ኢቻሹ ታሙ ላይላታ ጊዶና፤ ሄሳፌ ጉዬ ናሴ ሳሜላ ዎዴ ጋካናስ ኢስታ ቦላ ፒርዲዛ ዳናታ ኢሚዳስ።

21 «ሄሳፌ ጉዬ ዳሬይ ባ ቦላ ካዎ ካዎላና ማላ ሳሜላ ዎሲዳስ፤ ጸሳይካ ቢኒያሜ ባጋፌ ቂሴ ና ሳኦሌ ኢስታስ ኢሚዳስ፤ ኢዚካ ኢስታ ኦይዱ ታሙ ላይል ሃሪዳስ።

22 ሳኦሌ ሻሪዳፔ ጉዬ ዳዊቲ ካዎሊዳስ፤ ኢዛ ጊሻስ፥ ታ ዎዚና ማላ ሃኒዛይሳኔ ታ ኮዪዳይሳ ኡባ ኦሊዛ ኢሴዬ ና ዳዊቲ ታ ዴማዲስ) ጊዲ ዳዊቲ ጊሻስ ጸሲ ማርካቲዳስ።

23 ጸሲካ ባ ጫቆ ቃላሶ ሃ ኣዴዛ ዜሬላፌ ኣስ ኣሺዛይሳ ዬሱሳ ኢስራኤሌስ ኤሂዳስ።

24 ዬሱሲ ያናፔ ካሴ ዮሃኒሲ ኢስራኤል ዳሬይ ዉሪ ማርቲላን ጌሊዲ ጸማቂታና ማላ ሳባኪዳስ።

25 ዮሃኒሲ ባ ከቲቲዳይሳ ፖሎ ቦላ ዲሼ፥ ታ ኢንቴስ ኦና ሚሳታዚና? ታ ከቲቲዳይሳ ጊዲኬ፤ ሃራይ ኣቶሺን ታ ኢዛስ ቶሆ ጫማ ኪሬ ቢርሻናስ ቤሶንታይሲ ታፔ ጉዬራ ያና) ጊዳስ።

26 «ኢንቴና ኣብራሃሜ ዜሬላፌ ዬሌቲዳ ኑ ኢሻቶ! ቃሴካ ኢንቴ ጊዶንካ ጸሳስ ያዪዛይቲ ዉሪ ሃይሲ ኣቶቴላ ኪታይ ከቲቲዳይ ኑስ ኡባታሳ!

13:17 ኬሳ 1:7፤ 12:51 † 13:18 ዳንዳይዳስ፡ ዳንዳይዳስ ኢሲ ኢሲ ገሻ ማጻፋቲ ኢስታ ሎኤሊ ኦይኪዳስ ጌቲስ። 13:18 ታይ 14:34፤ ዛሬ 1:31

13:19 ዛሬ 7:1፤ ኢያ 14:1 13:20 ዳኔ 2:16፤ 1ሳሜ 3:20 13:21 1ሳሜ 8:5፤ 10:21 13:22 1ሳሜ 13:14፤ 16:12፤ ማዛ 89:20 13:24 ማር 1:4፤ ሉቃ 3:3 13:25 ዮሃ 1:20፤ ማቶ 3:11፤ ማር 1:7፤ ሉቃ 3:16፤ ዮሃ 1:27

27 ዩራሳላሚ አሳቲኔ ኢስታ ሃላቃቲ ዩሱሳ ኤሪቤቴና፤ ጊዶ አቲን ኢስቲ ኢዛ ቦላ ፒርዲዳ፤ ሄሳንካ ሳምባታን ሳምባታን ናባቤቲዛ ካሴ ናቤታ ቃላይ ኢዛ ቦላ ፖሌቲዳስ።

28 ኢዛ ሃይቆስ ጋሊዛ ኢሲ ጋሶካ ኢስቲ ዴሞንታ ኣጊኮካ ጲላጶሲ ኢዛ ቦላ ሃይቆ ፒርዳ ፒርዳና ማላ ዋሲዳ።

29 ኢዛ ጊሻስ ጸፊቲዳይሳ ኢስቲ ኡባ ፖሊዳፔ ጉዬ ኢዛ ካቂቲዳ ሚላ ቦላፊ ጋዴን ዋሊዲ ዲፎን ሞጊዳ።

30 ጊዶ አቲን ጸሲ ኢዛ ሃይቆፔ ዴንሊዳስ።

31 ጋሊላፔ ዩራሳላሚ ጋካናስ ባናራ ዲዛይታስ ዳር ዋዴ ቤቲዳስ፤ ሄይቲካ ሃኢ ኢዛ ጊሻስ ዴፊታስ ማርካታ።

32 «ኦኒካ ካሴ ጸሲ ኦ አዋታስ ጫቂዳ ሚሺራቾ ቃላ ኢንቴስ ሳባኮስ።

33 ዩሱሳ ከቲዲ ኢስታስ ጫቂዳ ቃላ ኦስ ኢስታ ናይታስ ፖሊዳስ፤ ሄሲካ ዩላ ማጻፋን ናምኣንሱ ሸምፖን፣ ሳኔ ታ ናዛ፤ ታ ኔና ሃቶ ዩላዲስ፤ ጌቲቲ ጸፊቲዳስ።

34 ቃሴካ ኢዚ ዋቆንታይሳኔ ጸሲ ኢዛ ሃይቆፔ ዴንሊዳይሳ ሻኪ ኤራና ማላ፡

« ሳንጆቲዳይሳኔ አማኔቲዳ
ዳዊቲ ኣንጆ ታ ኢንቴስ
ኢማና፤ ጊዳስ።

35 ሄሳ ጊሻስ ሃራሶንካ፡

ሳኔ ጌሻይ
ሃይቂ ዋቃና ማላ
ኔ ኮያካ፤ ጌስ።

36 «ዳዊቲ ባ ዋዴን ጸሳ ሸኔ ማላ ኦሊዳፔ ጉዬ ሃይቂዳስ፤ ካሴ ባ አዋታራ ሞጌቲን ኢዛ ኣሾይ ዋቂዳስ።

37 ጸሲ ኢዛ ሃይቆፔ ዴንሊዳይሲ ኢዚ ጊዲኮ ዋቂቤና።

38 ሄሳ ጊሻስ ታ ኢሻቶ! ናጋራስ ማርቴላ ቤቲዛይ ዩሱሳ ባጋራ ጊዲዳይሲ ኢንቴስ ሳባኬቲዳይሳ ኤሪቴ።

39 ኢዛ አማኒዛዴይ ዉሪ ካሴ ሙሴ ዋጋ ባጋራ ዴሞንታ ጲሎቴላ ዴማና።

40-41 ሄሳ ጊሻስ ካሴ ናቤቲ፡
« ኢንቴኖ ቂጲዛይቶ ጶሊቴ፡
ማላሌቲቴኔ ጳይቴ፡

13:28 ማቶ 27:22-23፤ ማር 15:13-14፤ ሉቃ 23:21-23፤ ዮሃ 19:15 13:29

ማቶ 27:57-61፤ ማር 15:42-47፤ ሉቃ 23:50-56፤ ዮሃ 19:38-42 13:31

ሃዋ 1:3 13:33 ማዛ 2:7 13:34 ኢሳ 55:3 13:35 ማዛ 16:10

ኢንቴስ ኦኒካ ዮቲን
አማናናስ
ኢንቴና ሜቲዛ ሚሽ
ታ ኢንቴ ዋዴን
ኦፋና ጊዳ ቃላይ
ኢንቴ ቦላ ጋኮንታ ማላ
ናጌቲቲ» ጊዳስ።

42 ጳውሎስኔ ባርናባሲ አይሁዳታ ዋሳ ኬፋፌ ኬዚሽን አሳይ ኢስታ ሄሳ ኢስቲ ዮቲዳ ቃላ ካሊዛ ሳምባታ ጋላስ ዛሪ ዮታና ማላ ዋሲዳስ።

43 ሺቆይ ላሌቲዳፔ ጉዬ ዳሮ አይሁዳቲኔ አይሁዳታ አማኖን ጌሊዲ ጸስ ጎይኒዛ አሳቲ ጳውሎሳኔ ባርናባሳ ካሊዳ። ጳውሎሳንቲካ ኢስታ ቆፍሲሼ ኢስቲ ጸሳ ኪያቴላን ሚኒ ዳና ማላ ዘሪዳ።

44 ካሊዛ ሳምባታ ጋላስ ካታማ አሳፔ ጉላቲ ጸላላ አቲን ዳሪዛ ባጋይ ዉሪ ጎዳ ቃላ ሲያና ሸቂዳስ።

45 አይሁዳቲካ ዳሮ ዳሪ ቤኢዲ ቃናቴቲላን ኩሚዳ፤ ጳውሎሳ ሃሳያ ኤቄቲሼ ኢዛ ጫዴዳ።

46-47 ጳውሎስኔ ባርናባሲ ባቦንታ ጸላቴላን፥ «ጸሳ ቃላይ ኮይሮ ኢንቴስ ዮቲታናስ ቤሴስ፤ ጊዶ አቲን ኢንቴ ቃላ ለቂዳታ። ኢንቴስ ሜርና ዴኦይ ቤሶንታይሳ ኢንቴርካ ኢንቴ ቦላ ፒርዲዳ ጊሻስ ሃኢ ኮኒ ጌዴ አይዛቤታኮ ባና ኮዮስ፤ ቃሴካ ጎዳይ ኦና፥ ሩሳስ አቶቲላ ቃላ ቢታ ጋጸ ጋፋና ማላ ታ ኔና አይዛቤታስ ፖኦ ሂስታ ኪታዲስ» ጊዳ።

48 አይዛቤቲ ሄሳ ሲዬዲ ዳሮ ኡፋዬቲዳ፤ ጎዳ ቃላስካ ቦንቾ ኢሚዳ፤ ሜርና ዴኦስ ጊጌቲዳ ዳሬይ ዉሪ አማኒዳስ።

49 ጎዳ ቃላይ ሄራን ዲዛ ዳሬ ኡባሶ ጋኪዳስ።

50 አይሁዳቲ ቃሴ አያና ሃኖን ካሴፔ ሚኒዛይታኔ ዲሳን ቦንቹቲዳ ማጫሳታ ሄሳሶካ ካታማን ዲዛ ጌታ አሳታ ዴንፊሊዲ ጳውሎሳ ቦላኔ ባርናባሳ ቦላ ጎዴቱላ ዴንፊሊዲ ባ ዳሬፔ ኬሲ ጎዲዳ።

51 ጳውሎስኔ ባርናባሲ አሳይ ኢስታ ኢዲዳይሳ ቤሳናስ ባ ቶሆ ቦላ ዲዛ ጉዲላ ፒቲዲ ኢቆኒዮኔ ጌቲቲዛሶ ቢዳ።

52 አማኒዛይቲ ኡፋይሳኒኔ ጸሎ አያናን ኩሚዳ።

14

ኢቆሲዮንን ጳውሎስን ባርናባሳ

¹ ኢቆሲዮንን ጳውሎስን ባርናባሳ ኢሲፌ አይሁዳታ ዋሳ ከሐ ጌሊዳ፤ ሄንካ ኢስቲ አሳ ሎኤሊ ታማርሲዳ ጊሻሰ ጌሪኬ አሳፔኔ አይሁዳ አሳፔ ዳሮይ አማኒዴስ።

² ሄንኮ አማኖንታ አይሁዳ አሳይ አይዛቤታ ኢስታ ቦላ ዴንሐሊዲ አሳይ አማኒዛይታ ኢጻና ማላ ኦሊዴስ።

³ ጳውሎስን ባርናባሳ ጎዳ ጊሻሰ ጸላቴላራ አሳሰ ዮቲሼ ሄን ዳሮ ዋዴ ጋምኢዳ፤ ጎዳይካ ኢስቲ ዮቲዛ ቃላ ጌታ ማላታራኔ ዋልቃማ ኦሶን ቆንጨሲ ማርካቲዴስ።

⁴ ካታማ አሳይ ባ ጌዶን ናምኤ ከዚ ሻኬቲዲ ባጋይ አይሁዳታ ባጋ፣ ባጋይ ጳውሎሳንታ ባጋ ጌዲዴስ።

⁵ ሄ ዋዴ አይሁዳቲኔ አይዛቤቲ ባና ካሌሊዛይታራ ኢሲፌ ጌዲዲ ኢስታ ዋዩሳናሲኔ ሹቻን ጫዳናሰ ኮዪዳ።

⁶ ኢስቲካ ሄሳ ኤሪዳ ማላ ሊስቲራኔ ዳርቤኔ ጌቴቲዛሶ ሊቃኦኒያ ካታማታኔ ሄ ሄራን ዲዛ ዴሬ ባቃቲዳ።

⁷ ሄንካ ሚሺራቾ ቃላ ሳባኮ ዶሚዳ።

ሊስቲራኒኔ ዳርቤኒን ጳውሎስን ባርናባሳ

⁸ ሊስቲራን ዩሌቶሶፔ ባ ቶሆራ ሄማቲ ኤሮንታ ኢሲ ቶሆ ሲላ አዴይ ዴስ።

⁹⁻¹⁰ ሄሳዴይ ጳውሎሲ ሳባኪሺን ኡቲ ሲዬስ፤ ጳውሎሲካ ኢዛኮ ቲሺ ሂስቲ ጴሊዲ አዴዛ ፓላና አማኖይ ኢዛ ቦላ ዲዛይሳ ቤኢዲኔ ቃላ ቆቄ ሂስቲዲ፣ «ሲቲ ጋዳ ኔ ቶሆን ኤቃ!» ጌዴስ። አዴዚ ሄራካ ጉፒ ዴንዲዲ ሄማሐ ኦይኪዴስ።

¹¹ አሳይ ጳውሎሲ ኦሊዳይሳ ቤኢዲ ሊቃኦኒያ ቃላራ፣ «ኤቃ ጸሳቲ አሰ ሚሳቲዲ ሃ ኦኮ ዋዲዳ» ጌዲ ዋሲዴስ።

¹² ባርናባሳ፣ «ዲያ» ጌዳ ጳውሎሳካ ሃሳይዛ ዋናይ ኢዛ ጌዲዳ ጊሻሰ፣ «ሄርማኔ» ጌዳ።

¹³ ካታማፔ አሲ ባይንዳሶን ዲዛ ዲያ ጌቴቲዛ ኤቃ ከላ ቄሴይ ኮርማታኔ ጸጾቲ ገገዳ ጨሽ ጌዴ ካታማ ጌሊዛ ኦጌ ቦላ ኤፊዲ ዴሬዛራ ኢሲፌ ጌዲዲ ጳውሎሳሲኔ ባርናባሳሰ ሃርሻና ኮዪዴስ።

¹⁴ ሃዋሬቲ ባርናባሲኔ ጳውሎሲ ሄሳ ሲዪዳ ማላ ባ ማይኦ ዳኪዲ ጌዴ ዴሬዛ ጌዶ ዋጺዳ፤ ባ ቃላ ቆቄ ሂስቲዲ ሂዘጊዳ፤

¹⁵ «ሃይቶ አሳቶ! ሃይሳ አዛሰ ኦሐቲ? ኦኒካ ኢንቲ ማላ አሳኮ! ኢንቴካ ቃሴ ሃይሳ ማላ ሃዳ ዮኦፔ ሃኪዲ ሳሎኔ ሳኦ፤

አባካ፡ አባታ ጊደን ዲዛይታ ኡባ ሜዲዳ ዴኦ ጸሳኮ ኢንቴ ሲማና ማላ ኢንቴስ ሚሺራቸ ቃላ ሳባኮስ፡፡

16 ኢዚ ካሴ አዲዳ ዩሌታይኔ ዴሬይ ወሪካ ባ ኮዪዳ ማላ ሃናናስ ዩዲ ቤሲዴስ፡፡

17 ጊደ ኦቲን ጸሲ ሳሎፔ ኢራኔ ሄሳሶካ ካሊ ካጺዛ ዎዴታ ኢሚዲ ኢንቴ ዎዚና ካላኒኔ ኡፋይሳን ኩንሊዴስ፤ ኡፋይሳካ ኢንቴና ካልሲዲ ሎኦ ኦሶን ባና ማርካይ ባይንዳ አጊቤና» ጊዳ፡፡

18 ሄሳ ኡባ ሃሳይዲ አሳይ ኢስታስ ያርሾንታ ማላ ዋይዲ ዲጊዳ፡፡

19 አይሁዳቲ ቃሴ አንጾኪያፔኔ ኢቆኒዮኔፔ ዪዳ አሳይ አሳ ዘሪዲ ጳውሎሳ ሹቻን ጫዳና ማላ አማንሊዳ፤ ጳውሎሳካ ሹቻን ጫዲዲ ሃይቂዴስ ጊ ጎቺዲ ካታማፔ ጌዴ ካሬ ኬሲዳ፡፡

20 ጊደ ኦቲን አማኒዛይቲ ኢዛ ዩዪ አዲ ናጊሺን ጳውሎሲ ዴንዲዲ ጌዴ ካታማ ጌሊዴስ፤ ዎንቴላ ጋላስ ባርናባሳራ ኢሲፌ ዳርቤኔ ጌቴቲዛሶ ቢዳ፡፡

ሶሪያን ዲዛ አንጾኪያ ጳውሎሳኔ ባርናባሳ ሲሞ

21 ጳውሎሲኔ ባርናባሲ ዳርቤኔን ሚሺራቸ ቃላ ሳባኪዲ ዳሮ አሳ አማንሊዳፔ ጉዬ ጌዴ ሊስቲራ፡ ኢቆኒዮኔኔ አንጾኪያ ሲሚዳ፡፡

22 አማኒዛይታ ዎዚና ሚንሐሊሽ ኢስቲ አማኖን ሚኒ ዳና ማላ ዘሪሹ፡ «ኮ ጸሳ ካዎቴላ ጌላናስ ዳሮ ሜቶ ጊዶራ አፋናስ ኮሽስ» ጊዳ፡፡

23 ሄሳፌ ጉዬ ዲማ ዲማ ዎሳ ኬላታን ጨማታ ዶሪዳፔ ጉዬ ጸማኒኔ ዎሳን አማኔቲዳ ጎዳስ ሃዳራ አሊ ኢሚዳ፡፡

24 ጲሲዲያራ አዲዲ ጲንፊሊያ ሲሚዳ፡፡

25 ጴርጌኔን ቃላ ሳባኪዲ ዲጌ አጻሊያ ጌቴቲዛሶ ዎዲዳ፡፡

26 አጻሊያፔካ ሃኢ ጋካናስ ኢስቲ ኦሊዳ ኦሶዛ ሃዳራ ኢስታስ አሜቲዳ ካታማ ሶሪያን ዲዛ አንጾኪያ ማርካቤን ጌሊዲ ሲሚዳ፡፡

27 ሄ ጋኪዳ ማላ ዎሳ ኬላ አሳ ኡባ ሺሺዲ ጸሲ ኢስታራ ኦሊዳይሳ ቃሴካ አይዛቤታስ አማኖ ፔንጌይ ዋኒ ዶዬቲዳኮ ወርሲ ዮቲዳ፡፡

28 ሄን አማኒዛይታራ ዳሮ ዎዴ ጋሞኢዳ፡፡

15

ዩሩሳላሚ ዲላታ

1 ኢሲ ኢሲ አሳቲ ዩሁዳፔ ዱጌ አንጾኪያ ዋዲዲ፡ «ኢንቴ ሙሴ ዋጋ ማላ ቃጻሬቶንታ ኣጊኮ ኦኒካ ኣታናሰ ዳንዳዬኬታ» ጊዲ ኣማኒዛይታ ታማርሶ ደሚዲ።

2 ሄሲካ ጳውሎሳኔ ባርናባሳ ጊታ ፓላማኒኔ ኦሻ ጊዶ ጌልሊዴስ፤ ሄሳ ጊሻሰ ጳውሎሳኔ ባርናባሳ ሃራ ኢሲ ኢሲ ኣማኒዛ አሳታራ ዩራሳላሜ ኬዚዲ ሃ ዮኦዛ ጊሻሰ ጨማታኔ ሃዋሬታ ኦይቻና ማላ ጌቴቲዴስ።

3 ሄሳ ጊሻሰ ዋሳ ኬላያ ኢስታ ዩራሳላሜ ባና ማላ ከቲን ኢስቲ ፒንቄራኔ ሳማሪያራ ኣጲ ቢሼ ሄን ዲዛ ኣይዛቤቲ ኣማኖን ሲሚዳይሳ ዮቲዲ፤ ሄ ዋዴ ኣማኒዛይቲ ሄሳ ሲዩዲ ኬሂ ኡፋዬቲዲ።

4 ኢስቲ ዩራሳላሜ ጋኪን ዋሳ ኬላ አሳይ ሃዋሬቲኔ ጨማቲ ኢስታ ሞኪ ኤኪዲ፤ ከቲቲ ቢዳይቲካ ጸሲ ኢስታራ ጊዲዲ ኦሊዳይሳ ኡባ ኢስታሰ ዮቲዲ።

5 ፋርሳዌታ ባጋ አሳታፔ ኣማኒዳ ኢሲ ኢሲ አሳቲ ዴንዲዲ፡ «ኣይዛቤቲ ቃጻሬታናሲኔ ሙሴ ዋጋ ናጋና ማላ ኢስታሰ ዮታናሰ ቤሴስ» ጊዲ።

6 ሃዋሬቲኔ ጨማቲ ሄ ዮኦዛ ጊዶ ሎኤሊ ጴላናሰ ሸቂዳ።

7 ዳር ፓላማፔ ጉዬ ጳጵርሲ ዴንዲ ኤቂዲ፡ «ታ ኢሻቶ! ጉላ ዋዴ ካሴ ጸሲ ታና ኢንቴ ጊዶሬ ዶሪዲ ኣይዛቤቲ ታ ዶናፔ ሚሺራቾ ቃላ ሲዩዲ ኣማናና ማላ ኦሊዳይሳ ኢንቴ ኤሪታ።

8 አሳ ዋዚና ኤሪዛ ጸሲ ኑስ ኢሚዳይሳ ማላ ኢስታሰካ ጸሎ ኣያና ኢሚዲ ኢስታ ባሰ ኤኪዳይሳ ማርካቲዴስ።

9 ኢስታ ዋዚናካ ኣማኖን ጌሺዲ ኑ ጊዶኒኔ ኢስታ ጊዶን ኣይኮ ሻኮካ ኦሊቤና።

10 ሄሳ ጊሻሰ ኑ ኣዋቲኔ ኦኒካ ቶካናሰ ዳንዳዮንታ ቃምባራ ኣማኒዛይታ ቶሳናሰ ኢንቴ ኣዛሰ ጸሰ ፓጩቲ?

11 ኑ ኣቲዳይ ሊኬ ኢስታሶካ ጎዳ ዩሱሳ ኣጼ ኪያቴላን ጊዲዳይሳ ኣማኖስ» ጊዴስ።

12 ሺቂዳ አሳይ ወሪካ ጮኡ ጊን ባርናባሳኔ ጳውሎሲ ጸሲ ኢስታ ባጋራ ኣይዛቤታ ጊዶን ኦሊዳ ጊታ ማላታታ ጊሻሰ ዮቲሺን ማላሊቲዲ ሎኤሊ ሲዩዲ።

13 ኢስቲ ዮቲ ወርሲሺን ያቆቤይ ዴንዲ ኤቂዲ፡ «ታ ኢሻቶ! ታ ጊዛይሳ ሲዩቲ፤

14 ጸሲ ኣይዛቤታፔ ባሰ ጊዳና ዴሬ ካሴቲዲ ኢዚ ዋሰቲ ዴይጊ ዋሊዳኮ ሲሞኒ ኑስ ሎኤሊ ዮቲዴስ።

- 15 ካሴ ናቤታን ሂዝጊ ጸፊቲዳ ቃላይ ሃይሳራ ጋጌስ።
- 16 « ሃይሳፌ ጉዬ ታ ሲማዳ
 ላሌቲዳ ዳዊቲ
 ኬሌ ኬጸና፤
 ላሌቲዳይሳ ዛራ ኤሳና፤
 ዛራዳካ ኬጸና።
- 17 ሄሲካ ኣቲዳ ኣሳይ
 ጎዳ ኮያና ማላኔ
 ታ ሱንፋን
 ጸይጌቲዳ ኣይዛቤቲ
 ታና ኮያና ማላ ጌስ
 ኡባ ኦሴዳ ጸሳይ።
- 18 ሃይሳ ኮይሮፔካ ኤሪሲዳ ጸሲ
 ታና ጌስ።
- 19 «ሄሳ ጊሻስ ሃ ጸሳኮ ሲሚዳ ኣይዛቤታ ኑ ሜቶሶንታ ማላ
 ሃይሲ ታ ባጋራ ታስ ቃሾ።
- 20 ጊዶ ኣቲን ኤቃስ ያርሼቲዲ ቱኒዳ ካሉ ሞፒቲ፤ ላይማፔ
 ሃኪቲ፤ ባወቲ ሃይቂዳ ሜሄ ኣሾ ሞፒቲ፤ ሱሉ ኡኖፒቲ ጊዲ ኑ
 ኢስታስ ጸፋና ቤሴስ።
- 21 ሙሴ ወጋይ ጊዲኮ ቤኒሶፌ ሳምባታ ሳምባታ ጋላስ
 ኣይሁዳታ ዋሳ ኬላን ናባቤቲሼኔ ካታማይ ዲዛሶን ሳባኬቲሼ
 ዴስ» ጊዴስ።

ኣማኒዛ ኣይዛቤታስ ሃዋሬታፔ ጸፊቲዳ ዱብዳቤ

- 22 ሄ ዋዴ ሃዋሬቲኔ ጨማቲ ኩሜላ ዋሳ ኬላ ኣሳራ ጊዲዲ
 ባ ጊዶፌ ኢሲ ኢሲ ኣሳታ ዶሪዲ ጳዉሎሳራኔ ባርናባሳራ
 ጋሉ ኣንጾኪያ ዬዳናስ ቃቺዳ። ኣማኒዛ ኣሳ ጊዶፌ ዋናቲዛይታ
 ባርሳባሳ ጌቲቲዛ ዩሁዴኔ ሲላሴ ዶሪዳ።
- 23 ኢስታ ኩሼን አሚ ዬዲዳ ዱብዳቤዚ፡ «ኣንቲ ኣሻታፔ፡
 ሃዋሬታፔ፡ ጨማታፔ፡ ኣይዛቤታፔ ኣማኒዳ ኣንጾኪያኒኔ ሶሪያን፡
 ኪልቂያንካ ዲዛ ኣማኒዛይታስ ኑ ሳሮካይ ኣንቲና ጋኮ።
- 24 «ኢሲ ኢሲ ኣሳቲ ኑፔ ጊዶንታ ባ ባጋራ ኑ ኣቻፌ ቢዲ ባ
 ሃሳያን ኣንቲ ዋዚና ያኔ ሃ ቃሉዳይሳኔ ኣንቲና ቡልኣኪዳይሳ ኑ
 ሲዪዶስ።
- 25 ሄሳ ጊሻስ ጉላ ኣሳታ ዶሪዲ ዶሴቲዳ ባርናባሳራኔ
 ጳዉሎሳራ ኣንቲኮ ዬዳናስ ኑ ዉሪካ ቃላ ጋጊዶስ።

26 ኢስቲ ጎዳ ዩሱስ ከርሰቶሳ ገሻሰ ባ ሸምፖ አል ኢሚዳይታ።

27 ሄሳ ገሻሰ ኑ ኢንቴሰ ጸፊዳይሳ ኢስቲ ኢንቴሰ ባ ዶናራ ሎኤል ዮታና ማላ ዩሁዳኔ ሲላሴ ኢንቴሰ ዩዲዶስ።

28 ሃይታ ኢንቴሰ ኮሺዛ ዮኦታፔ ሃራ ዳጾ ቶሆ ኑ ኢንቴ ቦላ ዋጾንታ ማላ ኑሲኔ ጸሎ ኢያናሰ ሎኦ ሚሳቲ ቤቲዴሰ።

29 ሄሲካ ኤቃሰ ሹኬቲዳ አሾፔ፥ ሱላፌ፥ ባዉቲ ሃይቂዳ ማሄ አሾፔኔ ላይማፔ ኢንቴ ሃካና ማላሳ፤ ኢንቴ ሃይታ ሚሳቲዛይታፔ ሃኪኮ ኢንቴሰ ሎኦ፤ ሳርን ዲቲ» ጌሰ።

30 ከቴቲዳ አሳቲ ሞይዜቲዲ ዲጌ አንጾኪያ ዋዲዳ፤ ሄን አማኒዛይታ ወርሲ ሺሺዲ ኤሂዳ ዳብዳቤዛ ኢስታሰ ኢሚዳ።

31 ዴሬይካ ናባቢዲ ሚንፌልዛ ቃላን ኡፋዬቲዴሰ።

32 ዩሁዳይኔ ሲላሴ ናቤታ ጌዲዳ ገሻሰ ዳር ዘሪዲ አማኒዛይታ ሚንፌልዳ።

33 ሄን ጉላ ዋዴ ጋምኢዲ አማኒዛ አሳይ ሞይዚን ጉዬ ባና ከቲዳይታኮ ሲሚዳ።

34 ሲላሴ ቃሴ ሄን አታናሰ ኮዪዴሰ። *

35 ጳውሎሲኔ ባርናባሲ ሃራ ዳር አሳታራ ጌዲዲ ጎዳ ቃላ ታማርሲሼኔ ሳባኪሼ አንጾኪያን ጋምኢዳ።

ጳውሎሲኔ ባርናባሳ ሻኬቴል

36 ጳውሎሲ ጉላ ዋዴ ጋምኢዲ ባርናባሳ፥ «ኑ ካሴ ጎዳ ቃላ ዮቲዳ ኡባ ካታማታ ቢዲ አማኒዛይቲ አይ ማላ ዲዛኮ አኔ ዩዩ ቤዮስ፥ ዴንዳ» ጌዴሰ።

37 ባርናባሲካ ማርቆሳ ጌቴቲዛ ዮሃኒሲ ኢስታራ ባና ማላ ኮዪዴሰ።

38 ጳውሎሲ ቃሴ ኢዛ ኤኪ ባናሰ ኮዪቤና፤ ጋሶይካ ካሴ ማርቆሲ ኢስታፌ ሻኬቲዲ ጳንፊሊያ ጌቴቲዛሶን ጉዬ አቲዲ ኢስታራ ኦሶሰ ሲንል ኬዞንታ አጌዳ ገሻሳ።

39 ሂሰቲን ዳር ፓላማይ ኢስታ ጌዶን ሜዴቲዳ ገሻሰ ባ ጌዶን ሻኬቲ ዋዲዳ፤ ሄሳ ገሻሰ ባርናባሲ ማርቆሳ ኤኪዲ ማርካቤን ጌሊዲ ቆጶርሴ ቢዴሰ።

40 ጳውሎሲ ቃሴ ሲላሴ ዶሪዴሰ፤ አማኒዛይቲካ ጎዳ አቶ ኪያቴላሰ ጳውሎሳ ሃዳራ ኢሚዳፔ ጉዬ ኢዚ ኢስታፌ ሻኬቲዲ ቢዴሰ።

* 15:34 ኢሲ ኢሲ ገሻ ማጻፋቲ ታይቦ 34 ቦላ ዲዛ ቆፋ ጉጂቴና። 15:38

41 አማኒዛይታ ሚንፊሊሽ ሶሪያራኔ ኪልቂያራ አቂ ቢደስ።

16

ጸምቶሲ ጳውሎሳራኔ ሲላሴራ ኢሲፌ ጌዴል

1 ጳውሎሲ ዳርቤኔ ጌቴቲዛሶኔ ሊሰቲራ ጋኪዲ ኢዛ አዋይ ጌሪኬ አስ፥ አዩያ ቃሴ አይሁዳ አስ ጌዲዳ ጸምቶሳ ጌቴቲዛ ኢሲ አማኒዛዴ ሄን ዴሚደስ።

2 ኢዚካ ሊሰቲራኒኔ ኢቆኒዮኔን አማኒዛ አሳ አቻን ሎኦ ማርካቴሊ ዲዛዴ።

3 ጳውሎሲካ ጸምቶሳ ባናራ ኤኪ ባናሰ ኮዪደስ፤ ሄሳ ጊሻሰ ሄ ሄራን አይሁዳታ ጊሻሰ ጌዲ ጸምቶሳ ቃጸሪደስ፤ ጋሶይካ አይሁዳቲ ጸምቶሳ አዋይ ጌሪኬ አስ ጌዲዳይሳ ኤሪዛ ጊሻሳ።

4 ኢስቲ ኢሲ ካታማፔ ሃራ ካታማ አቂ አቂ ቢሼ ሃዋሬቲኔ ዩሩሳላሜ ዋሳ ኬፋ ጨማቲ ዩዲዳ ኪታ አሳይ ኤኪዲ ናጋና ማላ አማኒዛ አሳሰ አሚ አሚ አቂዳ።

5 ዋሳ ኬፋ አሳይ አማኖን ሚኒ ሚኒ ቢደስ፤ ቃሴ አሳይካ ቆዳን ጋላስ ጋላስ ጉጃቲ ጉጃቲ ቢደስ።

ጳውሎሲ ማቂዶኒያ ጊሻሰ ቤኢዳ አጂታ

6 ጳውሎሲኔ ኢዛራ ዲዛ ዛታቲ ቃላ ኢሲያን ሳባኮንታ ማላ ጸሎ አያናይ ዲጊዳ ጊሻሰ ፒርጊያራኔ ጋላቲያ ዴሬራ አቂ ቢዳ።

7 ኢስቲ ሚሲያ ጌቴቲዛሶ ጋካና ማቲሼ ቢቲኒያ ጌቴቲዛሶ ጌላና ቆፒን ዩሱሳ አያናይ ኢስታ ዲጊደስ።

8 ሄሳ ጊሻሰ ሚሲያራ አቂዲ ጸርኣዳ ጌቴቲዛሶ ዋቂዳ።

9 ኢሲ ማቂዶኒያ አሲ ኤቂዲ ጳውሎሳ ማቂዶኒያ ፒናዳ ኑና ማዳ ጊሺን ጳውሎሲ ኦማርሰ አጂታን ቤዪደስ።

10 ኢዚካ ሄ አጂታ ቤዪን ኑኒ ሄራካ ማቂዶኒያ ባና ኮዪደስ፤ ጸሲ ኑኒ ኢስታሰ ሚሺራቾ ቃላ ዮታና ማላ ዴይጊደስ ጌ ቆፒዳ ጊሻሳ።

ሊዲያ አማኖ

11 ማርካቤራ ጸርኣዳ ጌቴቲዛሶፔ ዴንዲዲ ሰቲ ጌዲ ሳሞቲራቄ ጌቴቲዛሶ ቢደስ፤ ዋንቴፋ ጋላስ ናጵሌ ጌቴቲዛሶ ሲንል ሄሜል ጉጂደስ።

12 ሄፔካ ኦርሜ አሳይ ቶራን ሃሪዳ ዴሬ ጌዲዳ ማቂዶኒያ ዴሬ ዋና ካታማ ጌዲዳ ፒሊጲሲዮሴ ጌቴቲዛሶ ጌሊደስ፤ ሄንካ ኤንዴና ዋዴ ኡቲደስ።

13 ሳሞባታ ጋላስ ዋሳ ዋሲዛሶ ኮዪሼ ካታማ ጌሊዛሶ ፔንጌ ኬዚዲ ዱጌ ሻፋ ዋዶስ፤ ኑ ሄን ኡቲዲ ሸቂ ዲዛ ማጫሳታስ ቃላ ዮቲዶስ።

14 ቃላ ሎኤሊ ሲዪዛ ማጫሳታፔ ኢሲ ሊዲያ ጌቲቲዛራ ኢዛካ ጸሰ ጎይኒዛርኔ ቲያጺርኔ ካታማፔ ያዳ ዞኑ ሃሬ ማይኑ ዛልኢዛሮ ጳዉሎሲ ዮቲዛ ቃላ ኢዛ ዋዚናን ዋላ ሲያና ማላ ጎዳይ ኢዚ ዋዚና ዶይዴስ።

15 ኢዛኔ ኢዚሶ አሳይካ ጳማቄቲዳፔ ጉዬ፥ «ታኒ ጸሰ አማኒዳይሳ አንቲ ቱሙ ኤሪዳ ጊዲኮ ሃ ታሶ ዪዲ ጉላ ዋዴ ዲሺቲ» ጋዳ ኢስታ ሚንላ ዋሳዱስ።

ጳዉሎሲኔ ሲላሲ ቃሾ ኬላን

16 ኢሲ ጋላስ ኑ ዋሳሶ ቢሺን ካዮ ካዮታ ማርቲዛ ኢሲ ጋራዴ ና ዲዛራ ኑና ዴማዱስ፤ ኢዛካ ባ ማርቲላን ባና አይሲዛይታስ ዳሮ ሚሽ ጌልላዉስ።

17 ሃና ጋራዴ ናያ ጳዉሎሳኔ ኑና ካላ ካላ፥ «ሃይቲ አሳቲ አንቲስ አንቲ አታና ኦጌ ዮቲዛይቲ ዋጋ ጸሳ ኦሳንቻታ» ጋ ጋ ዋሳዱስ።

18 ሄሳካ ዳሮ ጋላስ ሺራ ሺራ ጋዱስ፤ ጊዶ አቲን ጳዉሎሲ ኢዚ ቃላን ዳሮ ሜቶቲዳ ጊሻስ ኢዚኮ ሲሚዲ ኢዚ ዶናራ ሃሳይዛ ቱና አያናዛ፥ «ኔ ኢዚፔ ኬዛና ማላ ታ ኔና ጎዳ ዬሱስ ኪርስቶሳ ሱንላን አዛዛይስ» ጊዴስ። ሄ አያናይ ሄራካ ዬጊ ኢዚፔ ኬዚዴስ።

19 ኢዞ አይሲዛ አሳቲ ኢስታስ ሚሹ ዴሚዛ ኦጌይ ዱጺን ኢስታ ሂዶታይ ቃንጾቲዳይሲ ኢስታስ ጌሊን ጳዉሎሳኔ ሲላሲ ኦይኪዲ ቢታራ ጎቺዲ ዋናቲ ዲዛሶ ጊያ ጊዶ ኤፊዳ።

20 ዴሬ አይሲዛ ዋናታኮ ሺሺዲ፥ «ሃይቲ አሳቲ ባስ አይሁዳ አስ ጊዲ ኡቲዲ ኑ ካታማ ቡልኦኬቲስ፤

21 ቃሴ ኑ አርሜ አሳቲ ኤካናስ ዋይኮ ኦላናስ ኑስ ቤሶንታ ዋጋ ኑ አሳ ጊዶን ሳሌቲስ» ጊዳ።

22 ዴሬይካ ኢሲ ቦላ ጊዲዲ ጳዉሎሳ ቦላኔ ሲላሲ ቦላ ዴንዲዴስ፤ ዴራ አይሲዛይቲ ጳዉሎሳንታ ማይኑ ቃሪ ኤኪዲ ዱርቃራ ቆጻና ማላ አዛዚዳ።

23 ኢታ ቡካ ቡኪዲ ቃሾ ኬላን ዬጊዳ፤ ቃሾ ኬላ ናጊዛይሲካ ኢስታ ሎኤሊ ናጋና ማላ አዛዚዳ።

24 ኢዚካ ሄሳ ማላ ሚኖ አዛዞ ኤኪዲ ቃሾ ኬላስ ዋና ጊዶ ኪፊሌ ጌልሊዲ ኢስታ ቶሆ ጊታ ዱራማራ ሺሺ ቃቺዴስ።

25 ጊዲ ጊደል ጊዲሺን ጳውሎስኔ ሲላሲ ዋሳኒኔ ዬላን ጸሳ ጋላቲሺን ቃሾ አሳይ ኢስታ ዬላኔ ጋላታ ኤዘጊ ሲዪደስ።

26 ሃሳኦይ ባይንዳ ዲንጋቲ ቃሾ ኬላ ጸጸፔ ቃሊዛ ሚኖ ቢታ ቃሊ ሃኒዴስ፤ ሄራካ ቃሾ ኬላ ፔንጌቲ ዶዬቲዳ፤ ቃሼቲዳ ኡባ አሳ ቃሾይ ቢርሼቲደስ።

27 ቃሾ ኬላ ናጊዛይሲ ጳስኮፌ ቤጊዲ ቃሾ ኬላ ፔንጌቲ ዶያ ዲዛይሳ ቤኢዲ ቃሾ አሳይ ወሪ ኬሲ ኤኪዳ ሚሳቲን ባና ዎጃና ማሻ ሾዲደስ።

28 ጳውሎሲ ቃሴ ባ ቃላ ቶቄ ሂስቲዲ፡ «ኑ ወሪ ሃን ዶስ! ኔ ቦላ አይኔ ኢታ ኦሶፋ» ጊ ዋሲደስ።

29 ቃሾ ኬላ ናጊዛይሲ ጸምፔ ዋሲ ኤኪዲ ጊዶ ጉፒ ጌሊደስ፤ ኮኮሪሼ ጳውሎሳ ቶሆ ቦላኔ ሲላሲ ቶሆ ቦላ ኩንዲደስ።

30 ኢስታ ኤኪ ካሬ ኬዚዲ፡ «ሃ አሳቶ! ታ አታና ማላ አይ ኦሶ?» ጊደስ።

31 ኢስቲካ ኢዛስ፡ «ኅዳ ዬሱሳ አማና፤ ኔካ ኔሶ አሳይካ ኢንቲ ወሪ አታና» ጊደ።

32 ሄሳፌ ጉዬ ኢዛሲኔ ኢዛሶን ዲዛ አሳስ ኡባስ ኅዳ ቃላ ዮቲዳ።

33 ቃሾ ኬላ ናጊዛይሲ ሄራካ ሄ ጋላስ ቃማራ ኤፊዲ ኢስታ ማዲንሳ ሜጨደስ፤ ሄራካ ኢዚኔ ኢዛሶ አሳይ ወሪ ጸማቄቲዳ።

34 ቃሾ ኬላ ናጊዛይሲካ ኢስታ ባ ኬሌ ኤፊዲ ኢስታስ ካላ አሊደስ፤ ባሶ አሳ ኡባራ ጸሳ አማኒዳ ጊሻስ አዳዚ ዳሮ ኡፋዪደስ።

35 ጋዴይ ዎንቲሺን ዴሬ አይሲዛይቲ፡ «ሄይታ አሳታ ቢርሻ ዬዳ» ጊዲ ባ ሹሜታ ቃሾ ኬላ ናጊዛይሳኮ ዬዲዳ።

36 ቃሾ ኬላ ናጊዛይሲካ ኢስታስ፡ «ዴሬ አይሲዛይቲ ኢንቲ ቢርሼታና ማላ አዛዚዳ፤ ሄሳ ጊሻስ ሃኢ ሳርን ኬዚ ቢቲ» ጊዲ ጳውሎሳስ ዮቲደስ።

37 ጳውሎሲ ቃሴ፡ «ኑ ኦሮሜ ዬሌቲል ጊዲሺን ፒርዳይ ባይንዳ ዴሬ ሲንላን ዲርቃራ ቡኪዲ ቃሾ ኬላን ዬጊዳ፤ ሂስቲን ሃኢ ቃሴ ኑና ቆታራ አሲ ኤርንታ ኬሳና ኮዪዞ? ሄሲ ሃኔና፤ ኢስቲ ዪዲ ባርካ ቢርሼቶ!» ጊደስ።

38 ሹሜቲ ሄ ኢዚ ጊዳ ቃላ ዴሬ አይሲዛይታስ ዮቲዳ፤ ኢስቲካ ጳውሎሲኔ ሲላሲ ኦሮሜ ዬሌታ ጊዲዳይሳ ሲዪዲ ዳጋሚዳ።

39 ዪዲ ኢስታፌ ማሬቲል ኦይቺዲ ዎይኔፔ ኬሲዳ፤ ኢስቲ ሄ ካታማዮ አጊዲ ሃራሶ ባና ማላ ኢስታ ዋሲዳ።

40 ጳውሎስን ሲላሲ ቃሾ ከጻፈ ከዚሁ ሊዲያሶ ቢዳ፤ ሄንካ ዲዛ አማኒዛይቲ ኢስታ ከሂ ሚንጮሊዲ ሄፔ ከዚ ቢዳ።

17

ታሶሎንቄን ጳውሎስን ሲላሲ

1 ጳውሎስን ሲላሲ አንፊጽላን አጽሎኒያ ጌቲቲዛ ዳሬራ አጁዲ ታሶሎንቄ ጌቲቲዛ ዳሬ ቢዳ፤ ሄንካ አይሁዳታ ዋሳ ከሌ ዳስ።

2 ጳውሎስካ ኢዛሰ ሎሴ ጊዲዳ ማላ አይሁዳታ ዋሳ ከሌ ጌሊዳስ፤ ሄቹ ሳሚንታ ኩሜል ቃላፔ ኤኪ ኤኪ ኢስታራ ሃሳዬቲዳስ።

3 ኪርሰቶሲ ዋዬ ኤካናሲን ሃይቂ ዳንዳናሰ ቤሲዛይሳ ቆንጪሲ አማንጾን፡ «ሃይሲ ታ ሳባኪዛ ዬሱሲ ኢዚ ኪቲቲ ያና ጌቲቲዳይሳኮ!» ጊዳስ።

4 አይሁዳታፔ ኢሲ ኢሲ አሳይ ባ ሲዩዳይሳ አማኒዲ ጳውሎስን ሲላሲ ኢሲፊ ጊዲዳስ፤ ቃሴካ ዳሮ ዳሬይ ጸሳስ ያዩዛ ገሪኬታፔ ዳሮ ኤሬቲዳ ማጫሳቲ ባ ሲዩዳ ቃላን አማኒዲ ኢስታራ ኢሲኖ ጊዲዳ።

5 አይሁዳቲ ቃሴ ኢስታ ቃናቲዲ ጊያን ዲዛ ዋርዶ አሳታ ሺሺዲ ኩሜላ ዳሬዛ ኢስታ ቦላ ዳንጮሊዲ ካታማን ሺሮ ሜጁዳ። ጳውሎስን ሲላሲ ሺሺዲ ዳራ ሲንላን ኤሳናሰ ኢሲ ኢያሶን ጌቲቲዛይሳሶ ኮያናሰ ኤሌሊ ቢዳ።

6 ጊዶ አቲን ኢስታ ኢያሶን ከላን ዳሞንታ አጊዳ ጊሻሰ ኢያሶን ሃራ አማኒዛ አሳታ ካታማ ዳናታ ሲንላራ ጎቺሼ፡ «ሃይቲ አሳቲ ዳሬ ወርሲ ቡልኦኪሼ ጋሞኢዲ ቃሴ ሃኢ ሃ ዩዳ።

7 ኢያሶንይካ ኢስታ ባ ከላን ዋሊዳስ፤ ሃይቲ አሳቲ ወሪ፡ «ዬሱሳ ጌቲቲዛ ሃራ ካዋይ ዳስ» ጊዲ ቄሳሬ ዋጋ ኤኬቴና» ጊሼ ዋሲዳ።

8 ዳሬይን ሄ ካታማ ዳናቲ ሄሳ ሲዩዲ ባ ጊዶን ቡቄቲዳ።

9 ኢያሶን ሃራታካ ዋሴ ዴይጊሲዲ ዩዲዳ።

ቤሪያን ጳውሎስን ሲላሲ

10 አማኒዛይቲ ሄራካ ጳውሎስን ሲላሲ ቃማራ ቤሪያ ዩዲዳ፤ ኢስቲካ ሄ ጋኪዳ ማላ አይሁዳታ ዋሳ ከሌ ጌሊዳ።

11 ቤሪያ አሳይ ታሶሎንቄ አሳፔ አጁዲ አከካራ ዲዛ አሳ። ጋሶይካ ሃይሲ ዮክዚ ቱሜሻ? ጊ ጊዲ ገሻ ማጻፋታ ቃላ ዋንቲን ዋንቲን ፒልጊ ዴሊዲ ኡፋይሳን ኤኪዳስ።

12 ሄሳ ጊሻስ ኢስታፌ ዳሮ አሳይ አማኒዳስ፤ ቃሴካ ኢስታራ ቆዳን ዳሮቲ ቦንቹቲዳ ገሪኬ ዳሬ ማጫሳቲኔ አዳቲካ አማኒዳ።

13 ታሶሎንቄን ዲዛ አይሁዳ አሳቲ ጳውሎሲ ጸሳ ቃላ ቤሪያንካ ሳባኪዛይሳ ኤሪዳ ማላ ዳሬዛ ዳንፊፋናስ ቃሴካ ኢስታኮ ቢዳ።

14 ሄ ዋዴ አማኒዛይቲ ጳውሎሳ ኤሌሲዲ ጌዴ አባ አቺ ዬዲዳ፤ ሲላሲኔ ጸምቶሲ ሄን አቲዳ።

15 ጳውሎሳ ሞይዚዳ አሳቲ ኢዛ አቴና ጋሊዳ፤ ቃሴካ ሲላሲኔ ጸምቶሲ ኢዛኮ ኤሌሊ ጋካና ማላ ጊዛ ኪታ ጳውሎሳፔ ኤኪዲ ሲሚዳ።

አቴናን ጳውሎሳ

16 ጳውሎሲ አቴናን ኢስታ ናጊሺን አቴና ካታማን ኤቃቲ ኩሚዳይሳ ቤኢዲ ዳሮ ሸኔቲዳስ።

17 ሄሳ ጊሻስ አይሁዳታ ዋሳ ኬፋን አይሁዳታራኔ ጸሳስ ያዪዛ ገሪኬ አሳራ ቃሴካ ጊያይ ዲዛሶን ጋላስ ጋላስ ባናራ ጋጊዛ አሳራ ሃሳዬቲዳስ።

18 ኤፊቆርሴኔ ኢስቶይኮ ጌቲቲዛ ኤሪንቻታ ባጋ ጊዲዳይቲ ጳውሎሳኮ ሸቂዲ ኢዛራ ሃሳዬቲዳ፤ ኢስታፌ ኢሲ ኢሲ አሳቲ፤ «ሃይሲ ሎምኤሎምአይ አይ ጋና ኮይዜ?» ጊዳ፤ ባጋይቲ ቃሴ ዬሱሳ ጊሻሲኔ ሃይቆፔ ኢዛ ዳንፋ ሚሺራቾ ኢዚ ሳባኪሺን ሲዪዲ፤ «ሄሲ ሃራ ኦራፋ ኤቃታ ጊሻስ ዮቲዛ ሚሳቲስ» ጊዳ።

19 ኢዛ ኦይኪዲ አሪዮስፋጎሴ ጌቲቲዛ ዳሬ ዱላታ ሲንሐ ኤፊዲ፤ «ሃ ኔ ታማርሲዛ ኦራፋ ቲሚርቲይ አዛኮ ኦ ኤራና ማላ ኔ ኮያይ?» ጊዳ።

20 ቃሴ ኔ ኦና ኦ ሃይፋን ሲሲዛ ዮኦይ ኦ ኤርንታ ኦራሐ ጊዲዳ ጊሻስ ኢዚ አዛኮ ኦ ኤራና ኮዮስ።

21 አቴና አሳይ ኩሚል ቃሴካ ሃን ዲዛ ሃራ ዳሬ አሳይካ ባስ ዋዴ አፋናስ ኦራፋ ዮኦ ሃሳያኒኔ ሲሳን አቲን ሃራ ሚሻን ዋዴ አሌቴና።

22 ሄሳ ጊሻስ ጳውሎሲ አሪዮስፋጎሴ ጌቲቲዛ ዱላታን ሸቂዳ ዳሬዛ ሲንፋን ኤቂዲ፤ «ሃይቶ አቴና አሳቶ! ኢንቲ ቤቶ ሚሽ ኡባ አማኒዛይታ ጊዲዳይሳ ታ ቤያይስ።

23 ታ ያኔ ሃ ዩዩሺን ኢንቲ ኢስታስ ጎይኒዛ ሚሻታ ታ ጸሊሺን፤ ሳኤፊቶንታ ጸሰን ጌቲቲ ጳፊቲዳይሳ ኢሲ ያርሾሆ ዳማዲስ፤ ሄሳ ጊሻስ ሄሳ ኢንቲ ኤርንታ ጎይኒዛይሳ ታ ኢንቲና ኤሪሳና።

24 ሃይሳ አላሜዛኔ ኢዛ ጊዶንካ ዲዛይሳ ኡባ ሜዲዳ ጸሲ ኢዚ ሳሎኔ ሳኦ ጎዳ፤ ሃሳ ጊሻሰ ኢዚ አሳ ኩሼን ኬጾቲዳ ኬላን ዴና።

25 ኢዚ አሰ ኡባሰ ዴኦኔ ሽምፖ፤ ቃሴካ ሃራ ወርሲ ኢሚዛይሳ ጊዲዳ ጊሻሰ ኢዛሰ ፓጪዛዚ ባይንዳ ጊሻሰ ኢዚ አሳ ኩሼ፤ ማዶ ኤኬና።

26 አሳ ዜሬሰ ኡባ ኢሳዴፌ ሜዲዳ አሲ ቢታ ቦላ ዳና ማላ ኦሊዴሰ፤ አሳይ ዳና ዋዴኔ ወርሴላ ቆሰ ዋሊዴሰ።

27 ሄሲካ አሲ ጸሰ ኮዩዲኔ ፒልጊዲ ዴማናኮ ጊዲ ዋሊዴሰ፤ ሄሲ ሃሳ ጊዲኮካ ኢዚ ኑፔ ኢሲ ኢሳዴፌ ሃኪ ዲዛ ጊሻሰ ጊዴና።

28 ኑ ዴኦ ዴሚዳይ፥ ዲዛይኔ ቃጾቲዛይ ኢዛና፤ ኢንቴ ዴሬን ማዛሙራ ኬሲዛ ኢሲ ኢሲ አሳቲ፥ ሱኒካ ኢዛ ናይታ ጊዳ ማላ።

29 «ሂሰቲኮ ኑ ጸሳ ናይታ ጊዲኮ ጸሲ አሰ ኤራቲላን ሜዲ ኬሲዳ ዋርቃ ዋይኮ ቢራ ዋይኮ ሹቕ ሚሳቲሰ ጊዲ ኑ ቆፓናሰ ቤኬና።

30 ካሴቲዲ ጸሲ ሃይሳ ማላ ሃኖታ አሳይ ኤርንታ ኦሊዳይሳ ዳንዳያን አዲዴሰ፤ ሃኢ ጊዲኮ አሲ ወሪ ባ ዲዛሶን ዲዛሶን ማርቲላን ጌላና ማላ አዛዜሰ» ጊዴሰ።

31 ኢዚ ባ ዶሲዳዴ ባጋራ ቢታ ቦላ ጸሎቲላን ፒርዳና ጋላሰ ባሬ ዋሊዴሰ። ኢዛካ ሃይቆፔ ዴንሊዲ አሰ ኡባሰ ሃይሳ ቱማቲላ ኤሪሲዴሰ።

32 ኢሰቲካ ሃይቂዳይታ ዴንላ ጊሻሰ ሲዩዳ ማላ ኢሲ ኢሲ አሳቲ ኢዛ ቂዲዳ፤ ባጋይቲ ቃሴ፥ «ሃይሳ ቃሴካ ኑ ኔፔ ሃራ ጋላሰ ሲያና ኮኖሰ» ጊዳ።

33 ሄራካ ጳውሎሲ ኢሰታ ጊዶፌ ኬዚ ቢዴሰ።

34 ኢሲ ኢሲ አሳቲ ቃሴ ጳውሎሳ ካሊዳኔ አማኒዳ፤ ሄይታፔካ ዲኖናሲኖሳ ጌቲቲዛ አሪኖሰፋጎሴ ዱላታ ኬላ አባሌ ጊዲዳ ዴማርሶ ጌቲቲዛ ማጫሳያኔ ሃራቲካ ኢሲፌ ዴቲሰ።

18

ቆርንቶሴን ጳውሎሳ

1 ሃሳፌ ጉዬ ጳውሎሲ አቲናፔ ዴንዲዲ ቆርንቶሴ ካታማ ቢዴሰ።

2 ሄንካ ጳንጸሳን ዩሌቲዳ አቂላ ጌቲቲዛ አይሁዳ አሰ ዴሚዴሰ፤ ኢዚካ አይሁዳቲ ወሪ ኦርሜፔ ኬዛና ማላ ቃላዎዳሳ

ጌቴቴዛ ኦሮሜ ካዎይ ኣዛዚዳ ማላ ባ ማቼዮ ጰርሲቁላራ ማታ ዎዴ ኢጸሊያ ዴሬፔ ዩዳይሳ ቤያናሰ ጳውሎሲ ሄ ኢስታኮ ቢዴስ።

³ ኢዚካ ኢስታዎ ዱንካኔ ሲኪዛዴ ጌዲዳ ጌሻሰ ኢስታ ኣቻን ኡቲዲ ዱንካኔ ሲኮን ጌሊዴስ።

⁴ ሳምባታ ሳምባታ ጋላሰ ኣይሁዳታ ዎሳ ኬፋን ኣይሁዳታራኔ ጌሪኬ ኣሳታራ ሃሳዬቲሼ ኢስታ ኣማንፋናሰ ባጼቲዴስ።

⁵ ሲላሲኔ ጸምቶሲ ማቂዶኒያፔ ዲጌ ኢዛኮ ዎጲን ጳውሎሲ ሳባኮን ሚኒዲ ዬሱሲ ኢዚ ከርሰቶሳ ጌዲዳይሳ ኣይሁዳታሰ ማርካቲዴስ።

⁶ ጌዶ ኣቲን ኢሰቲ ኢዛራ ኤቄቲዲ ኢዛ ጫዬዳ ጌሻሰ ጳውሎሲ ባ ማይኦ ቆቆፊዲ፥ «ታ ኢንቴፌ ጸሎ፤ ኢንቴ ፒርዴታናይ ኢንቴ ሞሮን ጌዲዳ ጌሻሰ ታ ኢንቴ ሱፋ ጎሜን ኦይሼቲኬ፤ ሄሳ ጌሻሰ ታ ኣይዛቤታኮ ባይሰ» ጌዴስ።

⁷ ሄፔ ኬዚዲ ቲቶሳ ኢዮሰጸሳ ጌቴቴዛ ጸሰ ዎሲዛይሳሶ ቢዴስ፤ ሄ ኣዴዛ ኬፋይ ኣይሁዳታ ዎሳ ኬፋ ኣቻን ዴስ።

⁸ ኣይሁዳታ ዎሳ ኬፋ ሃላቃይ ቄሪሰጸሲ ባሶ ኣሳ ኡባራ ጎዳ ኣማኒዴስ፤ ጳውሎሲ ዮቲሺን ሲዬዳ ዳር ቆርንቶሴ ካታማ ኣሳይ ኣማኒዲ ጸማቄቲዴስ።

⁹ ጎዳይ ቃማራ ኣጂታን ጳውሎሳ፥ «ባቦፋ፤ ዮታ፤ ጮኡ ጎፓ፤

¹⁰ ታ ኔናራ ዳይሰ፤ ኦኒካ ኔ ቦላ ዴንዲ ኔና ቆሃናሰ ዳንዳዬና፤ ሃሮ ሃ ካታማይን ታሰ ዳር ኣሲ ዴስ» ጌዴስ።

¹¹ ሄሳ ጌሻሰ ጳውሎሲ ጸሳ ቃላ ኣሳ ታማርሲሼ ኢሲ ላይሊኔ ባጋ ኢስታራ ኡቲዴስ።

¹² ጋልዮሳ ጌቴቴዛ ዴሬ ኣይሲዛይሲ ኣካያን ዲዛ ዎዴ ኣይሁዳቲ ኢሲፌ ጌዲዲ ጳውሎሳ ቦላ ዴንዲዳ፤ ፒርዳ ዎምቦራ ሲንሐ ሺሺዲ፥

¹³ «ሃይሲ ኣዴዚ ዎጋፔ ካሬራ ኣሳይ ጸሳሰ ጎይናና ማላ ኣሳ ባሌሌስ» ጌዲ።

¹⁴ ጳውሎሲ ሃሳያና ቡሮ ዶና ዶይሺን ጋልዮሲ ኣይሁዳታ፥ «ኢንቴኖ ኣይሁዳ ኣሳቶ! ኢንቴ ሺሺዳ ዮኦይ ዴሬ ዴንሌዎ ዎይኮ ዴሬ ጌታ ሜቶን ዬጊዛ ዮኦ ጌዲዳኮ ታ ዎዚናፔ ሲያናሺን።

¹⁵ ጌዶ ኣቲን ኢንቴ ፓላማይ ኢሲ ኢሲ ቃላታ ጌሻሲኔ ኢሲ ኢሲ ሱንፋታ ጌሻሰ ቃሴካ ኢንቴ ዎጋ ጌሻሰ ጌዲዳ ጌሻሰ ኢንቴ ሄን ኢንቴ ባጋራ ወርሲቲ፤ ታ ሄሳ ማላ ዮኦ ፒርዳናሰ ኮይኬ» ጌዴስ።

¹⁶ ሄሳ ጌሻሰ ፒርዳ ዎምቦራ ሲንፋፌ ኢስታ ኬሲዴስ።

17 ሄ ዎዴ ወሪካ አይሁዳ ዋሳ ኩፋ ሃላቃ ሶስቲኔሴ ጌቲቲዛይሳ ኦይኪዲ ፒርዳ ኩፋ ሲንፋን ቡኪዳ፤ ጋልዮሲ ጊዲኮ ሄሳ ወዳንካ ዩጊቤና።

ጲርሲቁላ፥ አቁላኔ አጲሎሳ

18 ሄሳፌ ጉዬ ጳውሎሲ ቆርንቶሴ ካታማን ዳሮ ዎዴ ጋምኢዴስ፤ ሄፔካ አማኒዛ አሳይ ሞይዚን ጲርሲቁላራኔ አቁላራ ኢሲፌ ማርካቤን ጌሊዲ ሶሪያ ጌቲቲዛሶ ቢዴስ፤ አዲና * ጋፋናስ ኪንኪራኦሴ ጌቲቲዛሶን ባ ሁኤ ሜዴቲዴስ።

19 ኤፌሶኔ ጋኪዳ ማላ ጲርሲቁላኔ አቁላ ሄን አጊዲ ጳውሎሲ አይሁዳታ ዋሳ ኩፍ ጌሊዲ አይሁዳታራ ሃሳዬቲዴስ።

20 ባናራ ጋምኦና ማላ ኢስቲ ኦይቺን ኢዚ፥ «አካይ» ጊዲ ኢጲዴስ።

21 ጊዶ አቲን ኢዚ ኢስታፌ ሻኬቲሼ፥ «ጸሳ ሼኔ ጊዲኮ ታ ሲማዳ ያና» ጊዴስ፤ ኤፌሶኔፔ ዴንዲዲ ማርካቤን ጌሊዲ ቢዴስ።

22 ቁሳሪያ ጌቲቲዛሶ ጋኪዳፔ ጉዬ ኬዚዲ አማኒዛይታ ሳሮ ጊዲ ሄፔ አንጾኪያ ዎጲዴስ።

23 አንጾኪያን ጉፋ ዎዴ ታኪዳፔ ጉዬ ሄፔ ዴንዲዲ ጋላቲያ ባጋራኔ ፒርጊያ ጌቲቲዛ ዴሬታራ ዩዩ አጲዲ አማኒዛይታ ሚንፌሊዴስ።

24 ሄ ዎዴ ኢሲ ኢስኪንዲሪያ ካታማን ዩሌቲዳ አጲሎሳ ጌቲቲዛ ኢሲ አይሁዳ ኦሲ ኤፌሶኔ ዩዴስ፤ ኢዚካ ታማርዳዴኔ ጌሻ ማጻፋታ ሎኤሊ ኤሪዛዴ።

25 ኢዚ ጎዳ ኦጌ ታማርዳዴኔ ዩሱሳ ጊሻስ ባላይ ባይንዳ ሃሳይዛዴኔ ጲሎ አያናን ጽጌቲሼ ታማርሲዛዴ፤ ጊዶ አቲን ኢዚ ሎኤሊ ኤሪዛይ ዮሃኒሳ ጸንቃታ ጸላላ።

26 ኢዚካ አይሁዳ ዋሳ ኩፋን ባቦንታ ዮቶ ኦይኪዴስ፤ ጲርሲቁላይኔ አቁላይ ኢዚ ጊዛይሳ ሲዩዲ ኢዛ ባሶ ኤፌዲ ጸሳ ኦጌ ኢዛ ካሴፔ ሎኤሊ ኤሪሲዳ።

27 አጲሎሲ አካያ ባናስ ኮዬን አማኒዛይቲ ኢዛ ሚንፌሊዳ፤ ሄን ዲዛ አማኒዛ አሳይካ ኢዛ ሞኪ ኤካና ማላ ኢዛስ ዲብዳቤ ጸፊዳ፤ ኢዚ ሄ ጋኪዳ ማላ ኢዛስ ዲዛ ኢሞታፔ ዴንዲዳይሳን አማኒዛይታ ዳሮ ማዲዛዴ ጊዲዴስ።

* **18:18** አዲና፥ አዲና ጊዛይሳ ኢሲ ኢሲ ባጋ ጋሞፋ ቃላን፥ «ታሳላ ዎይኮ ጋላታስ ኢሜቲዛ ኢሞታ» ጌቲስ። **18:18** ታይ 6:18

28 ገሻ ማጻፋታ ያይሳ ሃይሳራ ጋሊ ማርካሲ ማርካሲ ዬሱሲ ኢዚ ከርሰቶሳ ገዲዳይሳ አይሁዳታራ ዳሮ ፓላሜቲዲ ዴሬ ሲንሳን ኢስታ ላሊዴስ።

19

ኤፌሶንን ጳውሎሳ

1 አጲሎሲ ቆሮንቶሴን ዲዛ ዎዴ ጳውሎሲ ፑዴሃ ባጋ ዴሬራ ካንሊዲ ኤፌሶን ዩዲ ሄን ዲዛ ኢሲ ኢሲ አማኒዛ አሳታ ዴሚዲ፤

2 «ኢንቴ አማኒዳ ዎዴ ጲሎ አያና ኤኪዴቲ?» ገዴስ፤ ኢስቲካ «ኤኪቤኮ ሃራይ አቶሺን ጲሎ አያናይ ዲዛኮ ኑ ሲዩቤኮ» ገዲ።

3 ጳውሎሲካ ኢስታ፡ «ሂስቲን ኢንቴ አዛን ጳማቄቲዴቲ?» ገዴስ፤ ኢስቲካ ኢዛስ፡ «ዮሃኒሳ ጸንቃታን ጳማቄቲዴስ» ገዲ።

4 ጳውሎሲካ ኢስታስ፡ «ዮሃኒሳ ጸንቃታይ ገዲኮ አሳይ ማሮቲፋን ሲሚዳይሳ ቤሲዛ ጸንቃታኮ! ዮሃኒሲ ባ ባጋራ አሳይ ኢዛፔ ጉዬራ ዩዛ ዬሱሳ አማናና ማላ ዮቲዴስ» ገዴስ።

5 ኢስቲካ ሄሳ ሲዩዳፔ ጉዬ ጎዳ ዬሱሳ ሱንሳን ጳማቄቲዴ።

6 ጳውሎሲካ ኢስታ ቦላ ባ ኩሺ ዎሊዳ ማላ ጲሎ አያናይ ኢስታ ቦላ ዎሊን ኢስቲ ዴማ ዴሬታ ቃላራ ሃሳይዳ፤ ቲንቢቲካ ዮቲዴ።

7 ሄ አሳቲ ዉሪካ ታማኔ ናምኡ ገዲዛይታ።

8 ጳውሎሲ አይሁዳታ ዎሳ ኬሌ ጌሊዲ ጸሳ ካዎቴፋ ገሻስ ሃሳዬቲሼኔ ኢስታ አማንሊሼ ሄዡ ኣገና ኩሜላ ኦናስካ ባቦንታ አሳስ ቆንጨሲ ዮቲዴስ።

9 ኢሲ ኢሲ አሳይ ፓላማ ጸንኢ ገዲ አማናናስ ኮዩቤና፤ ጎዳ ኦጌ ቆንጨን ኢጲዳ፤ ሄሳ ገሻስ ጳውሎሲ ኢስታ ኣገዲ ሃራሶ ቢዴስ፤ አማኒዛይታካ ዴማ ሻኪ ኬሲዲ ጸራኖሴ ቲሚርቲ ኬፋን ጋላስ ጋላስ ኢስታራ ሃሳዬቲዴስ።

10 ሄሳ ማላ ኦሶን ናምኡ ላይላ ጋምኢዳ ገሻስ ኢሲያ አዉራጃን ዲዛ አይሁዳቲኔ ገሪኬ አሳይ ዉሪ ጎዳ ቃላ ሲያና ዳንዳይዴስ።

11 ጸሲ ጳውሎሳ ባጋራ ዳሮ ማላሊሲዛ ማላታ ኦሊዴስ።

12 ማራቤ ዎይኮ ኢዛ አሳቴላ ቦቺዳ ጫርቃ ኤፊዲ ሃርጋንቻታ ቦቺኮ ሃርጌይ ዬዴስ፤ ቱና አያናቲካ ባ ኦይኪዳ አሳፔ ኬዜቴስ።

13 ዩዩ ዩዩ አሳፔ ዳይዳንል ኬሲዛ ኢሲ ኢሲ አይሁዳ አሳቲ፥ «ጳውሎሲ ሳባኪዛ ዩሱሳ ሱንፋን ኢንቲ ኬዛና ማላ አዛዛይስ» ጊዲ ጎዳ ሱንል ቱና አያናቲ ኦይኪዳ አሳታ ቦላ ጴይጋና ፓጪዳ።

14 ኢሲ አይሁዳታፔ ጊዲዳ ቄሴታ ሃላቃ አስቆዌስ አቱማ ና ላፑናቲ ሄሳሶ ኦሊዳ።

15 ቱና አያናይካ፥ «ታ ዩሱሳካ ኤራይስ፤ ጳውሎሳካ ኤራይስ ሺን ኢንቲ ቃሴ ኦናንቲ?» ጊዴስ።

16 ቃሴካ ቱና አያናይ ኢዛ ኦይኪዳዴይ ጉፒዲ አሳታ ኦይኪዴስ፤ ኢስታ ቦላ ዋልቃቲዲ ዳሮ ሚኒን ማዱንጺዲ ኬፋፊ ሜላ ካሎ ባቃቲዳ።

17 ሄሲካ ኤፌሶን ዲዛ አይሁዳታ አቻኒኔ ገሪኬ አሳ ኡባ አቻን ኤሬቲን ወሪካ ባቢዳ፤ ሄሳንካ ጎዳ ዩሱሳ ሱንፋ ሶንቹቲዴስ።

18 አማኒዳ አሳፔ ዳሮይ ሸቂዲ ባ ኢታ ኦሶ ቆንጩን ፓጺዴስ።

19 ማሮ ማሮተዛይታፔ ዳሮቲ ባ ማሮተዛ ማጻፋ ሺሺዲ ዴሬ ሲንፋን ታማን ጹጊዳ፤ ማጻፋ ዋጋይ ሺሺ ቆዲን ኢቻሹ ታሙሺ ቢራ ማላ ጊዲዴስ።

20 ሃይሳ ማላን ጎዳ ቃላይ ኬሂ ዲጪሸኔ ጸኒ ጸኒ ቢዴስ።

21 ሃይሲ ወሪ ሃንዳፔ ጉዬ ጳውሎሲ ማቂዶኒያራኔ አካያ ባጋራ አጲዲ ዩሩሳላሜ ባናስ ቆፋ ቃቺዲ፥ «ታ ሄ ጋኪዳፔ ጉዬ ታ ኦሮሜ ቃሴካ ቤያና ኮሼስ» ጊዴስ።

22 ባና ማዲዛይታፔ ናምአታ ጸምቶሳኔ ኤሪስጸሳ ጌዴ ማቂዶኒያ ጌቲቲዛሶ ኪቲዲ ባስ ኢሲያ አወራጃን ጉፋ ዋዴ ሄን ዴኢዴስ።

ኤፌሶን ዴንዲዳ ሺሮ

23 ሄ ዋዴ ጎዳ ኦጌ ጊሻስ ዳሮ ሺሮይ ሜዴቲዴስ።

24 ዲሜጺሮሳ ጌቲቲዛ ኢሲ ቢራ ቆጺዛይሲ አርጾሚሴ ጌቲቲዛ ኤቃ ሚስሌ ቢራፔ ሴሪሲ ሜዲ ሜዲ ሂላንቻታስ ዋዴ ሚሼ ዴሚሴስ።

25 ኢዚካ ሄ ሂላንቻታን ሄሳ ማላ ኦሶን አቂዛ ሃራ አሳታ ኢሲ ቦላ ሺሺዲ፥ «ኦሶ! ሃይሲ ኦሶዚ ኑስ ሚሽ ኬሲዛይሳ ኢንቲ ኤሬታ።

26 ሃይሲ ጳውሎሳ ጌቲቲዛይሲ ኤፌሶን ጸላ ጊዶንታ ኩሜፋ ኢሲያ አወራጃን ዲዛ ዳሮ ዴሬዛ አማንፊ አማንፊ ባሌዲዛይሳ ኢንቲ ወሪካ ቤኢዛይሳ ማላኔ ሲዩዛይሳ ማላ፥ «አሳ ኩሼን ኦሴቲዳ ኤቃቲ ሙሌካ ጸስ ጊዴቲና» ጊ ዮቲስ።

27 ሃይሳ ኑ ኦሶዛሰ ሎኦ ሱንፋ ሂራይሲዛይሳፌ ቦላራ ኩሜላ ኢሲያይኔ ኩሜላ አላሜይ ጎይኒዛ ዋጋ አርጾሚሴ ኤቃ ኬላይካ ጎኅይ ባይንዳይሳ ጊዳና፤ ቃሴካ ኬሂ ቶቄ ጊዳ ኢዚ ቦንቸይካ ካወያና» ጊዳሰ።

28 አሳይ ሄሳ ሲዪዲ ኢታ ሃንቆ ሃንቄቲዲ፥ «ኤፌሶኔ አርጾሚሳ ዋጋ ጊታ!» ጊዲ ዋሶ ዶሚዳሰ።

29 ሄራካ ኩሜላ ካታማይ ሺሮቲዳሰ፤ ዳሬይካ ወሪ ኢሲ ቦላ ጊዲዲ ማቂዶኒያ አሳ ጊዲዳይታኔ ጳውሎሳራ ኢሲፌ ዩዩዛ ኢዛ ላጌታ ጋዩዮሳኔ አሪሰጺሮኮሳ ኦይኪዲ ዳሬይ ካሴ ካኢዛሶ ዋላን ጌሊዳ።

30 ጳውሎሲካ ካሬ ኬዚዲ አሳ ሲንሐ ሸቃና ኮዪን አማኒዛይቲ ዲጊዳ።

31 ሄ አወራጃ ዳናታፔ ኢሲ ኢሲ ጳውሎሳ ላጌቲ ጳውሎሲ አሳይ ካሴ ካኢዛሶ ጸሊዲ ጌሎንታ ማላ አሰ ከቲዲ ዋሲዳ።

32 ሸቂዳ አሳይ ኡንኤቲዲ አሳይ ኢሲ ሚሽ ሃሳይሺን ሃራይ ቃሴ ሃራ ሃሳዬሰኔ አሳይ ወሪ ዋሴሰ፤ ዳሪዛ ባጋ አሳይ አዛሰ ሄን ሸቂዳኮ ኤሬና።

33 አይሁዳ አሳይ ኢሰከንዲሮሳ ጌቲቲዛይሳ ዳራ ጊዶፌ ሱጌሬሐ ሲንሐ ኬሲዳ ዋዳ ኢሲ ኢሲ አሳቲ ባ ጊሻሰ ኢዚ ሃሳያና ማላ ዋሲዳ፤ ኢዚካ ኢሰታ ጊሻሰ ፓላሚታና ኮዪዲ አሳይ ጮኡ ጋና ማላ ማላቲ ቤሲዳሰ።

34 ጊዶ አቲን ኢዚ አይሁዳ አሰ ጊዲዳይሳ ኤሪዳ ዋዳ ወሪካ ኢሲ ቦላ፥ «ኤፌሶኔ አርጾሚሳ ዋጋ ጊታ!» ጊሼ ናሞኡ ሳቲ ማላ አሳይ ዋሲዳሰ።

35 ሄ ካታማሰ ዋና ጳፌይ አሳ ጮኡ ሂሰቲዲ፥ «ኢንቴኖ ኤፌሶኔ አሳቶ! ጊታ አርጾሚሲ ኤቃ ኬላዮኔ ሳሎፔ ዋዲዳ ኢዚ ሚሰሌ ናጊዛይ ኤፌሶኔ ካታማ አሰ ጊዲዳይሳ ኤሮንታይ ኦኔ?

36 ሄሳ ጊሻሰ ሃይሲ ሃ ቱማይ ካዳታና ዳንዳዬቶንታይሳ ማላ ኢንቴ ጉሐ ዩሺ ቆፓናሲኔ ሎዲ ጋናሰ ቤሲሰ።

37 ሃይታ አሳታ ጸሳ ኬላ ቦንቆንታ ዋይኮ ኑ ጸሰ ጊዲዳይሳ ቦላ ጫሻ ቃላ ዳንሶንታ ዲሺን ኢንቴ ኦይኪዲ ሃ ጋላናሰ ጮ ኤሂዳታ።

38 «ሄሳ ጊሻሰ ዲሞጲሮሲኔ ኢዛራ ዲዛ ቢራ ሴሪሲ ኦሊዛ ሂላንቻቲ ኦና ቦላካ ሞቲዛ ዮኦይ ዲኮ ፒርዳ ኬላይ ኢሰታሰ ዶያ ዳሰ፤ ዳናቲካ ዴታሰ፤ ባ ኮዪዳዴ ሞታናሰ ዳንዳዬሰ።

39 ሃይሳፌ ሃራ ጋናሰ ኢንቴ ኮይኮ ዋጋይ ዲዛ ሺቆሶን ቤዬቶ።

40 ሄሲ አቲኮ ሃች ሃኒዳ ሺሮይ ኑና ሞቲሶንታ ማላ ሂርጊሴስ፤ ሞቶስ ጋሊዛ ጋሶይካ ባይንዳ ጊሻስ ሃ ሃኒዳ ሺሮዛ ጊሻስ ኑ ኦይሼቲኮ ጋናዚ ኑስ ዴና» ጊዴስ።

41 ኢዚ ሄሳ ጊዳፔ ጉዬ ሺቆይ ላሌቲዴስ።

20

ጳውሎሲ ማቂዶኒያኔ ጊሪኬ ቡስ

1 አሳይ ጮኡ ጊዳፔ ጉዬ ጳውሎሲ አማኒዛይታ ኢሲ ቦላ ጴይጊዲ ኢስታ ሚንፊሊዛ ቃላራ ዘሪዳፔ ጉዬ ኢስታ ሳሮኪዲ ማቂዶኒያ ባና ኬዚዴስ።

2 ኢዚ አቂ ቢዛ ዴሪን ዲዛ አማኒዛ አሳ ሎኤሊ ዘሪን ሚንፊሊሺ ጊሪኬ ዴሪ ቢዴስ።

3 ጊሪኬን ሄዡ አገና ታኪዳፔ ጉዬ ማርካቤራ ሶሪያ ጌቲቲዛ ዴሪ ባናስ ቆፒዴስ ሺን አይሁዳ አሳቲ ኢዛ ቦላ ኢታ ሚሽ ኦላና ዘሪቲዳይሳ ኤሪዲ ማቂዶኒያ ባጋራ ባና ቆፋ ቃቺዴስ።

4 ቤሪያፔ ጳሪዮሳ ና ሶጳጺሮሲ፥ ታሶሎንቄፌ አሪስጺሮኮሲኔ ሲኮንዶሲ፥ ዳርቤኔፔ ጋዬዮሲኔ ጸምቶሲ፥ ኢሲያፔ ጸርፊሞሲኔ ቲቂቆሲ ጳውሎሳራ ኢሲፌ ቢዳ።

5 ሄይቲ ዉሪ ኑፔ ካሴቲዲ ጸርኣዳን ኑና ናጊዳ።

6 ኑ ቃሴ ኡኬላ ባኣሌፔ ጉዬ ፒሊጲሲዮሴፔ ማርካቤን ኢስቲ ዲዛሶ ጸርኣዳ ጌቲቲዛሶ ኢቻሻንላ ጋላስ ጋኪዲ ሄን ላፑን ጋላስ ጋሞኢዶስ።

ጳውሎሲ ዉርሴላን ጸርኣዳ ቡስ

7 ሳሚንታፌ ኮይሮ ዋጋ ጋላስ ኢሲፌ ካሐ ማናስ ኑ ሺቂ ዲሺን ጳውሎሲ ዋንቶ ባናስ ኮሺዛ ጊሻስ ሺቂዳ አሳስ ቃላ ዮቲሺን ኢዚ ዮኦዛ ሌላ ጊዶሐ ጋካናስ ኣዲሲዴስ። *

8 ቦላ ፎቄን ዳሮ ፖኦይ ዲዛሶን ኑ ሺቂዶስ።

9 ኣዉጾኪሴ ጌቲቲዛ ኢሲ ናቴላ ናይ ማስኮቲ ቦላ ኡቲ ዲሺን ጳውሎሲ ዮኦዛ ኣዲሲዳይሳፌ ዴንዲዳይሳን ኢዛ ቂስኮይ ኤኪ ቢዴስ፤ ዋልቃማ ቂስኮን ጸኔቲዲ ቦላ ሄዡንሶ ፎቄፔ ዴጌ ኩንዲን አሳይ ዴንሊዛ ዋዴ ሃይቂ ቤቲዴስ።

10 ጊዶ አቲን ጳውሎሲ ዴጌ ዋቂዲ ናዛ ቦላ ሆኪ ኢዲሚዲ፥ «ሃይቂቤና ፓጳ ዴስ፥ ዳጋሞፍቲ!» ጊዴስ።

* 20:7 «ሳሚንታፌ ኮይሮ ጋላሳን» ቂራ ኦማርስ ዋጋይ ዋንታናዉ ጉሳ።

11 ጳውሎሲ ሄሳፌ ፑዴ ፎቄ ኬዚዲ ኡኬላ ማንሉዲ አማኒዛይታራ ሚዴሰ፤ ጋዴይ ዋንታና ጋካናሰ አሳታራ ሃሳዬቲሼ ጋምኢ ቢዴሰ።

12 አሳይካ ሃይቆፔ ፓጺዳ ናዛ ኢዛሶ ኤፊዲ ወሪካ ኡፋዬቲዴሰ።

ጳውሎሲ ጸረኣዳፌ ሚሊጺኔ ጌቴቲዛሶ ቡሰ

13 ኑኒ ጳውሎሳ ማርካቤን ጌልላና ኮዬዳ ጊሻሰ ካሴቲዲ ማርካቤን አሶሳ ጌቴቲዛሶ ቢዴሰ፤ ኑ ሄሳ ኦሊዳይ ጳውሎሲ አሶሳ ጋካናሰ ቶሆራ ባና ኮዬዳ ጊሻሲኔ ኑ ሲንሐ ባና ማላ ኢዚ አዛዚዳ ጊሻሳ።

14 ኑ ኢዛራ አሶሳን ጋጊዲ ኢዚ ማርካቤን ጌሊን ኢዛራ ኢሲፌ ሚጺሊኔ ቢዴሰ።

15 ዋንቲላ ጋላሰ ሄፔ ዴንዲዲ ሲንላራ ዲዛ ኪኦሴ ጌቴቲዛሶ ጋኪዴሰ፤ ቃሴ ዋንቲላ ጋላሰ ሳሞሴ ጌቴቲዛሶ ፒኒዲ ሄፔ ዋንቲላ ጋላሰ ሚሊጺ ጋኪዴሰ።

16 ጳንጾቆስቴ ጌቴቲዛ አይሁዳታ ፓዚጋ ባኣሌ ባሰ ዳንዳዬቲዳ ማላ ቦንቻና ዬሩሳላሜን ቤታና ኮዬዲ ኢዚ ኢሲያን ዋዴይ ኣጵንታ ዲሺን ኤፌሶኔ ኣጼ ባናሰ ኮዬዴሰ። ኢዚ ሄሳሶ ኦላና ኮዬዲይ ጳንጾቆስቴ ባኣሌሰ ዬሩሳላሜን ቤታናሰ ኮዬዳ ጊሻሳ።

ጳውሎሲ ኤፌሶኔ ዋሳ ኬላ ጨማታራ ወርሴላ ሞይዞ ሳርካ ሳርኬቴሐ

17 ጳውሎሲ ሚሊጾፔ ኤፌሶኔ ዋሳ ኬላ ጨማታ ኣሴ ኪቲዲ ዴይጊሲዴሰ።

18 ኢሰቲካ ዪን ጳውሎሲ ኢሰታ፡ «ታ ኢሲያ ጌሊዳ ጋላሳፌ ሃ ሲሚን ኡባ ዋዴ ታ ኢንቴናራ ዋና ዋና ዴኢዳኮ ኢንቴ ኤሬታ።

19 አይሁዳቲ ታ ቦላ አሳ ዴንሉዲ ሂሊዳ ጋሶን ዳሮ ሜቶይ ታ ቦላ ጋኪኮካ ታኒ ኩሜላ አሽኬቴላራኔ ኣፋንላራ ጎዳሰ ኦላዲሰ።

20 ጮ ዴምባንካ፡ ኢንቴሶን ኢንቴሶን ታኒ ኢንቴና ታማርሳሼ ጎኢዛይሳ ወርሳ ኢንቴሰ ዮታዲሰ ኣቲን ኢንቴና ጎኢዛ ሚሻፌ አይኮካ አሻቤኬ።

21 አይሁዳ አሳታ ጊዲንካ ጊሪኬ አሳ ጊዲንካ ማሮቴላን ጌሊዲ ጳሳኮ ሲማና ማላኔ ጎዳ ዬሱሳን ኣማናና ማላ ሎኤላ ዮታዲሰ።

22 «ሃኢካ ታ ሄ ጋኪሺን ታ ቦላ ኣዚ ጋካናኮ ኤሪኬ ሺን ጸሎ ኣያናይ ታና ኣዛዚዳ ማላ ዬሩሳላሜ ባይሰ።

23 ሄን ታና ዱማ ዱማ ቃሾይኔ ሜቶይ ናጊዛይሳ ጸሎ አያናይ ታስ የቲዳስ።

24 ጊዶ አቲን ጎዳ ዩሱሲ ታስ ኢሚዳ ዋላ ዋጸ ወርሳና ጋካናሲኔ አሶዛ ታ ፖላና ጋካናስ ታኒ ታ ሼምፖስ ሚሼቲኬ፤ ታስ ኢሜቲዳ አሶይካ ጸሳ ሚሺራቾ ቃላ የቶኮ።

25 «ሃኢ ጋካናስ ታ ኢንቴ ጊዶን ሲሜሬታሼ ጸሳ ካዎቴል ሳባካዲስ፤ ሃይሳፌ ጉዬ ኢንቴፌ ኦኒካ ሙሌ ታ አይፌሶ ቤኦንታይሳ ታ ኤራይስ።

26 ሄሳ ጊሻስ ኢንቴፌ አሳዳይካ ቆይኮ ታ አይሼቶንታይሳ ሃቶ ታ ኢንቴና ኤሪሳይስ።

27 አይስ ጊኮ ታ ጸሳ ቆፋ ወርሳ ኢንቴስ የታዲስ አቲን አይኮካ ታ የቶንታ አሺዳይ ዳና።

28 ጸሎ አያናይ ኢንቴና ጸሳ ዶርሳታ ሄማናስ ሹሚዳስ፤ ሄሳ ጊሻስ ኢንቴ ሁኤሲኔ ጸሳ ዶርሳታስ ናጌቲቲ፤ ጎዳይ ባ ሱላን ዋዚዳ ዋሳ ከላዮ ናጌቲ።

29 ታ ቢዳፔ ጉዬ ጸሳ ዶርሳታስ ሚሼቶንታ ኢታ አሳቲ ኢንቴ ጋርስ ጌላናይሳ ታ ኤራይስ።

30 ሄሳሶካ ኢሲ ኢሲ አሳቲ ኢንቴ ጊዶፌ ዴንዲዲ ጌላ የኦ ኢንቴና ታማርሲዲ አማኒዛ አሳፔ ዳርታ ጌዴ ባኮ ዛራና።

31 ሄሳ ጊሻስ ኢንቴና ኢሳ ኢሳ ሄቹ ላይል ቃማኔ ጋላስ አፋንላን ዘሪዳይሳ ዩሺ ቆፒቲኔ ናጌቲቲ።

32 «ሃኢካ ኢንቴና ጸሳስ ሚንሉ ኤሳናሲኔ አማኒዛይታ ጊዶን ኢንቴስ ላታሶ አማናስ ዳንዳይዛ ኢዛ አጾ ኪያቴላ ቃላስ ታ ሃዳራ ኢማዲስ።

33 ታ ኦና ቢራካ ዋርቃካ ዋይኮ ማይኦ አሞታቤኬ።

34 ታኒ ታ ኩሼን ኦላ ኦላዳ ታስ ማዴታዳ ታናራ ዲዛይታካ ማዲዳይሳ ኢንቴካ ኤሪታ።

35 «ሃ ኤኪዛዴፌ ጌዴ ኢሚዛዴይ ኦንጃቲዳዴ» ጊዛ ጎዳ ዩሱሳ ቃላ ኑ ዩሺ ቆፒዲ ኑርካ ኑ ኩሼራ ኑ ኦሉ ዴሚዲ ሃራ ዳቡራንቻታ ጌዴ ማዳናስ ኑስ ቤሲዛይሳ ታ ኢንቴና ዳር ዱማ ዱማ ኦጌራ ቤሳዲስ» ጊዴስ።

36 ሄሳፌ ጉዬ ጳውሎሲ ኡባ አሳራ ጉልባቲዲ ዋሲዳስ።

37 አሳይ ወሪ ዩኪሼ ጳውሎሳ ኢዲሚ ኦይኪዲ ዩሪዴስ።

38 ሃራፔካ ኢስቲ ዳር ሚሼቲዳይ ኢዚ፤ «ሃይሳፌ ጉዬ ኢንቴ ናሞኦንላ ታና ቤዬኬታ» ጊዳ ጊሻሳ፤ ሄፔካ ኢዛ ማርካቤኮ ጋካናስ ሞይዚዳ።

21

ጳውሎስ ዩሩሳሌም ቡስ

¹ ኑ ኢስታፌ ሻኬቲዲኔ ማርካቤን ጌሊዲ ሲቲ ጌዲ ቆሴ ጌቲቲዛ አባ ጌዶን ዲዛ ዴሬ ቢዶስ፤ ዋንቱፋ ጋላስ ሃራ ኤሮዶስ ጌቲቲዛ አባ ጌዶን ዲዛ ዴሬ ጋኪዶስ፤ ሄፔካ ኢሲ ጳጺራ ጌቲቲዛ ካታማ ቢዶስ።

² ሄን ፒንቄ ጌቲቲዛሶ ቢዛ ማርካቤ ዲዛሮ ዴሚዲ ኢዚን ጌሊዲ ቢዶስ።

³ አባ ጌዶን ዲዛ ቆጶሮስ ጌቲቲዛ ዴሬ ሃዲርሳ ባጋን ዩጌዲ ሶሪያ ጌቲቲዛ ዴሬ ቢዲ ጶሮስ ጌቲቲዛ አባ ኣቻን ዲዛ ዴሬ ቢዶስ፤ ሄሳስ ጋሶይካ ማርካቤያ ባ ጫኔቲዳ ጫና ሄን ዋፋናስ ኮሺዛ ጊሻሳ።

⁴ ሄን አማኒዛይታ ኮዬ ዴሚዲ ኢስታራ ላፑን ጋላስ ጋምኢዶስ፤ ኢስቲካ ጸሎ ኣያና ካሌፉን ጳውሎሳ፥ «ዩሩሳሌም ቦፓ» ጌዲ ዮቲዳ።

⁵ ኑ ሄን ጋምኣና ዋዴይ ወሪን ኢስታፌ ሻኬቲዲ ኑ ኦኔ ቢዶስ፤ ኢስቲ ወሪ ባ ማቹታራኔ ባ ናይታራ ኢሲፌ ካታማፔ ካሬ ኬዛና ጋካናስ ኑና ዋይዚዳ፤ አባ ኣቻን ኑ ወሪ ጉልባቲዲ ዋሲዳፔ ጉዬ ዴንዲዲ ኢሶይ ኢሳራ ሳሮኬቲዲ ሻኬቲዶስ።

⁶ ሄሳፌ ጉዬ ኑ ማርካቤን ጌሊን ኢስቲ ባሶ ሲሚዳ።

⁷ ኑ ጶሮስፔ ዴንዲዲ ጌዴ ጸጸላማይሴ ጌቲቲዛሶ ጋኪዶስ፤ ሄንካ አማኒዛ አሳራ ጋጊ ሳሮኬቲዲ ሄን ኢስታ ኣቻን ኢሲ ጋላስ ጋምኢዶስ።

⁸ ዋንቱፋ ጋላስ ሄፔ ኬዚዲ ቂሳሪያ ጌቲቲዛሶ ቢዶስ፤ ቂሳሪያን ላፑን ዳቆኔታፔ ኢሳ ዋንጌላዌ ፒሊጶሳሶ ጌሊዲ ኢዛ ኣቻን ሽምፒዶስ።

⁹ ኢዛስ ናቤ ጌዲዳ ኦይዱ ጌሎንታ ጌላኦቲ ዴቲስ።

¹⁰ ዳሮ ጋላስ ኑ ሄን ጋምኢን ኢሲ ኣጋሶሳ ጌቲቲዛ ናቤዚ ዩሁዳ ዴሬፔ ዩዴስ።

¹¹ ሄ ናቤይ ኑኮ ሽቂዲ ጳውሎሳ ዳንጮ ኤኪዲ ባ ቶሆኔ ባ ኩሼ ቃቹዳ፥ «ጸሎ ኣያናይ ሃይሳ ዳንጫ ጎዳ ዩሩሳሌምን ዲዛ ኣይሁዳ አሳቲ ሃይሳፉ ቃቹዲ ኣይዛቤታስ አዲ አማና ጌስ» ጌዴስ።

¹² ሄሳ ሲዩዲ ኑኒካ ኑናራ ዲዛ አሳይካ ጳውሎስ ዩሩሳሌም ቦንታ ማላ ዋሲዶስ።

13 ቃሴ ጳውሎሲ፥ «እንቴ አይሰ ዩኪ ዩኪዲ ታ ዋዚና ሜንሐቲ? ታኒ ጎዳ ዩሱሳ ሱንፋ ጊሻሰ ዩሩሳላሜን ቃሾ ጸላላ ጊደንታ ሃይቃናሰካ ጊቤታዲሰ» ጊዳሰ።

14 ኢዚ ኑ ዘሬ ኤኮንታ ኢጸን፥ «ሂሰቲኮ ጎዳ ሼኔይ ሃኖ» ጊዲ አጋጊደሰ።

15 ኑ ሄን ጉፋ ጋላሳታ ጋምኢዳፔ ጉዬ ኑ ሚሼ ኡባ ጊግሲ ኤኪዲ ዩሩሳላሜ ቢደሰ።

16 ቁሳሪያን ዲዛ ኢሲ ኢሲ አማኒዛይቲ ኑናራ ኢሲፌ ዩዳ፤ ኢሰቲካ ኑኒ ሚናሶኔ ኬፋን ዳና ማላ ኑና ኢዛሶ ካሌሐዳ፤ ሚናሶኒ ካሰቲዲ አማኒዳ ቆጲርሴ ዴሬ አሳ።

ጳውሎሲ ዩሩሳላሜን ያቆቤ ቤዪደሰ

17 ኑ ዩሩሳላሜ ጋኪዳ ማላ አማኒዛይቲ ኑና ኡፋይሳን ሞኪ ኤኪዲ።

18 ዋንቴፋ ጋላሰ ጳውሎሲ ኑናራ ያቆቤኮ ቢደሰ፤ ሄ ዋዴ ዋሳ ኬፋ ጨማቲ ሄን ዴቴሰ።

19 ጳውሎሲ አሳ ወርሲ ሳሮኪዳፔ ጉዬ ጸሲ ኢዛ ባጋራ አይዛቤታ ጊደን ኦሐዳይሳ ኡባ ኢሲኖ አሾንታ ዮቲደሰ።

20 ሄሳ ሲዪዲ አሳይ ወሪ ጸሰ ጋላቲደሰ፤ ጳውሎሲካ፥ «ኑ አሻዞ ዳሮ ሺያን ቆዴቲዛ አማኒዛይቲ አይሁዳታ ጊደን ዲዛይሳኔ ወሪካ ሙሴ ዋጋ ዋዚናፔ ናጊዛይታ ጊዲዳይሳ ኔካ ኤራሳ።

21 ኔኒ አይዛቤታ ጊደን ዲዛ አይሁዳታ፥ «እንቴ ናይታ ቃጸሮፔቲ ዋይኮ ዋጋታ ኦሶፍቱ» ጋዳ ኔ ታማርሲዳ አሳይ ሙሴ ዋጋ ሻራና ማላ ኦሐሰ ጊዛ ዋሬ አሳይ ሲዪደሰ።

22 ሂሰቲን ሃኢ አዜ ሎኦይ? ሃኢ ኔ ዩሳ አሳይ ሲዮንታ አጌና።

23 ሄሳ ጊሻሰ ኑ ኔና ጊዛይሳ ኦላ፤ ኑ አቻን ታሳላ ጋላና ዩዳ አይዲ አሳቲ ዴቴሰ።

24 ኔ ኢሰታ ኔናራ ኤካዳ ኢሰታራ ጊዳዳ ኔና ጌሻ፤ አሳቲ ባ ሁኤ ሜዴታና ማላኔ ጸሳ ኬፋን አሜቲዛ ሙጹዋታ ሚሻ ኔ ኢሰታሰ ቃንጸ፤ ኔ ሄሳሶ ኦሐኮ ኔ ቦላ ዋሬቲዳይሲ ወሪ ጮ ሃዳ ጊዲዳይሳኔ ኔካ ሙሴ ዋጋ ፖላ ናጊዛዴ ጊዲዳይሳ አሳይ ወሪ ኤራና።

25 ሄንኮ አይዛቤታፔ አማኒዳይታ ጊሻሰ ጊዲኮ፥ «ኤቃሰ ሹኬቲዲ ቲኒዳይሳ ሞፒቲ፤ ሱሐካ ኡዮፒቲ፤ ባወታ ሃይቁዳ ሜሄ አሾ ሞፒቲ፤ ላይማፔ ሃኪቲ» ጊዲ ጨማቲ ቃቺዳ ቃላ ዳብዳቤ ጸፊዲ ኑ ኢሰታሰ ዩዲደሰ።»

26 ሄሳፌ ጉዬ ጳውሎሲ ሄ ኦይዱ አሳታ ባናራ ኤኪዱ ዋንቴላ ጋላስ ኢስታራ ባና ጌሺዳስ፤ ኢስቲ ጌይዛ ጋላሳቲ አፑን ጋላሲኮኔ ኢሳዴ ኢሳዴ ጊሻስ አሜቲዛ ሚሽ አሚዛ ዋዴይ ኣይዴኮ ኤሪሳናስ ጸሳ ኬሌ ጌሊዳስ።

ጸሳ ኬላን ጳውሎሳ ኦይኬቴላ

27 ላፑን ጋላስ ኩማና ማቲሺን ኢሲያ ዴሬፔ ዪዳ ኣይሁዳ ኣሳይ ጳውሎሳ ጸሳ ኬላን ቤኢዱ ዴራ ኢዛ ቦላ ዴንሐሊዱ ኢዛ ኦይኪዳ።

28 «ኢስራኤሌ አሳቶ! ኑና ማዲቲ! ኑ አሳኔ ኑ ዋጋ ሃይሳ ኑ ዲዛሶዛ ጫዬሽኔ ዴሬይ ዲዛሶን ኡባን አሳ ታማርሲዛይሲ ሃይሲ ኢዛኮ! ሄሲካ ጊዴና ጊዱ ኣይዛቤታ ጸሳ ኬላ ጌልሊዱ ሃይሳ ጌሻሶሆዛ ቱኒሲዳስ» ጊሼ ዋሲዳ።

29 ኢስቲ ሄሳ ጊዳ ጋሶይካ ሃይሳፌ ካሴ ኤፌሶኔ ዬሌታ ጸርፊዋሳ ኢዛራ ኢሲፌ ካታማ ጊዶን ቤኢዳ ጊሻስ ኢዛ ጳውሎሲ ጸሳ ኬሌ ኤኪ ጌሊዳ ሚሳቲዳ ጊሻሳ።

30 ኩሜላ ካታማይ ባ ጊዶን ሺርቲዳስ፤ ዴሬይ ወሪ ኢሲፌ ዋጺ ኮዪዱ ጳውሎሳ ኦይኪ ኤኪ ጸሳ ኬላ ጊቤፌ ጎሼቺ ኬሲዳስ፤ ጸሳ ኬላ ፔንጌቲ ሄራካ ጎርዴቲዳ።

31 ኣሳይ ጳውሎሳ ዋዳና ኮዪሺን፤ «ዬሩሳሌምን ዲዛ ኩሜላ ዴሬይ ባ ጊዶን ሺርቲዳስ» ጊዛ ኪታይ ኦርሜ ዋታዳራታ ኣዛዚዛይሳኮ ጋኪዳስ።

32 ሄሳ ጊሻስ ኢዚ ዋታዳራታኔ ማቶ ሃላቃታ ካሌሊዱ ኤሶን ዋጺሽ ኣሳይ ዲዛሶ ቢዳስ፤ ኣሳይ ኦላንቻታ ኣዛዚዛይሳ ቤኢዱ ጳውሎሳ ቡካ ኣጊዳስ።

33 ማቶ ሃላቃዚ ኢዛኮ ሸቂዱ ጳውሎሳ ኦይኪዱ ናምኡ ሳንሳላታን ቃሼታና ማላ ኣዛዚዱ ኢዚ ኦናኮኔ ኣይ ኦሊዳኮ ኤራናስ ኢዛ ኦይቺዳስ።

34 ዴሬይካ ባ ጊዶን ባጋይ ሄሳ፤ ባጋይ ሃይሳ ጊዳስ፤ ማቶ ሃላቃዚ ዴሬዛ ዋሶፔ ዴንዲዳይሳን ቱማይ ኣዋይሳኮኔ ኤራናስ ዴንዳዬቶንታ ኢዲን ጳውሎሳ ጌዴ ዋታዳራቲ ዲዛሶ ኤፋና ማላ ኣዛዚዳስ።

35 ጳውሎሲ ፑዴ ቶቃሶ ጋኪሺን ዴሬይ ዳሮ ሃንቆን ኢዛ ቦላ ሜቶ ጋላናስ ኮዪዳ ጊሻስ ዋታዳራቲ ኢዛ ሃሺን ቶኪ ኤፊዳ።

36 ዴሬይካ፤ «ኢዚ ሃይቆ! ሃይቆ» ጊ ዋሲሽ ኢዛ ካሊዳስ።

ጳውሎሲ ባና ኣሻና ማዲዛ ዮኦ ዮቲዳስ

37 ዋታዳራቲ ጳውሎሳ ባ ዲዛሶ ጌልፋና ማቲሺን ጳውሎሲ ዋታዳራታ አዛዚዛይሳ፡ «ታ ኔስ ኢሲ ሚሽ የታና ማላ ዳሳይ?» ጌዴስ። ማቶ ሃላቃዚካ፡ «ኔ ጌሪኬ ቃላ ኤራይ?»

38 ሂስቲን ሃኢ ማታ ዋዴ ዴሬ ጌዶን ሜቶ ዴንፊፋዳ ሼዎፖ ዋዲዳ ኦይዲ ሺ አሳ ኤካዳ ባዞ ባቃቲዳ ጌብጾ አዴዚ ኔና ዲኪ?» ጌዴስ።

39 ጳውሎሲካ፡ «ታኒ ኪልቂያ ጌዶን ዳሮ ኤሬቲዳ ጸርሴሴ ካታማን ዩሌቲዳ አይሁዳ አሳ፤ ሃይሳ አሳስ ታና የቻርኪ!» ጌዴስ።

40 ኢዚ ሃሳያና ማላ ኤሮ ጌን ጳውሎሲ ቶቃሶሆን ኤቂዲ አሳይ ጮኡ ጋና ማላ ባ ኩሼራ ማላቲዴስ፤ አሳይ ጮኡ ጌን ኢስራኤሌታ ቃላራ፡

22

1 «ታ አሻቶ! ታ አዋቶ! ታ ቦላ ዋርዶ ዋሊዳይሳስ ታ ኢንቴስ አሚዛ ዛሮ ሲዩቲ!»

2 ኢዚ አይሁዳታ ቃላራ ሃሳይሺን ሲዩዲ ካሴፔ አሳይ ጮኡ ጌዴስ፤ ጳውሎሲካ ሃሳያ ጉጂዲ፡

3 «ታኒ ኪልቂያ ጌዶን ዲዛ ጸርሴሴ ካታማን ዩሌቲዳ አይሁዳ አሳ፤ ታኒ ዲጪዳይ ጌዲኮ ሃኒን ዩራሳላሜና፤ ታ ኑ አዋታ ዋጋ ወርሳ ጋማልያሌፔ ሎኤፋ ታማራዲሴኔ ኢንቴ ሃቶ ኦሊዛይሳሶ ጸሳስ ሱሬ ዋዚናፔ ኦላሽ ዴአዲስ።

4 ሃይሳ ሃ ኦጌዛ ካሊዛ አሳታ ኡባ ዋዳና ጋካናስ ጎዳሊዛ አሳኮሺን፤ ማጫሳታኔ አዴታ ቃቻ ቃቻ ቃቻ ኬሰ ዩዲዛዴኮሺን።

5 ሃይሲ ወሪ ቱሙ ጌዲዳይሳ ቄሴታ ሃላቃቲኔ ዴሬ ጨማቲካ ወሪ ታስ ማርካታና፤ ሃራይ አቶሺን ዳማስቆን ዲዛ አማኒዛ አሳ ቃቻ ዩራሳላሜ ኤሃዳ ቃጸይሳናስ ዳማስቆን ዲዛይታስ ጸፊቲዳ ዳብዳቤ ቄሴታ ሃላቃታፔኔ ዴሬ ጨማታፔ ኤካዲስ።

ጳውሎሲ ኪርስቶሳ ዋስቲ አማኒዳኮ የቲዴስ
(ሃዋ 9:1-19፤ 26:12-18)

6 «ታኒ ዳማስቆ ቢሺኒኔ ካታማ ጌላና ማቲሺን ሴታ ጋላስ ታ ቆፖንታ ዲሺን ሳሎፔ ዋልቃማ ፖኦይ ታና ዩዩ አዲ ፖኢዴስ።

7 ሃ ዋዴ ታኒ ቢታ ቦላ ኩንዳዳ፡ ሳኦሌ! ሳኦሌ! ኔ ታና አዛስ ጎዳይ?» ጌዛ ቃላ ሲያዲስ።

8 ታኒካ፡ ሳይ፡ ኔ ኦኔ? ጋዲስ፤ ኢዚካ፡ ታ ኔኒ ጎዲዛ ናዚሬቴ ዬሱሳን ጌዴስ።

9 ታናራ ኢሲፌ ዲዛ አሳቲ ፖኦዛ ቤኢዳ አቲን ኢዚ ታናራ ሃሳይሺን ቃላ ሲደቤቴና።

10 ታኒካ፡ ሳይ፡ ታ አይ ኦላ? ጋዲስ፤ ጎዲዛ፡ «ዴንዳዳ ዳማሰቆ ባ፤ ኔ ኦላናይሳ ኢስቲ ኔስ ሄን ዮታና» ጌዴስ።

11 ፖኦዛ ጸልቄቴላ ዳሮፔ ዴንዲዳይሳን ታ ጸላናስ ዳንዳያቤኬ፤ ታናራ ዲዛ አሳቲ ታ ኩሼ ኦይኪ ጎቺዲ ታና ዳማሰቆ ጋሊዳ።

12 «ሃናኒያ ጌቴቲዛ ኢሳዴይ ሄን ዴስ፤ ሃናኒያይ ዳማሰቆን ዲዛ አይሁዳታ አቻን ዳሮ ጋላቴቲዳይሳኔ ዋጋ ቦንቺዛ አሳ።

13 ኢዚ ታ አቶ ሸቂ ኤቂዲ፡ ታ አሻ ሳኦሌ! ኔ አይፌይ ቃሴካ ጸሎ» ጌዴስ፤ ሄራካ ታ አይፌይ ኢዛ ጸሊዴስ።

14 ኢዚካ ታና፡ ሉ አዋንታ ጸሲ ኔ ኢዛ ሼኔ ኤራና ማላ፡ ኢዛ ጸሎዛ ኔ ቤያና ማላኔ ኢዚ ጊዛይሳ ኔ ሲያና ማላ ኔና ካሴቲ ዶሪዴስ።

15 ኢዚ ሄሳ ኦሊዳይ ኔ ቤኢዳይሳኔ ሲደዳይሳ አሳ ኡባ ሲንላን ኢዛስ ኔ ማርካታናሳ።

16 ሂስቲን ሃኢ አዛስ ጋምኣይ? ዴንዳዳ ኢዛ ሱንሐ ጸይጋዳ ጸማቂታ፤ ኔ ናጋራፔካ ሜጤታ» ጌዴስ።

17 ሄሳፌ ጉዬ ታ ዬሩሳላሜ ሲማዳ ጸሳ ኬላን ዋሲሺን አጁታይ ታስ ቤቲዴስ።

18 ጎዲዛ ታስ ቆንጪዲ፡ ሉ ታ ጊሻስ አማና ማርካቴሐ ኢስቲ ኤኮንታ ጊሻስ ኔ ጋምኦንታ ዳሼ ዬሩሳላሜፔ ኤሌላ ኬዛ!» ጌዴስ።

19 ታኒካ ኢዛስ፡ ሳይ! ታ አይሁዳታ ዋሳ ኬላቲ ዲዛሶ ባዳ ኔና አማኒዛይታ ኡባ ቃቻዳ ኢስታ ቡኪዳይሳ ባ ባጋራ ኢስቲካ ኤሬቴስ።

20 ኔ ጊሻስ ማርካቲዛ ኢስቲፋናሴ አሳይ ዋጂዛ ዋጂ ታኒካ ሄ ዋጂዛ አሳታ አቻን ኤቃዳ ኢስቲ ዋጂዛይሳ ታኒካ ዶሳዲሴኔ ዋጂዛይታ ማይኦካ ናጋዲስ» ጌዴስ።

21 ጎዲዛ፡ «ሃሆን ዲዛ አይዛቤታኮ ታ ኔና ከቲዛ ጊሻስ ዴንዳዳ ባ!» » ጌዴስ።

ጳውሎሲ ኦሮሜ ዴሬ አስ ጊዲዳይሳ ቆንጪሴሐ

22 አሳይ ሂኖ ጋካናስ ጳውሎሳ ሃሳያ ዋዚናፔ ሎኤሊ ሲደሹ አገዲ ባ ቃላ ቶቄ ሂስቲዲ፡ «ሃይሳ ማላ አሲ ኦ ቢታፌ ቆዮ፤

ሃይሳ ማላ አሲ ኑ ቢታን ሽምግራ ፓጻ ዳናስ ቤሴና» ጊሼ ዋሲዴስ።

23 አሳይ ዋሲሼ ባ ማይኦ ቃሪ ቃሪ ወጺሼኔ ቢታ ፑዴ ሳሎ ጳርጨዴስ።

24 ማቶ ሃላቃዚ ሄሳ ቤኢዲ ጳውሎሳ ዋታዳራቲ ዲዛሶ ጌልፋና ማላ አዛዚዴስ፤ ዴሪይካ ኢዛ ቦላ አዛስ ሄሳ ማላ ዋሲዛኮ ኤራና ማላ ኢዛ ጋራፊዲ ፓጺሳና ማላ አዛዚዴስ።

25 ጊዶ አቲን ዳፎን ዋጺ ቃቺዲ ኢዛ ጋራፋና ጊጌቲሺን ጳውሎሲ ባ አቻን ኤቂዳ ኢሲ ማቶ ሃላቃስ፡ «ኦሮሜ አስ ፒርዳይ ባይንዳ ጋራፋናስ አንቴስ ፒቃዴይ ዲዜ?» ጊዴስ።

26 ማቶ ሃላቃይ ሄሳ ሲዪዳ ማላ ሃላቃታ አዛዚዛይሳኮ ቢዲ፡ «አይ ኦፋና ጋይ? ሃይሲ አዴዚ ኦሮሜ አሳኮ!» ጊዴስ።

27 ሄሳ ጊሻስ ሃላቃታ አዛዚዛይሲ ጳውሎሳኮ ሸቂዲ፡ «አኔ ታስ ዮታ፡ ኔ ኦሮሜ አሴ?» ጊዴስ፤ ኢዚካ፡ «ኤ ታ ኦሮሜ አሳ» ጊዴስ።

28 አዛዚዛይሲካ፡ «ታ ኦሮሜ አስ ጊዳናስ ዳሮ ሚሽ ቃንጻዳ ሻማዲስ» ጊን ጳውሎሲ፡ «ታኒ ጊዲኮ ኦሮሜን ዬሌታዲስ» ጊዴስ።

29 ሄሳ ጊሻስ ኢዛ ፒልጊ ጴላናስ ጊጌቲዳ አሳቲ ሄራካ ኢዛ አቻፌ ሃኪዳ፤ አዛዚዛይሲካ ኢዚ ኦሮሜ አስ ሳንሳላታን ቃቺዳይሳ ዩሺ ቆፒዲ ባቢዴስ።

አይሁዳታ ዲላታ ሲንል ጳውሎሳ ሺቆ

30 ዋንቴላ ጋላስ አዛዚዛይሲ አይሁዳቲ ጳውሎሳ ሞቲዛ አይፌ ዮኦይ አዛኮ ኤራና ኮዪዴስ፤ ቄሴታ ሃላቃቲኔ አይሁዳታ ሻንጎ ዲላታ አሳይ ወሪ ኢሳዴይካ አቶንታ ኩሜል ሺቃና ማላ አዛዚዴስ፤ ጳውሎሳካ ቃሾፔ ቢርሺዲ ሸቂዳ አሳ ሲንል ሺሺ ኤሲዴስ።

23

1 ጳውሎሲ ዲላታ አሳ ቲሺ ሂስቲ ጴሊዲ፡ «ታ ኢሻቶ! ሃቶ ጋካናስ ታ ጸሳ ሲንፋን ሎኦ ቆፋራ ዳይስ» ጊዴስ።

2 ቄሴታ ሃላቃ ሃናኒያይ ቃሴ ጳውሎሳ ዶናን ሾጫና ማላ ኢዛ አቻን ኤቂዳይታ አዛዚዴስ።

3 ሄራካ ጳውሎሲ ሃናኒያ፡ «ሃይሶ ኣኖራ ቲዬቲዳ ከላዘ! ኔናካ ጸሲ ሾጫና፤ ዋጋራ ፒርዳና ኡታዳ ዋጋይ ባይንዳ ታና ሾጫና ማላ ኣዛዛይ?» ጊዴሰ።

4 ሄ ዋዴ ሄን ዲዛ ኣሳይ ጳውሎሳ፡ «ጸሳ ቄሴታ ሃለቃ ጫያይ?» ጊዴሰ።

5 ጳውሎሲካ ኢሰታሰ፡ «ታ ኢሻቶ! ኢዚ ቄሴታ ሃለቃ ጊዲዳይሳ ታ ኤራቤኬ፤ ጋሶይካ፡ ኔ ዴሬ ሃለቃ ቦላ ኢታ ቃላ ጎጋ» ጊዛይሲ ጸፊቲዴሰ» ጊዴሰ።

6 ጳውሎሲ ሄን ዲዛ ኣሳፔ ባጋይ ሳዱቃዊታ፡ ባጋይ ፋርሳዊታ ጊዲዳይሳ ኤሪዲ፡ «ታ ኢሻቶ! ታ ፋርሳዊፔ ዩሌታዲሰ፤ ታኒካ ፋርሳዊ፤ ሄኮ ሃኢ ታ ፒርዴታና ሸቂዳይ ሃይቂዳይቲ ዴንዳናይሳ ታ ኡፋይሰ ኦሊዛ ጊሻሳ» ጊዲ ባ ቃላ ቶቄ ሂስቲዲ ዱላታ ኣሳ ሲንሳን ዮቲዴሰ።

7 ጳውሎሲ ሄሳ ዮቲዳ ማላ ፋርሳዊታ ጊዲኒኔ ሳዱቃዊታ ጊዲንካ ኦሺ ዴንዲን ዱላታይ ናምኡ ከዚ ሻኬቲ ዋዲዴሰ።

8 ጋሶይካ ሳዱቃዊቲ፡ «ሃይቂዳይታሰ ዴንላ ዴና፤ ኪታንቻይካ ባ፤ ኣያናይካ ዴና ጊዛይታ፤ ፋርሳዊቲ ጊዲኮ ሄይቲ ወሪካ ዴቲሰ» ጊ ኣማኒዛይታ።

9 ሄ ዋዴ ዳሮ ሺሮይ ኣሳ ጊዲን ሃኒዴሰ፤ ፋርሳዊታ ባጋታ ጊዲዳ ኢሲ ኢሲ ሙሴ ዋጋ ታማርዛይቲ ዴንዲዲ፡ «ኦ ሃይሳ ኣዴዛ ቦላ ኣይኮካ ኢታ ሚሽ ዴሚቤኮ፤ ኣያናይ ዋይኮ ኪታንቻይ ኢዛሰ ዮቲዳ ጊዳና፤ ኦ ኣይ ኤሪዞኒ?» ጊዲ ፓላማቲዳ።

10 ፓላማይ ሚኒ ሚኒ ቢዳ ጊሻሰ ኣሳይ ጳውሎሳ ታርሼሬልንታ ማላ ባቢዲ ሃለቃታ ኣዛዚዛይሲ፡ «ዲጌ ዋዲዲ ጳውሎሳ ኣሳ ጊደፊ ሃ ከሲ ኤኪ ዩዲ ዋታዳራቲ ዲዛሶ ኤፍቲ!» ጊዲ ዋታዳራታ ሃለቃታ ኣዛዚዴሰ።

11 ዋንቴላ ጋላሰ ሌላ ጊደል ጎዲይ ጳውሎሳ ኣቻን ኤቂዲ፡ «ኣይኮይ ባ፤ ኔ ዩራሳላማን ታሰ ማርካቲዳይሳላ ኦርማንካ ኔ ታሰ ማርካታናሰ ቤሴሰ» ጊዴሰ።

ጳውሎሳ ዋዳናሰ ኣሳ ማቂቴል

12 ጋዴይ ዋንቲን ኣይሁዳ ኣሳቲ ሸቂቲዲ፡ «ኦ ጳውሎሳ ዋዶንታ ዲሺ ካል ሞኮ፤ ሃሊካ ኡዮኮ» ጊ ጫቂቲዳ።

13 ሄሳ ሄ ማቆዛን ኢሲፊ ጊዲዳ ኣሳ ቆዳይ ኦይዱ ታማፊ ቦላራ ዴሰ።

14 ኢስቲካ ቄሴታ ሃላቃታኮኔ ዳሬ ጨማታኮ ቢዲ ኢስታስ፥ «ኑ ጳውሎሳ ዋጽንታ ዲሼ ካል ሞንታ ማላ ሚንሉ ጫቂደስ።

15 ሄሳ ጊዲዳ ጊሻስ አንቴ ዳሬ ጨማታራ ዘሬቲዲ ኢዛ ኬሂ ፒልጊ ያሊዛ ሚሳቲዲ ኢስቲ አንቴስ ጳውሎሳ ኤሃና ማላ አዛዚዛይሳ ኦይቺቲ፤ ኑኒካ ኢዚ ሃ ሃኖ ጋካናፔ ካሴቲዲ ኢዛ ዋጽና ጊጌቲደስ» ጊዳ።

16 ጊደ አቲን ኢሲ ጳውሎሳስ ሚቺ ናይ ሄሳ ኢስታ ማቆዛ ሲዱዳ ጊሻስ ዋታዳራቲ ዲዛሶ ቢ ጌሊዲ ዮኦዛ ጳውሎሳስ ዮቲዴስ።

17 ጳውሎሲካ ማቶ ሃላቃታፔ አሳ ባኮ ያይጊዲ፥ «ሃይሲ ናዚ ዋታዳራታ አዛዚዛይሳስ ዮቲዛ ዮኦይ ዲዛ ጊሻስ ኢዛኮ ኤፋ» ጊዴስ።

18 ማቶ ሃላቃይ ናዛ ዋና አዛዚዛይሳኮ ኤኪ ጌሊዲ፥ «ቃሹቲዳ ጳውሎሲ ታና ባኮ ያይጊዲ ሃይሲ ናዚ ኔስ ዮቲዛ ዮኦይ ዲዛ ጊሻስ ታ ኢዛ ኔኮ ሺሻና ማላ ታና ዋሲዴስ» ጊዴስ።

19 አዛዚዛይሲካ ናዛ ኩሼ ኦይኪ ኤኪዲ ሃራሶ ፖቂዲ፥ «ኔ ታስ ዮታናይሲ አዜ?» ጊዲ ኢዛ ዱማ ኦይቺዴስ።

20 ናዚካ፥ «አይሁዳ አሳቲ ጳውሎሳ ዮኦዛ ሎኤሉ ማራማሪዛዴ ሚሳቲሲዲ ዋንቶ ኔ ኢዛ ኢስታስ ሺሻና ማላ ኦይቻናስ ቃቺ ዋሊዳ።

21 ጊደ አቲን ኔ ኢስታስ ኤሮ ጎፓ፤ ጋሶይካ፥ ሱ ኢዛ ዋጽንታ ዲሼ ካል ሞኮ፤ ሃሊካ ኡዮኮ» ጊዲ ጫቂቲዳይቲ ኦይዱ ታማፌ ቦላ ጊዲዛ አሲ ኢዛ ዋጽናስ ኦጌ ቦላ ዙጌስ፤ ሃኢ ኢስቲ ናጊዛይ ኔ ዛሮ ጸላላ» ጊዴስ።

22 አዛዚዛይሲካ፥ «ኔ ሃይሳ ታስ ዮቲዳይሳ ሃራ ኦናካ ኤሪሶፋ» ጊዲ ናዛ ሞይዚዴስ።

ዳሬ ሃሪዛ ፊልኪሴ ሲንል ጳውሎሳ ሺቆ

23 ሄሳፌ ጉዬ ዋታዳራታ አዛዚዛይሲ ማቶ ሃላቃታፔ ናሞኦታ ያይጊዲ፥ «ቃማፌ ሄሹ ሳቲ ጊዲሺን ቂሳሪያ ጌቲቲዛሶ ባና ማላ ናሞኡ ያቲ ዋታዳራታ፥ ላፑን ታሙ ቶጋንቻታኔ ናሞኡ ያቲ ቶራንቻታ ጊግሲቲ፤

24 ጳውሎሳሲካ ፓራ ጊግሲዲ ዳሬ ሃሪዛ ፊልኪሴኮ ሎኦን ጋካና ማላ ኦሊቲ» ጊዴስ።

25 ዳብዳቤ ሂዝጊ ጸፊዴስ፤

26 «ዳሬ ሃሪዛ ቦንቾ ፊልኪሴስ፥ ቃላዋደሳ ሉሲዮሳፔ፥ ሳሮይ ኔስ ጊደ።

27 ሃይሳ አዴዛ አይሁዳ አሳቲ ኦይኪ ዋቋና ገሺን ኢዚ ኦሮሜ አስ ገዲዳይሳ ታ ጋካ ኤሪዳ ገሻሰ ዋታዳራታራ ጋካዳ አሻዲሰ።

28 ኢስቲ ኢዛ አዛሰ ሞቲዛኮ ታ ኤሪና ኮያዳ ዴሬ ዲላታኮ ሸሻዲሰ።

29 ኢስቲ ኢዛ ቦላ ሸሺዳ ሞቶይ ባ ዋጋ ገሻሰ ገዲዳይሳ ኤሪዲሰ፤ ገዶ አቲን ኢዛ ሃይቆሰ ዋይኮ ቃሾሰ ጋሊዛ ሚሺ ዴና።

30 ሃይሳ አዴዛ ዋቋናሰ አሳይ ማቄቲዳይሳ ታ ሲዬዳ ማላ ሄራካ ኔኮ ዬዳዲሰ፤ ሞቲዛይቲካ ሄን ኔ ሲንላን ባ ሞቶ ሸሻና ማላ ኢስታሰ ዮታዲሰ» ገዴሰ።

31 ሄሳ ገሻሰ ዋታዳራቲ ባ አዛዜቲዳ ማላ ጳዉሎሳ ቃማራ ኤፊዲ አንቲጳጺሮሴ ጌቲቲዛሶ ጋሊዳ።

32 ዋንቲላ ጋላሰ ቶጋንቻቲ ጳዉሎሳራ ባና ማላ ኦሊዲ ኢስቲ ቃሴ ጉዬ ሶ ሲሚዳ።

33 ቶጋንቻቲ ቄሳሪያ ጋኪዲ ዳብዳቤዛ ዴሬ ሃሪዛይሳሰ አሚዲ ጳዉሎሳ ኢዛ ሲንላ ሸሺዳ።

34 ዴሬ ሃሪዛይሲ ዳብዳቤዛ ናባቢዲኔ ጳዉሎሳ፡ «ኔ አዋ ዴሬፔ ያዲ?» ገ ኦይቹዴሰ። ኢዚ ኪልቂያ ዴሬ አስ ገዲዳይሳ ኤሪዲ፡

35 «ኔና ሞቲዛይቲ ዩሺን ታ ኔ ዮኦ ሲያና» ገዴሰ፤ ሄርዶሳ ጊቤ ጋላን ኢዚ ናጌታና ማላ አዛዚዴሰ።

24

አይሁዳ አሳይ ጳዉሎሳ ሞቲዴሰ

1 ኢቻሹ ጋላሳፌ ጉዬ ቄሴታ ሃላቃ ሃናኒያይ ኢሲ ኢሲ ጨማታራኔ ጸርጹሎሳ ጌቲቲዛ ጸባቃራ ቄሳሪያ ቢዴሰ፤ ኢስቲካ ዴሬ አይሲዛ ፊልኪሴኮ ሸቂዲ ጳዉሎሳ ሞቲዳ።

2 ጳዉሎሲ ጴይጌቲ ሸቂን ጸርጹሎሲ ኢዛ፡ «ቦንቾ ፊልኪሴ! ኑኒ ኔ ባጋራ ዳሮ ሳሮቲላ ዴሚዶሰ፤ ኔ ሎኦ አይሶንካ ኑ ዴሬሰ ሎኤቲላ ቤቲዴሰ።

3 «ሄሳ ኔ ሎኦ ኦሶዛ ኑ አዋን ገዲን አይዴካ ቶቄ ገዳ ቦንቾራኔ ጋላታራ ኤኮሰ።

4 ታ ሃኢ ኔና ጋምኢሶንታኔ ዳቡርሶንታ ቃንላራ ኔሰ ዮቲዛይሳ ኪያቲላን ኑ ገዛይሳ ኔ ሲያና ማላ ዋሶሰ።

5 «ሃይሲ አዴዚ ኑሰ ኢታ ሃርጌ ገዲዴሰ፤ አላሜን ዲዛ አይሁዳታ ኡባ ቦላ ሜቶ ሜዴሰ፤ ናዚራቄ ጌቲቲዛ ዋርዶ አሳታ ካሌሊዛ ዋናይ ኢዛ።

6 ኢዚ ጸሳ ከሌ ቱኒሳና ጊሺን ኑ ኢዛ ኑይኪደሰ። [ኑ ዋጋ ማላ ኑ ኢዛ ቦላ ፒርዳና ቆፒደሰ፤

7 ጊዶ ኣቲን ዋታዳራታ ሃላቃታ ኣዛዚዛይሲ ሉሲዮሲ ጋኪዲ ኑ ኩሼፔ ኢዛ ዋልቃራ ዋሒ ኤኪደሰ።

8 ኢዛ ሞቲዛ ኣሳይካ ኔኮ ያና ማላ ኣዛዚደሰ።] ሃይሲ ኑ ኢዛ ቦላ ሺሺዳ ሞቶዚ ወሪ ቱሙ ጊዲዳይሳ ኔኒ ኔ ባጋራ ኢዛ ኦይቻ ጋካናሰ ዳንዳያሳ» ጊ ሞቲደሰ።

9 ሂንኮ ኣይሁዳ ኣሳቲካ፡ «ኤ ሃይሲ ዮኦዚ ወሪካ ቱሙኮ» ጊዲ ኣማኔቲዳ።

ጳውሎሲ ባና ኣሻና ኦጌ ሜዲደሰ

10 ዴሬ ኣይሲዛ ፊልኪሴይ ጳውሎሲ ሃሳያና ማላ ባ ኩሼራ ማላቲ ቤሲደሰ፤ ጳውሎሲካ፡ «ኔኒ ዳር ላይሳ ሃይሳ ዴሬዛ ኣይሲዛዴ ጊዲዳይሳ ታ ኤሪዛ ጊሻሰ ታ ቦላ ሺቂዳ ሞቶዛሰ ታ ኔሰ ኡፋይሳን ዛር ሺሻይሰ።

11 ታ ጸሳሰ ጎይናናሰ ዬሩሳላሜ ቢን ሃች ታማኔ ናምኡ ጋላሳፊ ዳርንታይሳ ኔኒ ኔ ባጋራ ኤራናሰ ዳንዳያሳ።

12 ጸሳ ከፋን ጊዲን ኣይሁዳታ ዋሳ ከፋን ዋይኮ ካታማ ጊዶን ታ ኦናራካ ፓላሜቲሺን ዋይኮ ዴሬ ጊዶን ሜቶ ሜዲሺን ታና ዴሚቤቲና።

13 ሃኢ ታ ቦላ ኢሰቲ ሺሺዳ ሞቶዛሰ ኣይ ማርካካ ሺሻናሰ ዳንዳይቲና።

14 «ጊዶ ኣቲን ታ ኔሰ ቆንጨሳና ኮይዛይ ኢሰቲ ዋርዶ ጊዛ ጎዳ ኦጌራ ኑ ኣዋንታ ጸሳሰ ጎይናይሲኔ ሙሴ ዋጋኒኔ ናቤታ ማጸፋን ጸፊቲዳይሳካ ኡባ ኣማናይሰ።

15 ኢሰቲካ ኡፋይሰ ኦሒዛ ማላ ታኒካ ናጋራንቻቲኔ ጸሎቲ ሃይቆፔ ዴንዳይሳ ጸሳን ኣማኔታይሰ።

16 ሄሳ ጊሻሰ ጸሳ ሲንፋኒኔ ኣሳ ሲንፋን ሲጼይ ባይንዳ ሃናይ ታሰ ዳና ማላ ኡባ ዋዴ ሚናይሰ።

17 «ታ ዬሩሳላሜፔ ከዚን ታሰ ዳር ላይሳ ጊዲዳፔ ጉዬ ታ ዴሬ ኣሳሰ ማዶ ሚሼኔ ጸሳሰ ኢሜቲዛ ሚሼ ኤካ ያዲሰ።

18 ታና ኢሰቲ ጸሳ ከፋን ዴሚዳይ ታ ሄሳ ጋሒሺና፤ ሄ ዋዴ ታ ጌይዛ ዋጋ ፖሊሺን ታናራ ዳር ኣሲ ዴና፤ ኦሺኔ ሺርይካ ዴና።

19 ጊዶ ኣቲን ኢሲያፔ ዬዳ ኢሲ ኢሲ ኣይሁዳ ኣሳቲ ዴቲሰ፤ ኢሰታሰካ ታና ሞቶሰ ጋሒዛዚ ዲዛ ጊዲኮ ኔ ሲንፋን ታና ሞቲቶ።

20 ሄሳፊ ጉዬ ታኒ ዱላታ ሲንሳ ሺቂኮ ታ ኦሒዳ ቆሆይ ዲኮ ሄ ኣሳቲ ዮቲቶ።

21 ታና ሃይሳስ ጋሊዳ ጋሶይካ ታ ኢስታ ጊዶን ኤቃዳ፥ «ሃይቂዳይታስ ዴንሊ ዴስ» ጋ ዮቲዳ ገሻስ፥ «ሃኛ ፒርዳስ ኢንቴ ሲንሳ ሺቃዲስ» ጋዳ ታ ቃላ ቶቄ ሂስታ ዮታዲስ ኣቲን ሃራ ታኒ ኦሊዳ ሚሺ ዴና» ጊዴስ።

22 ፊልኪሴይ ጎዳ ኦጌ ሎኤሊ ኤሪዛ ገሻስ፥ «ዎታዳራታ ሃላቃታ ኣዛዚዛይሲ ሉሲዮሲ ዪዛ ዎዴ ታ ኢንቴ ዮኦዛ ገሻስ ቃሾ ጊዲዛ ዮኦ ኢማና» ጊዲ ኢስታ ዬዲዴስ።

23 ጳውሎሳ ናጊዛ ማቶ ሃላቃይ፥ «ኢዛ ዳሮ ዋዪሶንታ ሎኤላ ናጋ፤ ኢዛ ላጌቲ ኢዛስ ኮሺዛ ሚሽ ኤኪ ዪኮ ዲጎፋ» ጊዴስ።

ፊልኪሴ ሲንሊኔ ዲሩሲላ ሲንሳ ጳውሎሳ ሺቆ

24 ጉላ ዎዴፔ ካሊዲ ፊልኪሴይ ኣይሁዳ ኣስ ጊዲዳ ባ ማቼዮ ዲሪሲላራ ዪዴስ፤ ጳውሎሳካ ጴይጊዲ ዬሱስ ኪርሰቶሳን ኣማኖ ገሻስ ኢዚ ዮቲሺን ሲዪዴስ።

25 ጳውሎሲ ጲሎቴላ ገሻስ፥ ኣሲ ባርካ ባና ሃሮ ገሻሲኔ ቡሮፔ ያና ፒርዳ ገሻስ ዮቲን ፊልኪሴይ ባቢዲ፥ «ሃኢ ኔ ባ፤ ሃራ ዎዴ ታስ ገገሺን ታ ኔና ጴይጋ ኤካና» ጊዴስ።

26 ፊልኪሴይ ጳውሎሳፔ ጉቦ ኤካናስ ኡፋይስ ኦሊ ናጊዳ ገሻስ ዳሮ ዎዴ ጋካናስ ጴይጊ ጴይጊ ሃሳይሲዴስ።

27 ናምኡ ላይላፌ ጉዬ ጳርቂዮሳ ፊሰጸሲ ፊልኪሴ ሶሆን ሹሜቲዴስ፤ ፊልኪሴይ ኣይሁዳታ ኡፋይሳናስ ኮዪዲ ጳውሎሳ ቃሾሶን ኣጋጊዴስ።

25

ጳውሎሲ ባ ዮኦዛ ኦሮሜ ካዎይ ቤያና ማላ ኦይቺዴስ

1 ፊሰጸሲ ባ ኣይሲዛ ዴሬ ቂሳሪያ ጌሊዲ ሄዡ ጋላስ ኣቁቲዲ ሄፔ ዬሩሳላሜ ቢዴስ።

2-3 ሄን ዲዛ ቄሴታ ሃላቃቲኔ ኢሲ ኢሲ ኣይሁዳታ ጊዶፌ ጌታ ጌታ ኣሳቲ ጳውሎሳ ቦላ ባ ሞቶ ሺሺዳ፤ «ጳውሎሳ ሃ ዬሩሳላሜ ኤሂዲ፥ ሱስ ሎኦ ኦሶ ኦላርኪ!» » ጊዲ ዎሲዳ፤ ኢስቲ ሄሳ ጊዳይ ጳውሎሳ ናጊዲ ኦጌ ቦላ ዎጳናስ ኮዪዳ ገሻሳ።

4 ጊዶ ኣቲን ፊሰጸሲ፥ «ጳውሎሲ ቂሳሪያን ቃሾ ኬላን ናጌቴስ፤ ታኒካ ሃኢ ኤሌ ሲማዳ ሄ ኢዛኮ ባና።

5 ኢንቴ ጊዶፌ ዳናቴሊ ዲዛይቲ ታናራ ቂሳሪያ ቤቶ፤ ጳውሎሲ ኦሊዳ ቆሆይ ዲዛ ጊዲኮ ሄን ሞቲቶ» ጊዴስ።

6 ፊስጾሲ ኦስቸን ወይኮ ታሙ፡ ጋላሳፌ ዳሮንታ ወዴ ኢስታራ ጋምኢዳፔ ጉዬ ቁሳሪያ ቢዴስ፤ ሄ ጋኪዳ ማላ ዋንቴላ ጋላስ ፒርዳ ወምቦራ ቦላ ኡቲዲ ጳውሎሳ ባኮ ሺሻና ማላ ኣዛዚዴስ።

7 ጳውሎሲ ኢዛ ሲንሐ ሺቂን ዬሩሳላሜፔ ዪዳ ኣይሁዳቲ ጳውሎሳ ጊዶሊዲ ማርካይ ባይንዳ ዳሮ ዴጾ ሞቶ ኢዛ ቦላ ሺሺዳ።

8 ጳውሎሲካ፡ «ታኒ ኣይሁዳ ዋጋ ቦላ ጊዲን ጸሳ ኩላ ቦላ ወይኮ ኦሮሜ ካዎ ቁሳሬ ቦላካ ጋሊዳ ቆሆይ ዴና» ጊዲ ኢስታ ሞቶዛ ሻሪዛ ዛሮ ኢስታስ ኢሚዴስ።

9 ጊዶ ኣቲን ፊስጾሲ ኣይሁዳታ ኡፋይሳናስ ኮዪዲ ጳውሎሳ፡ «ኔኒ ዬሩሳላሜ ባዳ ሃይሳ ዮኦዛ ሄን ታ ሲንላን ፒርዴታና ኮያይ?» ጊዴስ።

10 ጳውሎሲ ቃሴ ኢዛስ፡ «ሄኮ ታ ፒርዴታናስ ታስ ቤሲዛ ቁሳሬ ፒርዳ ወምቦራ ሲንላን ኤቃዲስ፤ ኔካ ሎኤላ ኤሪዛ ማላ ታ ኣይሁዳታ ቦላ ኦሊዳ ኣይኮ ቆሆይካ ዴና።

11 ታ ቆሂዳ ጊዲኮ ወይኮ ታና ሃይቆስ ጋሊዛ ቆሆ ታ ኦሊዳ ጊዲኮ ታ ሃይቆፔ ኣታና ጊኬ፤ ጊዶ ኣቲን ኢስቲ ሺሺዛ ሞቶይ ሃዳ ጊዲኮ ኦኒካ ታና ኢስታስ ኣሊ ኢማናስ ዳንዳዬና፤ ታኒካ ታ ዮኦይ ቁሳሬ ሲንሐ ሺቃና ማላ፡ «ዪጊባይኔ» ጋዲስ» ጊ ዛሪዴስ።

12 ሄ ወዴ ፊስጾሲ ባና ዘሪዛይታራ ሃሳዬቲዲ፡ «ኔ ቁሳሬኮ፡ «ዪጊባይኔ» ጊዛ ጊዲኮ ቁሳሬኮ ባንዳሳ» ጊዴስ።

ጳውሎሲ ኣጊርጳ ሲንሐኔ ባርኒቄ ሲንሐ ሺቂዴስ

13 ጉላ ጋላሳታፔ ጉዬ ካዎ ኣጊርጳይኔ ባርኒቄይ ፊስጾሳ፡ «ሃሹ ሎኦን ያዳሳ» ጊ ሞካናስ ቁሳሪያ ቢዳ።

14 ኢስቲ ሄን ዳሮ ጋላስ ኡቲዳ ጊሻስ ፊስጾሲ ጳውሎሳ ዮኦዛ ካዎ ኣጊርጳስ፡ «ፊልኪሴይ ቃሾ ኩላን ዬጊ ኣጊዳ ኢሳዴይ ሃን ዴስ።

15 ታ ዬሩሳላሜን ዲዛ ወዴ ቄሴታ ሃላቃቲኔ ኣይሁዳታ ጨማቲ ሃ ኣዴዛ ዮኦ ታኮ ኤሂዲ ታ ኢዛ ቦላ ፒርዳና ማላ ኦይቺዳ።

16 ታ ቃሴ፡ «ሞቲቲዳዴይ ሞቲዛይታ ሲንላን ኤቂዲ ባና ሞቲዛ ዮኦዛስ ቤሲዛ ዛሮ ኢሞንታ ዲሺን ሞቲቲዳዴ ኣሊ ኢሞይ ኦሮሜ ካዎቴላስ ዋጋ ጊዴና» ጋዳ ዛራዲስ።

17 «ሄሳ ጊሻስ ኢዛ ሞቲዛይቲ ሺቂቲዲ ዪዳ ማላ ሄራካ ዋንቴላ ጋላስ ፒርዳ ወምቦራን ኡታዳ ጳውሎሳ ታ ሲንሐ ሺሻና ማላ ኣዛዛዲስ።

18 እዚ ሞተዘይቲ እዚ ኣቻን ኤቂዳ ዋዴ ኢስቲ እዚ ቦላ ሺሺዳ ሞቶይ ታ ባጋራ እዚ ኢታ ኦሶንታ ኣጌና ጋዳ ቆፒዳ ማላ ጊዲቤና።

19 ጊዶ ኣቲን ኢስቲ እዚ ሞተቲዘይ ባ ኣማኖ ጊሻሲኔ ጳውሎሲ ሃይቂዳይሳ፡ «ፓጳ ዴሰ» ጊዛ ዬሱሳ ጊሻሰ ጊዲዴሰ።

20 ታኒካ ሄሳ ማላ ዮኦ ቆራ ጴላናሰ ታና ሜቲዳ ጊሻሰ ጳውሎሳ፡ «ኔ ዬሩሳሌሜ ባዳ ሄሳ ዮኦዛ ሄን ፒርዴታና ኮያይ?» ጋዲሰ።

21 ሂሰቲን እዚ ዮኦዚ ኦሮሜ ካዎ ሲንፋን ቤዬታና ማላ ኮዬዲ፡ «ታ ዮኦይ ቄሳሬ ሲንፋ ሺቃና ማላ ኦይቻይሰ» ጊዳ ጊሻሰ እዚ ዮኦ ቄሳሬኮ ታ ዬዳና ጋካናሰ እዚ ቃሾ ኬፋን ጋምኣና ማላ ኣዛዛዲሰ» ጊ ዮቲዴሰ።

22 ኣጊርጳይ ፊሰጸሳ፡ «ታኒካ እዚ ጊዛ ሲያና ኮያይሰ» ጊዴሰ። ፊሰጸሲካ፡ «ዋንቶ ሲያንዳሳ» ጊዴሰ።

23 ሄሳ ጊሻሰ ዋንቲፋ ጋላሰ ኣጊርጳይኔ ባርኒቄይ ካዎቲ ማይእዛ ማይኦ ማይኢዲኔ ዳሮ ቦንቸራ ዋታዳራታ ሃላቃታራኔ ሄ ካታማን ዲዛ ጊታ ኣሳታን ኣዛቤቲ ዬዲ ፒርዳ ኬል ጌሊዳ፤ ሄሳፊ ጉዬ ፊሰጸሲ ጳውሎሳ ጴይጊሲዴሰ።

24 ፊሰጸሲ፡ «ካዎ ኣጊርጳ! ኦሩራ ዲዛ ኣሳቶ! ኣይሁዳ ኣሳቲ ዉሪ፡ «ሃይሲ ኣዴዚ ሃይሳፊ ጉዬ ፓጳ ዳና ቤሴና» ጊዲ ዋሲሼ ዬሩሳሌሜንካ ሃንካ እዚ ቦላ ፒርዴታና ማላ ኢስቲ ታና ኦይቹዛይ ሃይሳ ኢንቲ ቤእዛ ኣዴዛ ጊሻሳ።

25 ታኒ ታ ባጋራ እዚ ሃይቆሰ ጋሊዛ ኢሲ ባላካ እዚ ቦላ ዴማቤኬ፤ እዚ፡ «ታ ዮኦይ ኦሮሜ ካዎ ሲንፋ ሺቄ ቤዬቶ» ጊዳ ጊሻሰ ታ እዚ ሄ ዬዳናሰ ቃቻዲሰ።

26 «ጊዶ ኣቲን እዚ ጊሻሰ ታኒ ታ ጎዳሰ ጳፋና ጊዛ ኤሬቲዳ ዮኦይ ዴና፤ ሄሳ ጊሻሰ እዚ ኢሲ ኢሲ ፓጩ ኦይሻታ ኦይቹኮ ታሰ ጳፋናይሲ ዳናኮኔ ጋዳ ኢንቲኮ፡ ሃራፔካ ካዎ ኣጊርጳ ኔኮ ሺሻዲሰ።

27 ጋሶይካ ቃሾ ኣሲ ፑዴ ቦላቲዛ ቆቃ ዳናኮ ቢሺን እዚ ሞተቲዛ ዮኦ ቆንጪሶንታ ኣጎይ ኣሳ ኤያ ኬሲዛይሲ ታሰ ቤቲዴሰ» ጊዴሰ።

26

ጳውሎሲ ካዎ ኣጊርጳ ሲንፋን ዮቲዳ ዮኦ

1 አገርጸይ ጳውሎስ፡ «ኔኒ ኔ ገሻስ ሃሳያናሰ ዳንዳያሳ»
ገዴስ፤ ጳውሎስካ ባ ኩሼ ዴንሊዲ ዛሮ አሚዴስ።

2 «ካዎ አገርጸ! ታና አይሁዳቲ ሞቲዛ ዮኦ ኡባስ ሃኙ ታ ኔ
ሲንላን ታና ማዳና ዛሮ አሚዛ ገሻስ ታና ዳሮ ኡፋይሴስ።

3 ጋሶይካ ኔ አይሁዳታ ዋጋኔ ኢስታ ፓላማ ኡባ ሎኤላ ኤራሳ፤
ሄሳ ገሻስ ኔ ታ ገዛ ኡባ ዳንዳያዳ ሲያና ማላ ታ ኔና ዋሳይስ።

4 «ታኒ ጉላ ናቴላ ዋዴፔ ዶማዳ ዋና ዴኢዳኮ አይሁዳ አሳቲ
ኤሬቴስ፤ ኮይሮፔ ሃኢ ጋካናሰ ታኒ ታ ዴሬ አሳ ገደኒኔ ዬሩሳላሜን
ታ ዴኢዳ ዴስ አሳይ ኤሬስ።

5 ቃሴካ ኢስቲ ማርካታና ኮይኮ ኦ አማኖ ገሻስ ታ ኬሃ
ሚንላ ዋጋ ናጊዛ ፋርሳዌ ባጋ ገዳዳ ጋምኢዳዴ ገዲዳይሳ
ኢስቲ ኮይሮፔ ዴንሊዲ ኤሬቴስ።

6 ሃኢ ቃሴ ፒርዳስ ታና ሃይሳን ኤሲዳይ ጸሲ ካሴ ኦ አዋታስ
አሚዳ ጫቆ ቃላ ኡፋይሳ ገሻሳ።

7 ሃ ኡፋይሳኮ ጋካናሰ ኦ ዛርኬቲ ታማኔ ናምኣቲ ጋላሲኔ ቃማ
ጸስ ጎይኒሼ ናጊዳ፤ ካዎ ኢንቴስ ሆላ! አይሁዳቲ ታና ሞቲዛይ
ሃ ዮኦዛ ገሻሳ።

8 ጸሲ ሃይቁዳይታ ዴንላናይሲ ዋኒዲ አይሁዳ ገዲዳ ኢንቴ
ኣቻን አማኔቲቤኔ?

9 «ታኒካ ታ ባጋራ ናዚሬቴ ዬሱሳ ሱንላስ ኤቁታናሰ ቤሴስ
ጋዳ ቆፓዲስ ሸን፤

10 ታኒ ዬሩሳላሜን ኦሊዳይካ ሄሳኮሺን፤ ቄሴታ ሃላቃታፔ ታ
ኤኪዳ ጎዳቴላራ አማኒዛይታፔ ዳሮታ ቃሾ ኬላን ዬጊሳዲስ፤
ኢስታ ዋዲሺን ዋዲዛይታራ ኢሲፌ ዳይስ።

11 ዳሮ ዋዴ አይሁዳታ ዋሳ ኬላቲ ዲዛሶን አዋንካ ኢስቲ
ቃጸዬታና ማላኔ ባ አማኖ ካዳና ማላ ኦላዲስ፤ ኢስታ ቦላ
ዳሮ ሃንቁታዳካ ኢስራኤሌፔ ካሬን ዲዛ ሃራ ካታማታካ ባዳ
አማኒዛይታ ጎዳዲስ።

ጳውሎሲ ኪርስቶሳኮ ዋኒ ሲሚዳኮ ዮቲዴስ

12 «ሃይሳ ሃ ዮኦዛስ ቄሴታ ሃላቃታፔ ኩሜላ ጎዳቴሊኔ ኣዛዘ
ኤካዳ ዳማሰቆ ጌቴቲዛሶ ታ ቢሺን፤

13 ካዎ ኢንቴስ ሆላ! ቡሮ ታ ኦጌን ዲሺን ጋዴይ ሴታ ጋላስ
ገዲሺን ኣርሼ ፖኦፔ ኣዲዛ ፖኦ ቤያዲስ፤ ሄ ፖኦይ ታናኔ ታናራ
ቢዛ አሳታ ዩዩ ኣዲዲ ሳሎፔ ፖኢዴስ።

14 ኑ ወሪካ ቢታ ቦላ ኩንዲ ዲሺን አይሁዳታ ቃላራ፥
 «ሳኦሌ! ሳኦሌ! ታና አዛሰ ጎዳይ? ኔኒ ቃራ ማሻ ቦላ
 ኤቁኮ ኔርካ ኔና ቆሃሳ» ጊዛ ቃላ ሲያዲሰ።

15 «ታኒካ፥ ሳይ! ኔ ኦኔ?» ጋዲሰ፤ ጎዳይካ፥ «ታኒ ኔ ጎዲዛ
 ዬሱሳኮ!

16 ሃኢ ዴንዳዳ ኔ ቶሆን ኤቃ፤ ታ ኔሰ ቆንጪዳይ ኔ ታና
 ሃኢ ቤኢዳይሳኒኔ ሲንፋፌ ታ ኔና ቤሳናይሳን ኔ ታሰ ማርካቲዛዴ
 ጊዳና ማላ ታ ኔና ሹማና ኮያዲሰ።

17 ኢሰራኤል አሳ ኩሼፔኔ ታ ኔና ኢሰታኮ ከቲዛ አይዛቤታ
 ኩሼፔካ አሻና።

18 ኔ ኢሰታ አይፌ ዶያና ማላኔ ቆማፔ ፖኦን ኬሳና ማላ
 ቃሴካ ጸላኤሰ ሃራቲዛሶፔ ጸሳኮ ኔ ዛራና ማላ ኦፋና፤ ኢሰቲካ
 ታና አማኒዳ ጊሻሰ ባ ናጋራፔ ማሬታና፤ ቃሴ ዶሬቲዳይታ ጊዶን
 ኢሰቲ ጸንጾ ዴማና» ጊዴሰ።

ጳውሎሲ ባ ኦሶ ጊሻሰ ዮቲዴሰ

19 «ሄሳ ጊሻሰ ካዋ አገርጳ! ሳሎፔ ታሰ ኢሜቲዳ አጂታሰ
 ታ አዛዜታዲሰ።

20 ጊዶ አቲን ታ ካሴታዳ ዳማሰቆን ዲዛ አሳ ካሌፋዳ
 ዬሩሳላሜኒኔ ዩሁዳ ዴሬ ኡባን ዲዛይታ ቃሴካ አይዛቤቲካ ናጋራ
 ኦጌፔ ጸሳኮ ሲሚዲ ማሬታና ማላ ኤሪሳዲሰ፤ ኢሰቲ ናጋራፔ
 ሲሚዳይሳ ቤሲዛዝ ኦፋና ማላ ታ ኢሰታሰ ዮታዲሰ።

21 ሄሳ ጋሶን አይሁዳቲ ታኒ ጸሳ ኬላን ዲሺን ታና ኦይኪዲ
 ዋቆና ኮዪዳ።

22 ሃቕ ጋካናሰካ ታሰ ጸሳፌ ማዶይ ፓጪ ኤሬና፤ ሄሳ ጊሻሰ
 ጉፋሰካ ጊታሰካ ማርካታሼ ሃይሳን ኤቃዲሰ፤ ናቤቲኔ ሙሴይ
 ካሴቲዲ ሃይሳ ማላይ ሃናና ጊዳይሳ ዮቶፔ አቲን ታ ሃራ አይኮካ
 ዮታቤኬ።

23 ኢሰቲካ ዮቲዳይሰ፥ «ጸሲ ከቲዳዴይ ሜቶ ቤያና፤ ሃይቆፔ
 ዴንዶን ኮይሮ ጊዲዲ አሲ አታና ፖኦይ ኢሰራኤል ዴሬሲኔ
 አይዛቤታሰ ቆንጫና» ጊዛይሳ» ጊዴሰ።

24 ጳውሎሲ ሄሳ ዮቲሺን ፊሰጾሲ፥ «ጳውሎሳ! ሃኢ ኔ ጎዮንታ
 አጋካ፤ ኔ ዳሮ ታማርዳይሰ ኔና ጎሺዴሰ» ጊ ዋሲዴሰ።

25 ጳውሎሲ ጊዲኮ ኢዛሰ፥ «ቦንቾ ፊሰጾሳ! ታ ኔሰ ቱማ
 ኤራዳ ዮታይሰ አቲን ጎያቤኬ።

26 ታ ኢዛ ሲንላን ቆንጩራ የቲዳ ካዎይ ሃይሳ የኦዛ ኤሬስ፤ ሃይሲካ ቆታራ ኦሴቶንታይሳ ጊዲዳ ጊሻስ ካዎይ ኤራናይሳ ታ አማኔታይስ።

27 ካዎ አጊርጸ! ናቤታ አማናሳ ጊዲኪ? ኔ አማኒዛይሳ ታ ኤራይስ» ጊ ዛሪዴስ።

28 አጊርጸይካ ጳውሎሳ፥ «ሄኮ ኔ ታና ሃኖ ጉላ ዎዴ ጊደን አማንላና ኮያሳ» ጊዴስ።

29 ጳውሎሲካ ኢዛስ ዛሪዲ፥ «ጉላ ዎዴን ጊዲንካ ዎይኮ ዳር ዎዴን ኔ ጸላ ጊደንታ ዲሺን ሃኙ ታ የቲዳይሳ ሲዩዳይ ወሪ ሃኖ ታ ቃሼቴላያ ኣታ ወሪካ ታ ማላ ጊዳና ማላ ታኒ ጸሳ ዋሳይስ» ጊዴስ።

30 ሄሳፌ ጉዬ ካዎይ፥ ዴሬ ኣይሲዛይሲ፥ ባርኒቄይኔ ኢስታራ ኡቲዳ ኣሳይካ ወሪ ዴንዲዴስ።

31 ኢስቲ ሄፔ ኬዚ ቢሺ ባ ጊደን፥ «ሃይሲ ኣዴዚ ሃይቆስ ዎይኮ ቃሾስ ጋሊዛ ሚሼ ኣይኮካ ኦሊቤና» ጊዳ።

32 አጊርጸይካ ፊስጸሳ፥ «ሃይሲ ኣዴዚ የኦዛ ቄሳሬስ ሺቆ ጎንታኮ ኣይኮ ዎሶይ ባይንዳ ሜላ ዬዴታናኮ ሺን» ጊዴስ።

27

ጳውሎሲ ኦሮሚ ቢዴስ

1 ኦኒ ጸላኔ ዴሬ ማርካቤን ባና ማላ ጌቲቲ ቃሼቲዳ ጊሻስ ጳውሎሳኔ ሃራ ቃሾ ኣሳታካ ካዎ ኣወጊስጸሳ ዎታዳራታፔ ጊዲዳ ዩሊዮሳ ጌቲቲዛ ማቶ ሃላቃስ ኣሉ ኢሚዳ።

2 ኢሲያ ኣባ ኣቻን ዲዛ ዴሬታ ቢዛ ማርካቤን ጌሊዲ ቢደስ። ታሶሎንቄን ዲዛ ኢሲ ማቂዶኒያ ኣስ ኣሪስጺሮኮሳ ጌቲቲዛይሲ ኦናራ ዴስ።

3 ዎንቴላ ጋላስ ሲዶና ጌቲቲዛሶ ጋኪደስ፤ ዩሊዮሲ ጳውሎሳስ ሎኦ ጊዲዳ ጊሻስ ጳውሎሲ ባ ላጌታኮ ቢዲ ኣሳይ ኢዛስ ኮሺዛ ማዶ ኦላና ማላ ፒቃዴ ኢሚዴስ።

4 ሄፔ ዴንዲ ኦ ቢሺን ሲንላ ባጋራ ጫርኮይ ኦ ቦላ ጫርኪዛ ጊሻስ ኣባ ጊደን ዲዛ ቆጶሮሴ ዴሬን ጌሜቲዲ ሲንሉ ቢደስ።

5 ኪልቂያ ጌቲቲዛሶኔ ጸንፊሊያ ጌቲቲዛ ዴሬ ኣቻን ዲዛ ኣባ ፒኒዲ ሎቂያ ዴሬን ዲዛ ሙራ ጌቲቲዛ ካታማ ጋኪደስ።

6 ሄን ማቶ ሃላቃይ ጸላኔ ዴሬ ቢዛ ኢስኪንዲሪያ ዴሬ ማርካቤ ዴሚዲ ኦና ኢዛን ጌልሉዴስ።

7 ዳር ጋላስ ሎዲ ጊ ቢዲ ዳር ዋይቲዲ ቃንዶሴ ጌቲቲዛ ካታማ ኣኙ ጋኪደስ፤ ጫርኮይካ ኦ ሲንሉ ቦንታ ማላ ዲጊን

ሳልሞና አቻራ አዲሲ ቃርጾሴ ጌቴቲዛ አባ ጊደን ዲዛ ዴሬን ጌሜቲዲ ቢደሰ።

8 ዳር ዋዩቲዲ ላንቄ ላንቄ * ኦይኪ ኑ አዲዳፔ ጉዬ ላሲያ ጌቴቲዛ ካታማ አቻን ዲዛ፡ «ሎኦ» ጌቴቲዛ ማርካቤይ ኤቂዛሶ ጋኪደሰ።

9 ኑ ቢዛ ኦጌ ቦላ ዳር ዳቡራን ጾማ ዋዴይ አዲዳ ጊሻሰ ሃኢ አባ ቦላራ ባናሰ ዳር ሜቶ ጊዲዳ ጊሻሰ ጳውሎሲ ባናራ ዲዛ አሳይ ናጌታና ማላ ሂዘጊዴሰ፤

10 «አሶ! ሃይሳፌ ኑ ካሊዲ ባና ቡሳይ ዳር ሜቶራ ዲዛይሲ ታሰ ቤቴሰ፤ ማርካቤዛን ዲዛ ጫናዛ ቦላኔ ማርካቤዛ ቦላ ጸላላ ጊደንታ አሳ ሽምፖ ቦላካ ጌታ ቆሆይ ጋካና።»

11 ማቶ ሃላቃይ ቃሴ ጳውሎሳ ዞሬፔ ቦላራ ማርካቤዛ ለጊዛ ዋናዚኔ ማርካቤዛ ጎዳይ ጊዛይሳ ሲዪዴሰ።

12 ሄ ማርካቤይ ኤቂዛሶይ ባልጎይ አቋና ጋካናሰ ማርካቤሰ ሎኦ ሽምፖሶ ጊደንታ ጊሻሰ ዳሪዛ ባጋ አሳይ፡ «ሄሜሶ ሲንሐ ጉጃናሰ ዳንዳዩቲኮ አርሼይ ወሊዛሶፔ ዲጌሃ ባጋራኔ ፑዴሃ ባጋራ ዲዛ ፒንቄ ጌቴቲዛሶ ቃርጾሴ ማርካቤ ሽምፖሶ ኑ ጋኪዲ ባልጎ ሄን አሶሰ» ጊዲ ባ ቆፋ ሺሺዳ።

አባ ቦላ ዳምባላ ዴንሐ

13 ዲጌሃ ባጋራ ጉላ ጫርኮይ ጫርኪሺን ቤኢዲ ኢሰቲ ቆፒዳ ማላ ሃናና ሚሳቲን ባና ኬዚዳ፤ ማርካቤይ ኤቂዛሶፔ ባና ዴንዲዲ ቃርጾሴ አቻራ ላንቄ ላንቄ ኦይኪዲ አዲ ቢዳ።

14 ጊደ አቲን ጉላ ዋዴፔ ጉዬ፡ «አርሼይ ሞኪዛሶፔ ፑዴሃፔ ዪዛ ጎቲ ጫርኮ» ጌቴቲዛ ኢታ ዋልቃማ ጫርኮይ አባ ጊደን ዲዛ ዴሬይፔ ዴንዲዲ ኢሰታኮ አባ ጊደ ዪዴሰ።

15 ማርካቤዛ ጫርኮይ ሱጊን ጫርካራ ኤቂታናሰ ዳንዳዮንታ ኢጺን ኑ ጮኡ ጊዲ ጫርኮይ ኤፊዛሶ ቢደሰ።

16 ቄዳ ጌቴቲዛ አባ ጊደን ዲዛ ዴሬ ዲዛሪን ጌሜቲዲ ኑ ቢሺን ዳር ዋዩቲዲ ማርካቤዛ ቄሪ ዋጎሎዪን ኦይኪዲ ኤሳናሰ ዳንዳይደሰ።

17 ማርካቤዛ ለጊዛይቲ ቄሪ ዋጎሎዮ ማርካቤዛኮ ጎቺ ኬሲዲ ማርካቤዛ ዋዶራ ጸጺዳ፤ ማርካቤዚካ ሲርቲሴ ጌቴቲዛ አባ አጩይ ዳሪ ዲዛሶን ኩንደንታ ማላ ባቢዲ ኢዛ ቦላ ዲዛ ሻራ ዋሊዲ ጫርኮን ላጌቲ ቢዳ።

* 27:8 ላንቄ፡ ላንቄ ጊዛይሲ አባ ጊደን ዲዛ ቃርጾሴ ጋጸ ቤሴሰ።

18 ጎቴ ጫርኮይ ሚኒ ቢዳ ጊሻሰ ዋንቴላ ጋላስ ማርካቤዛን ጫኔቲዳ ሚሻታ ኢሳ ኢሳ አባ ጊዶ ዩጌላ ኦይኪዳ።

19 ሄሻንሶ ጋላስ ማርካቤዛስ ኮሺዛ ሚሻታካ ባ ኩሼራ ኬሲ ኬሲ ዩጊዳ።

20 ዳሮ ዋዴ ጋካናስ አርሼካ፥ ጸሊንቴካ ቤኦንታ አጊዳ ጊሻሲኔ ጫርኮይካ ካሴፔ ሚኒ ሚኒ ቢዛ ጊሻሰ ሃይሳፌ ጉዬ ኑ አታና ዳንዳዮኮ ጊዛ ቆፋን ኡፋይስ ቃንጺዶስ።

21 አሳይ ካል ዋንታ ዳሮ ጋላስ ኡቲዳስ፤ ሄሳ ጊሻሰ ጸዉሎሲ አሳ ጊዶን ኤቂዳ፥ «ሃ አሳቶ! ኢንቴ ታ ጊዛይሳ ሲዬዲ ቃርጾሴፔ ዳንዶንታኮ ሃ ቆሆይኔ ጳዮይ ኢንቴ ቦላ ጋኬናኮሺን።

22 ሃኢካ ማርካቤዚ ጸላ ቆሄታና ኣቲን ኢንቴፌ ኢሳዴ ሽማግሌካ ጳዩና፤ ሄሳ ጊሻሰ ኣይኮይ ባ፤ ባቦፍቴ ጋዳ ታኒ ኢንቴና ዘራይስ።

23 ቃማ ኦማርስ ታ ኢዛስ ጊዲዳ ታ ጎይኒዛ ጸሳይ ከቲዳ ከታንቻይ ታ አቻን ኤቂዳ፥

24 «ጸዉሎሳ! ባቦፋ! ኔ ቄሳፌ ሲንፋን ኤቃና ቤሴስ፤ ሄኮ ኔናራ ኢሲፌ ቢዛይታ ዉርሲ ጸሲ ኔ ጊሻሰ ሃይቆፔ አሻና፤ ጊዲ ታስ ዮቲዳስ።

25 ሄሳ ጊሻሰ ኢንቴኖ ሃ አሳቶ ኣይኮይ ባ፤ ጸሲ ታስ ሃይሳ ዮቲዳይሳ ፖላናይሳ ታ አማናይስ።

26 ጊዲኮካ ሃይሲ ጎቴ ጫርኮዚ ጌዴ ኢሲ አባ ጊዶን ዲዛ ዴፌ አቶ ኤፊዲ ኑና ዩጋና» ጊዳስ።

27 ታማኔ ኦይዳንሶ ቃማ አንዲርያ አባ † ጊዶን ጫርኮይ ኑና ዋዩሲሺን ቢሼ ሌላ ጊዶል ማርካቤዛ ላጊዛይታስ አባፌ ቢታ ቦላ ጋኪዳ ሚሳቲዳስ።

28 ሄሳ ጊሻሰ አባ ጨማቴል ኤራናስ አባን ዩጊ ጸሊዛ ዋዶሮ ኢስቲ ዩጊ ጸሊሺን አባ ጨማቴል ኦይዱ ታሙ ሜቲሬ ኬና ጊዲ ቤቲዳስ፤ ጋምኢሼ ሃኢካ ዩጊን ሄሹ ታሙ ሜቲሬ ኬና ጨማ ጊዲዳይሳ ዴሚዳ።

29 ኑ ዲዛ ማርካቤይ አባ ጋጸን ዲዛ ዛላ ሹቻራ ኢጩቶንታ ማላ ባቢዲ ማርካቤዛፔ ጉዬ ባጋራ ማርካቤዚ ቃጸንታ ማላ ናጊዛ ጳሽኬ ዲጌ አባ ጊዶ ዩጊዳ፤ ሄሳፌ ጉዬ ኢስታስ ቃማይ ዋንታና ማላ ዋሳ ኦይኪዳ።

30 ማርካቤዛ ላጊዛይቲ ማርካቤዛፔ ኬዚዲ ባቃታና ኮዩዳ ጊሻሰ ማርካቤዛፔ ሲንፋ ባጋራ ማርካቤ ናጊዛ ጳሽኬ ዩጊዛ

† 27:27 አንዲርያ አባ፡ አንዲርያ አባ ሜዲቴራኔ አባፌ ኢሲ ባጋራ ዲዛ አባ።

ሚሳቲዲ ማርካቤዛ ቦላ ዲዛ ቁሪ ዋሳሎዮ ዱጌ አባ ጊዶ ዩጊዳ።

31 ሄ ዋዴ ጳውሎሲ ማቶ ሃላቃኔ ዋታዳራታ፡ «ሃይቲ ማርካቤዛን ዲዛ አሳቲ ማርካቤዛ ቦላ ሸምፒዲ ኡቶንታ አጊኮ ኢንቴካ አታና ዳንዳዬኬታ» ጊዴሰ።

32 ሄሳ ጊሻሰ ዋታዳራቲ ዋሳሎዮ ኦይኪዳ ዋዶሮዛ ቃንጺ ዩጊን ኢዛ አባ ቦላ ቶኬታና ማላ ዩዲ አጊዳ።

33 ጋዴይ ዋንታና ጊሺን ወሪካ ካል ማና ማላ ጳውሎሲ ኢሰታ፡ «ኢንቴ ኦዚ ሃናኔሻ ጊዲ ሂርጋን ካል ሞንታ አጊን ሃቕ ታማኔ ኦይዳንሉ ጋላሳ።

34 ሄሳ ጊሻሰ ኢንቴ ካል ማና ማላ ታ ኢንቴና ዋሳይሰ፤ ኢንቴ ሚኮ ሚናና፤ ሙሌካ ኣይኮ ቆሆይካ ኢንቴ ቦላ ጋኬና» ጊ ዋሲዴሰ።

35 ኢዚ ሄሳ ጊዳፔ ጉዬ ካል ኤኪዲ ጸሰ ጋላቲዲ ኡባ አሳ ሲንላን ካል ሙሰ ኦይኪዴሰ።

36 ሄ ዋዴ ወሪካ ሚኔቲዲ ካል ሚዳ።

37 ማርካቤዛ ጊዶን ዲዛ አሳይ ወሪ ናምኡ ጸታኔ ላፑን ታማኔ ኡሱፑና።

38 ወሪካ ሚ ካሊዳፔ ጉዬ ማርካባን ጫኔቲዳ ጊሰቴዛ ዱጌ አባ ጊዶ ዩጊዲ ማርካቤዛ ዴጸ ካዉሺዳ።

ማርካቤዛ ማቆ

39 ጋዴይ ዋንቲን ባ ዲዛሶ ኤሪቤቴና፤ ጊዶ ኦቲን ኣጩይ ዲዛሶ አባ ኩርቁንሉ ዴሚዳ፤ ኢሰታሰ ዳንዳዬቲዛኮ ማርካቤዛ ሄ ሱጊ ሺሻና ቆፒዳ።

40 ማርካቤዛ ኦይኪዛ ቋሽኬ ቃንጺዲ አባ ጊዶ ዩጊዳ፤ ሄ ዋዴ ማርካቤ ላጌዛ ሚሻ ኦይኪዳ ዋዶሮታ ቢርሺዳ። ሃ ባጋራ ዲዛ ሻራ ጫርኮ ባጋ ቶቁ ሂሰቲዲ ኬዛና አባ ጋጸ ቢዳ።

41 ጊዶ ኦቲን ማርካቤዛ ዳሮ ኣጩይ ኮሬቲ ኡቲዳይሳራ ኢጩቲዲ ዱጌ ጉፋኒዴሰ፤ ሲንላ ቦላ ዱጌ ጉፋኒ ቋሽኬቲዲ ቃጸንታይሳ ጊዲዴሰ፤ ቃሴ አባ ዳምባላይ ዳሮፔ ዴንዲዳይሳን ጉዬ ባጋራ ሜቁሬቴል ኦይኪዴሰ።

42 ቃሾ አሳፔ ኢሳዴይካ አባን ዋዲዲ ኬሲ ኤኮንታ ማላ ዋታዳራቲ ዋቆና ቆፒዳ።

43 ማቶ ሃላቃይ ቃሴ ጳውሎሳ አሻናሰ ኮዬዳ ጊሻሰ ኢሰታ ቆፋ ኤካና ኮዬቤና፤ ጊዶ ኦቲን ሃሌ ዋዲ ኤሪዛይቲ ማርካቤዛፔ ዱጌ አባን ጉፒ ጉፒ ዋዲዲ ቢታ ቦላ ኬዛና ማላ ኣዛዚዴሰ።

44 ሃንኮ አቲዳይቲ ሳንቃታኒኔ ማርካቤ ሜቆታን አባ ፒናና ማላ አዛዚዴስ፤ ሄሳላ ሃኒዲ ወሪካ ሳርን አባ ጊዶሬ ቢታ ቦላ ጋኪዳ።

28

ሜላጺያ ቢታን ጳውሎሳ

1 ኑ ቢታይ ዲዛሶ ሳርቴላን ጋኪዳ፤ ጉዬ ኑ ጋኪዳ አባ ጊዶን ዲዛ ዴሬይ ሜላጺያ ጌቲቲዛ ዴሬ ጊዲዳር ኤሪዶስ።

2 ሄ ዴሬዩን ዲዛ አሳይ ዳር ማላሊሲዛ ኪያቴላ ኑስ ኦሊዴስ፤ ሄ ዋዴ ኢሪይ ቡኪዳ ጊሻሲኔ ሜሳ ጊዲዳ ጊሻሰ ታማ ኤሊዲ ኑና ሞኪ ኤኪዳ።

3 ጳውሎሲ አፊራ * ጌቲቲዛ ሚላ ሺሺዲ ታማን ጉጂን ታማ ሴላ፤ ዴንዲዳይሳን ሾሺ ኬዚዲ ኢዛ ኩሼ ቦላ ጸጸቲዴስ።

4 ማልታ አሳይ ሾሺ ጳውሎሳ ኩሼ ቦላ ጸጸቲዳይሳ ቤኢዲ፤ «ሃይሲ አዴዚ ሸምፖ ዋዲዳዴ፤ ጋሶይካ አባ ዳምባላ፤ ኢዚ አቲዲ ዪኮካ ፒርዲዛ ጸሳፊ ኬሲ ኤኪ ፓጸ ዳና ዳንዳይቤና» ጊዲ ባ ጊዶን ሃሳይቲዳ

5 ጳውሎሲ ቃሴ ሾሻ ዳጌ ታማን ቆቆፊ ዩጊዲ አይኮካ ሃኒቤና።

6 አሳይካ፤ «አይዴ፤ አይዴ ኢዛ አሳቴላይ ኪጸኔሻ፤ ዋይኮ ኢዚ ቆፖንታ ኩንዲዲ ሃይቃና» ጊዲ ናጊዴስ፤ ጊዶ አቲን ኢሰቲ ዳር ዋዴ ናጊሺን ኢዛ ቦላ አይኮይካ ሃናንታይሳ ቤኢዲ ባ ቆፋ ላሚዲ፤ «ሃይሲ አዴዚ ጸሳ!» ጊዴስ።

7 ሄ ኑ ዲዛሶ ማታን አባ ጊዶን ዲዛ ዴሬዮ አይሲዛ ፑፑልዮሳ ጌቲቲዛዴስ ጋዴይ ዴስ፤ ሄ አዴዚ ኑና ሞኪ ኤኪዲ ባሶን ሄቹ ጋላስ ጋካናስ ሎኤሊ አማቲዴስ።

8 ሄን ፑፑልዮሳ አዋ ሚሻይኔ ጉሶ ሃርጌይ ሳኪን ኢቺዲ ዴስ፤ ጳውሎሲ ኢዛኮ ጌሊዲ ኢዛሰ ዋሲዴሲኔ ኢዛ ቦላ ባ ኩሼ ዋሊዲ ፓሊዴስ።

9 ሄሲ ሄሳላ ሃንዳ፤ ጉዬ ሄ ዴሬዩን ዲዛ ሃራ ሃርጋንቻቲ ዪዲ ፓጺዳ።

10 አሳይካ ኑስ ዳር ሚሽ ኤሂዲ ኑና ቦንቺዛይሳ ኑና ቤሲዴስ፤ ኑኒ ማርካቤን ባና ዴንዲን ኑስ ኮሺዛይሳ ማርካቤን ኡባ ጫኒዳ።

ሚሊጺኔ፤ ጉርሜ ጳውሎሳ ቡስ

* 28:3 አፊራ ጌቲቲዛ ሚላ፡ ሃ ሚላይ ኢሲ ኢሲ ጋሞላ ቃላን ቃይጸሬ፤ ሆንዴ ጌቲቲስ።

11 ኑ ሚሊዲኔን ሄሹ አገና ጋምኢዳፔ ጉዬ ባልጎይ አቋና ጋካናስ አባ ጊደን ዲዛ ዳሬዪን ጋምኢዲ ኢስኪንዲሪያፔ ዪዛ ማርካቤን ጌሊዲ ባና ዴንዲደስ፤ ሄ ማርካቤዛ ቦላ ዲዮሲቆሮሳ ጌቴቲዛ ናምኡ ማንቴ ኤቃታ ሚስሌይ ዴስ።

12 ሲራኩሴ ጌቴቲዛ ካታማ ጋኪዲ ሄን ሄሹ ጋላስ ጋምኢደስ።

13 ሄፔ አባ ቦላራ ቢዲ ኤሬጊዮሜ ጌቴቲዛ ካታማ ጋኪደስ፤ ሄን ኢሲ ጋላስ አቁዲ ዲጌ ባጋራ ዪዛ ጫርኮይ ጫርኪዳ ጊሻስ ናምኢን፤ ጋላስ ፑቲዮሎሴ ጌቴቲዛሶ ቢደስ።

14 ሄን አማኒዛይታ ዴሚዲ ኢስታራ ኑ ላፑን ጋላስ ጋካናስ ኤታና ማላ ኑና ዎሲዳ፤ ሄፔ ቃሴ ኦሮሜ ቢደስ።

15 ኦሮሜን ዲዛ አማኒዛ አሳይ ኑ ጊሻስ ሲዪዲ አፒዮሴ ጌቴቲዛ ጊያኔ «ሄሹ አቆሶታ» ጌቴቲዛሶ ጋካናስ ኑና ሞካና ዪዳ፤ ጳውሎሳይካ ኢስታ ቤኢዲ ጸስ ጋላቲዴሲኔ ሚኔቲዴስ።

ኦሮሜን ጳውሎሳ

16 ኑኒ ኦሮሜ ጌሊዳ ዎዴ ጳውሎሳ ናጋናስ ኢሲ ዎታዳራይ ኢዛስ ኢሜቲን ጳውሎሲ ባርካ ዳና ማላ ኢዛስ ፒቃዴይ ኢሜቲዴስ።

17 ሄሹ ጋላሳሬ ጉዬ ጳውሎሲ ኦሮሜን ዲዛ አይሁዳታፔ ጊታ አሳታ ባኮ ጴይጊሲዴስ፤ ኢስቲካ ኢዛኮ ሸቂን፤ «ታ አሻቶ! ታኒ ኢስራኤሌ ዴሬ ቦላኔ ኑ አዋታ ዎጋ ቦላ ኦሊዳ ኢሲ ቆሆይካ ዴና፤ ጊዶ አቲን ዬሩሳላሜን ታና ቃቺዲ ኦሮሜ አሳታስ አሊ ኢሚዳ።

18 ኦሮሜ አሳቲ ታና ቆሪ ኦይቺዳፔ ጉዬ ታና ሃይቆስ ጋሊዛ ሚሽ ዴሞንታ አገዳ ጊሻስ ቢርሺ ዬዳና ኮዪዳ።

19 ጊዶ አቲን አይሁዳ አሳይ ታ ቦላ ኢሲ ዎሶይ ባይንዳ ዬዴቶንታ ማላ ኤቁቲን ታ ዮኦይ ቁሳሬ ሲንፅ ሸቂዲ ቤቶ ጋናስ ታስ ጊዴ ጊዲዴስ፤ ጊዶ አቲን ታኒ ታ ዴሬታ ሞቲዛ ጋሶይካ ታስ ዴና።

20 ታ ቃሴ ሃኢ ኢንቴና ጴይጊሲዳይ ኢንቴና ቤያናሲኔ ሃኖ ኢንቴስ ዮታናሳ፤ ሃይሳ ሳንሳላታን ታኒ ቃሹቲዳይ ኢስራኤሌ ናይታስ ኢሜቲዳ ኡፋይሳ ጋሶና» ጊዴስ።

21 ኢስቲካ ኢዛስ፤ «ኔ ጊሻስ ዩሁዳ ዴሬፔ ጳፊቲዳ ዳብዳቤይ ኑና ጋኪቤና፤ ሃ ዪዳ አሳታፔ ኦኒካ ኔ ጊሻስ ኢታ ሃሳይዳይ ባ።

22 ሃይሳ ኔ ካሊዛ አማኖዛ ጊሻስ አዋንካ አሳይ ኢታ ሃሳይዛይሳ ኑ ኤርስ፤ ሄሳ ጊሻስ ኔ ቆፋይ አዛኮ ኑ ሲያና ኮዮስ» ጊ ዛሪዳ።

23 ባሬ ኢዛስ ኢሚዲ ሃራ ጋላስ ኩሼ ኩሚዲ ኢዚ ዲዛ ኬሌ ዪዳ፤ ኢዚካ ማላዶፔ ኦማርስ ጋካናስ ጸሳ ካዎቴላ ጊሻስ ማርካቴላን ባ ቆፋ ኢስታስ ቆንጨሲደስ። ሙሴ ዎጋፔኔ ናቤታ ማጻፋታፔ ጸቃሲ ጸቃሲ ዬሱሳ ጊሻስ ኢስታስ ቆንጨሲ ዮቴደስ።

24 ኢስታፌ ኢሲ ኢሲ ኣሳቲ ኢዚ ዮቴዳ ቃላ ኣማኒዳ፤ ባጋይቲ ቃሴ ኣማኒቤቴና።

25 ኢስቲካ ባ ጊዶን ኢሶይ ኢሳራ ቆፋን ጋጎንታ ሻኬቲዳ፤ ጳውሎሲ ወርሴላን ዮቴሼ፥ «ጸሎ ኣያናይ ናቤ ኢሳያሳ ባጋራ ካሴ ኢንቴ ኣዋታስ ዮቴዳይሲ ቱማኮ!

26 ኢዚ ዮቴዳ ቃላይ፥

« ሃይሳ ዳራኮ ባዳ
ኢንቴ ሲስ ሲያናሺን
ዩሺ ቆፔኬታ፥
ኣይፌራ ቤያናሺን
ዎዚናን ዎሌኬታ
ጋዳ ዮታ።

27 ጋሶይካ ሄ ኣሳታ
ዎዚናይ ሙሚደስ፤
ኢስታ ሃይሳይካ ቱሊደስ፤
ኢስታ ኣይፌይ ቆቂደስ።
ሄሳሉ ሃናንታኮ
ኢስቲ ባ ኣይፌራ ቤኢዲ፥
ባ ሃይሳራ ሲዪዲ
ባ ዎዚናን ዩሺ ቆፒዲ፥
ታኮ ሃ ሲማናኔ
ታኒካ ኢስታ ፓላናሺን፤ ጊደስ።

28 «ሂስቲኮ ጸሲ ኣስ ኣሺዛ ኪታይ ኣይዛቤታስካ ከቲቲዳይሳ ኢንቴ ኤሪቴ፤ ኢስቲካ ኤሮ ጊዲ ኤኬቴስ» ጊደስ።

29 ጳውሎሲ ሄሳ ዮቴዳፔ ጉዬ ኣይሁዳ ኣሳቲ ባ ጊዶን ዳሮ ፓላማቲሼ ኬዚ ቢዳ። †

30 ጳውሎሲ ኪራቲዳ ኬላን ናሞኡ ላይሐ ኩሜሐ ዴኢደስ፤ ባኮ ዩዛ ኣስ ኡባ ሞኪ ኤኪደስ።

31 ጸሳ ካዎቴሐ ሳባኮን ጎዳ ዬሱስ ኪርስቶሳ ጊሻስ ኦኒካ ኢዛ ዲጎንታ ጸላቴሓራ ኣሳ ታማርሲደስ።

† 28:29 ኢሲ ኢሲ ጌሻ ማጻፋታን ታይቦ 29 ቦላ ዲዛ ቆፋይ ጉጂቲቤና።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b